

萬 有 文 庫

第二集七百七種

王 雲 五 主 編

續 古 文 苑

(三)

孫 星 衍 輯

商 務 印 書 館 發 行

專



苑文古續

(三)

輯衍星孫

書叢本基學國

續古文苑卷第十一

賜進士及第授通奉大夫山東通省督糧道加三級孫星衍撰
序上

孫子算經序

孫子曰。夫算者。天地之經緯。羣生之元用。五常之本。末。陰陽之父母。星辰之建號。三光之表裏。五行之準。平。四時之終始。萬物之祖宗。六藝之綱紀。稽羣倫之聚散。考二氣之降升。推寒暑之迭運。步遠近之殊同。觀天道精微之兆基。察地理從橫之長短。采神祇之所在。極成敗之符驗。窮道德之理。究性命之情。立規矩。準方圓。謹法度。約尺丈。立權衡。平重輕。剖毫釐。析

黍索歷億載而不朽。施八極而無疆。散之不可勝究。斂之不盈。掌握嚮之者富。有餘背之者貧。且窶心開者幼。沖而即悟。意閉者皓首而難精。夫欲學之者。必務量能揆己。志在所專。如是則焉有不成者哉。

孟子篇敘

漢趙岐

孟子篇敘者。言孟子七篇。所以相次敘之意也。孟子以爲聖王之盛。惟有堯舜。堯舜之道。仁義爲上。故以梁惠王問利國。對以仁義爲首篇也。仁義根心。然後可以大行其政。故次之以公孫丑問管晏之政。荅以曾西之所羞也。政莫美於反古之道。滕文公樂反古。故次以文公爲世子。始有從善思禮之心也。奉禮之

謂明明莫甚於離婁。故次以離婁之明也。明者當明其行。行莫大於孝。故次以萬章問舜往于田號泣也。孝道之本在於情性。故次以告子論情性也。情性在內而主於心。故次以盡心也。盡己之心與天道通。道之極者也。是以終於盡心也。篇所以七者。天以七紀。璿璣運度。七政分離。聖以布曜。故法之也。章所以二百六十有九者。三時之日數也。不敢比易當期之數。案當舊誤作常今改正故取其三時。三時者。成歲之要時。故法之也。三萬四千六百八十五字者。可以行五常之道。施七政之紀。故法五七之數。而不敢盈也。文章多少。擬其大數。不必適等。猶詩三百五篇。而論曰詩三百

也。章有大小，分章賦篇，篇趣五千，以卒其文，無所取法。猶論四百八十六章，章次大小，各當其事，亦無所法也。蓋所以佐明六藝之文義，崇宣先聖之指務，王制拂邪之隱括，立德立言之程式也。洋洋浩浩，具存乎斯文矣。

淮南子敘

漢高誘

淮南王名安，厲王長子也。長高皇帝之子也。其母趙氏女，爲趙王張敖美人。高皇帝七年，討韓信於銅鞮，信亡走匈奴。上遂北至樓煩，還過趙，不禮趙王。趙王獻美女趙氏女，得幸有身。趙王不敢內之於宮，爲築舍於外，及貫高等謀反發覺，并逮治王，盡收王家，及

美人趙氏女亦與焉。吏以得幸有身聞上。上方怒趙王。未理也。趙美人弟兼。因辟陽侯審食其言之。呂后呂后不肖。白辟陽侯亦不强爭。及趙美人生男。恚而自殺。吏奉男詣上。上命呂后母之。封爲淮南王。暨孝文皇帝即位。長弟上書願相見。詔至長安。日從游宴。驕蹇如家人兄弟。怨辟陽侯不爭其母於呂后。因椎殺之。上非之。肉袒北闕謝罪。奪四縣。還歸國。爲黃屋左纁。稱東帝。坐徙蜀嚴道。死於雍。上閔之。封其四子爲列侯。時民歌之曰。一尺縉。好童童。一升粟。飽蓬蓬。兄弟二人。不能相容。上聞之曰。以我貪其地邪。乃召四侯而封之。其一人病薨。長子安襲封淮南王。次爲

衡山王次爲廬江王。太傅賈誼諫曰：怨讎之人不可貴也。後淮山衡山卒反，如賈誼言。初安爲辯達，善屬文。皇帝爲從父，數上書召見。孝文皇帝甚重之，詔使爲離騷賦。自旦受詔，日早食已上，愛而祕之。天下方術之士多往歸焉。於是遂與蘇飛、李尚、左吳、田由、雷被、毛被、伍被、晉昌等八人及諸儒大山、小山之徒共講論道德、總統仁義而著此書。其旨近老子淡泊無爲、蹈虛守靜、出入經道、言其大也。則燾天載地、說其細也。則淪於無垠。及古今治亂存亡禍福世間詭異瓌竒之事，其義也著，其文也富，物事具類，無所不載。然其大較歸之於道，號曰鴻烈。鴻，大也。烈，明也。以爲

大明道之言也。故夫學者不論淮南，則不知大道之深也。是以先賢通儒述作之士，莫不援采以驗經傳。以父諱長，故其所著諸長字，皆曰脩。光祿大夫劉向校定撰具名之淮南，又有十九篇者，謂之淮南外篇。自誘之少，從故侍中同縣盧君受其句讀，誦舉大義。會遭兵災，天下棋峙，亡失書傳，廢不尋修。二十餘載，建安十年，辟司空掾，除東郡濮陽令。覩時人少爲淮南者，懼遂凌遲。於是以朝舖事畢之閒，乃深思先師之訓，參以經傳道家之言，比方其事，爲之注解，悉載本文，并舉音讀，典農中郎將弁捐，借八卷刺之。會捐身喪，遂亡不得。至十七年，遷監河東，復更補足。淺學

寡見未能備悉其所不達注以未聞唯博物君子覽而詳之以勸後學者云爾俗本多闕此序故錄之

九章算術注序

魏劉徽

昔在包犧氏始畫八卦以通神明之德以類萬物之情作九九之術以合六爻之變暨於黃帝神而化之引而伸之於是建歷紀協律呂用稽道原然後兩儀四象精微之氣可得而效焉記稱隸首作數其詳未之聞也按周公制禮而有九數九數之流則九章是矣往者暴秦焚書經術散壞自時厥後漢北平侯張蒼大司農中丞耿壽昌皆以善算命世蒼等因舊文之遺殘各稱刪補故校其目則與古或異而所論者

多近語也。徽幼習九章，長再詳覽，觀陰陽之割裂，總
算術之根源，探賸之暇，遂悟其意，是以敢竭頑魯，采
其所見，爲之作注，事類相推，各有攸歸，故枝條雖分，
而同本幹者，知發其一端而已。又所析理以辭，解體
用圖，庶亦約而能周，通而不黷，覽之者思過半矣。且
算在六藝，古者以賓興賢能，教習國子，雖曰九數，其
能窮纖入微，探測無方，至於以法相傳，亦猶規矩度
量，可得而共，非特難爲也。當今好之者寡，故世雖多
通才達學，而未必能綜於此耳。周官大司徒職，夏至
日中立八尺之表，其景尺有五寸，謂之地中，說云南
戴日下萬五千里，夫云爾者，以術推之，按九章立四

表望遠。及因木望山之術。皆端旁互見。無有超邈若斯之類。然則蒼等爲術。猶未足以博盡羣數也。徽尋九數有重差之名。原其指趣。乃所以施於此也。凡望極高。測絕深。而兼知其遠者。必用重差。句股則必以重差爲率。故曰重差也。立兩表於洛陽之城。令高八尺。南北各盡平地。同日度其正中之時。以景差爲法。表高乘表閒爲實。實如法而一。所得加表高。即日去地也。以南表之景乘表閒爲實。實如法而一。即爲從南表至南戴日下也。以南戴日下及日去地爲句股。爲之求弦。即日去人也。以徑寸之筩南望日。日滿筩空。則定筩之長短。以爲股率。以筩徑爲句率。日去人

之數爲大股。大股之句，即日徑也。雖天圓穹之象，猶曰可度。又況泰山之高，與江海之廣哉。徽以爲今之史籍，且畧舉天地之物，考論厥數，載之於志，以闡世術之美，輒造重差，并爲注解，以究古人之意。綴於句股之下，度高者重表，測深者累矩，孤離者三望，離而又旁求者四望，觸類而長之，則雖幽遐詭伏，靡所不入。博物君子，詳而覽焉。

元壽賜名序

晉何禎

新婦荀氏所生女，以歲在丁丑四月五日，日始出時生。此月斗建巳，其日又巳，其時加卯中，巳卯皆東南。春夏天地動發萬物，茲之生，令月吉日善時也。又於

易卦震位在卯，巽位在巳。震爲長男，巽爲長女。而此女孫正用茲日，斯時始瞻日月，豈伊先祖之靈實臨祐之？元髮素顏，婦人之上姿也。壽考無疆，生民之至願也。故賜名元壽焉。案隋書經籍志：晉金紫光祿大夫何禎，集一卷，北堂書鈔五十九引。虞預《晉書》：何禎，傳云禎字元幹，然則禎當作禎也。

金谷詩敘

晉石崇

余以元康六年，從太僕卿出爲使持節監青徐諸軍事，征虜將軍，有別廬在河南縣界金谷澗中，去城十里，有田十頃，或高或下，有清泉茂林，衆果竹柏藥草，羊二百口，雞猪鵞鴨之屬，莫不畢備。去城十里，有田十頃，羊二百口。雞猪鵞鴨共十六字，據御覽一百十九引，補足。又有水碓魚池土窟，其爲娛

目歡心之物備矣。時征西大將軍祭酒王詡當還長安。余與衆賢共送往澗中。晝夜遊宴。屢遷其坐。或登高臨下。或列坐水濱。時琴瑟笙筑。合載車中。道路並作。及住。令與鼓吹遞奏。遂各賦詩以敘中懷。或不能者。罰酒三斗。感性命之不永。懼凋落之無期。故具列時人官號姓名年紀。又寫詩著後。後之好事者其覽之哉。凡三十人。吳王師議郎關中侯始平武功蘇紹字世嗣。年五十爲首。案容止篇注又引石崇金谷詩敘曰王詡字季允琅邪人蓋三十人皆有爵里名氏品藻篇不曾備引也

臨河敘

晉王羲之

永和九年。歲在癸丑。暮春之初。會于會稽山陰之蘭

亭脩禊事也。羣賢畢至，少長咸集。此地有崇山峻嶺，茂林修竹，又有清流激湍，映帶左右，引以爲流觴曲水，列坐其次。是日也，天朗氣清，惠風和暢，娛目騁懷，信可樂也。雖無絲竹管弦之盛，一觴一詠，亦足以暢敘幽情矣。故列序時人，錄其所述。右將軍司馬大原孫丞公等二十六人賦詩如左。前餘姚令會稽謝勝等十五人不能賦詩，罰酒各三斗。此文唐人傳石畧小異，無篇末十字，而莫字作暮，禊字作稷，暢字作暢，皆俗書。晉代所未有，疑唐時刻本漫漶重書之誤。

祖道賦序

晉嵇含

祖之在於俗尚矣。自天子至庶人，莫不咸用。有漢卜

日丙午。魏氏擇其丁未。至於大晉。則祖孟月之酉日。各因其行運。三代固不同。雖其奉祖。莫識祖之所由興也。說文祈請道神謂之祖。有事於道者。吉凶皆名。案已上藝文類聚五引在社門蓋彼誤也君子行役北堂書鈔一百五十五亦引嵇含祖賦。則列之於中路。喪者將遷。則稱名於階庭。或云百葉遠祖。名皆凋滅。墳塋不復存。其銘表遊魂。不得託於廟祧。智者故以歲初良辰。肇建華蓋。揮揚綵旗。將欲招靈爽於今夕。庶衆祖之來憑。蓋有兩端。俯歎壯觀。乃述而賦之。

七錄序

梁阮孝緒

日月貞明。匪光景不能垂照。嵩華載育。非風雲無以

懸感大聖挺生。應期命世。所以匡濟風俗。矯正彝倫。非夫丘素墳典。詩書禮樂。何以成穆穆之功。致蕩蕩之化也哉。故洪荒道喪。帝昊興其文畫。結繩義隱。皇頡肇其文字。自斯以往。公襲異宜。功成治定。各有方冊。正宗既歿。樂崩禮壞。先聖之法。有若綴旒。故仲尼歎曰。大道之行也。與三代之英。丘未逮也。而有志焉。夫有志以爲古文猶好也。故自衛反魯。始立素王。於是刪詩書。定禮樂。列五始於春秋。興十翼於易道。夫子既亡。微言殆絕。七十並喪。大義遂乖。逮於戰國。殊俗異政。百家競起。九流互作。羸政嫉之。故有坑焚之禍。至漢惠四年。始除挾書之律。其後外有太常太史。

博士之藏。內有延閣。廣內祕室之府。開獻書之路。置
寫書之官。至孝成之世。頗有亡逸。乃使謁者陳農求
遺書於天下。命光祿大夫劉向及子俊歆等。案俊當
書向本傳云長子。俊以易教授官。至郡守。不作。俊當
云曾受詔校書。阮此言疑出別錄。七畧也。讎校篇
籍。每一篇已。輒錄而奏之。會向亡喪。帝使歆嗣其前
業。乃徙温室中書於天祿閣上。歆遂總括羣篇。奏其
七畧。及後漢蘭臺猶爲書部。又於東觀及仁壽閣撰
集新記。校書郎班固傳毅。並典祕籍。固乃因七畧之
辭。爲漢書藝文志。其後有著述者。袁山松亦錄在其
書。魏晉之世。文籍逾廣。皆藏在祕書中外三閣。魏祕
書郎鄭默。刪定舊文。時之論者。謂爲朱紫。有別。晉領

祕書監荀勗因魏中經更著新簿雖分爲十有餘卷而總以四部別之惠懷之亂其書畧盡江左草創十不一存後雖鳩集淆亂已甚及著作佐郎李充始加刪正因荀勗舊簿四部之法而換其乙丙之書沒畧衆篇之名總以甲乙爲次自時厥後世相祖述宋祕書監謝靈運丞王儉齊祕書丞王亮監謝朓等並有新進更撰目錄宋祕書殷淳撰大四部目儉又依別錄之體撰爲七志其中朝遺書收集稍廣然所亡者猶大半焉齊末兵火延及祕閣有梁之初缺亡甚衆爰命祕書監任昉躬加部集又於文德殿內別藏衆書使學士劉孝標等重加校進乃分數術之文更爲

一部使奉朝請祖暉撰其名錄其尚書閣內別藏經史雜書華林園又集釋氏經論自江左篇章之盛未有踰於當今者也孝緒少愛墳籍長而弗倦卧病閑居傍無塵雜晨光纔啓緗囊已散宵漏旣分綠裘方掩猶不能窮究流畧探盡祕奧每披錄內省多有缺然其遺文隱記頗好搜集凡自宋齊已來王公縉紳之館苟能蓄聚墳籍必思致其名簿凡在所遇若見若聞校之官目多所遺漏遂總集衆家更爲新錄其方內經史至於術伎合爲五錄謂之內篇方外佛道各爲一錄謂之外篇凡爲錄有七故名七錄昔司馬子長記數千年事先哲愍其勤雖復稱爲良史猶有

捃拾之責。況總括羣書四萬餘卷。皆討論研覈。標判宗旨。才愧疎通。學慚博達。靡班嗣之賜書。微黃香之東觀。儻欲尋檢。內寡卷軸。如有疑滯。傍無沃啓。其爲紕繆。不亦多乎。將恐後之罪予者。豈不在於斯錄。如有刊正。請俟君子。昔劉向校書。輒爲一錄。論其指歸。辨其訛謬。隨竟奏上。皆載在本書。時又別集衆錄。謂之別錄。即今之別錄是也。子歆撮其指要。著爲七畧。其一篇。即六篇之總最。故以輯畧爲名。次六藝畧。次諸子畧。次詩賦畧。次兵書畧。次數術畧。次方伎畧。王儉七志。改六藝爲經典。次諸子。次詩賦。爲文翰。次兵書爲軍書。次數術爲陰陽。次方伎爲術藝。以向歆雖

云七畧實有六條。故別立圖譜一志。以全七限。其外又條七畧及二漢藝文志中經簿所闕之書。并方外之經佛經道經各爲一錄。雖繼七志之後。而不在其數。今所撰七錄。斟酌王劉。王以六藝之稱。不足標榜經目。改爲經典。今則從之。故序經典錄爲內篇第一。劉王並以衆史合於春秋。劉氏之世。史書甚寡。附見春秋。誠得其例。今衆家記傳。倍於經典。猶從此志。實爲繁蕪。且七畧詩賦不從六藝詩部。蓋由其書旣多。所以別爲一畧。今依擬斯例。分出衆史。序記傳錄爲內篇第二。諸子之稱。劉王並同。又劉有兵書畧。王以兵字淺薄。軍言深廣。故改兵爲軍。竊謂古有兵革兵。

戎治兵用兵之言。斯則武事之總名也。所以還改軍從兵。兵書既少。不足別錄。今附於子末。總以子兵爲稱。故序子兵錄爲內篇第三。王以詩賦之名。不兼餘制。故改爲文翰。竊以頃世文詞。總謂之集。變翰爲集。於名尤顯。故序文集錄爲內篇第四。王以數術之稱。有繁雜之嫌。故改爲陰陽。方伎之言。事無典據。又改爲藝術。竊以陰陽偏有所繫。不如數術之該通。術藝則濫六藝。與數術不逮。方伎之要顯。故還依劉氏。各守本名。但房中神仙。旣入仙道。醫經經方。不足別創。故合術伎之稱。以名一錄。爲內篇第五。王氏圖譜一志。劉畧所無。劉數術中。雖有歷譜。而與今譜有異。竊

以圖畫之篇宜從所圖爲部故隨其名題各附本錄譜既注記之類宜與史體相參故載於記傳之末自斯已上皆內篇也釋氏之教實被中土講說諷味方軌孔籍王氏雖載於篇而不在志限即理求事未是所安故序佛法錄爲外篇第一仙道之書由來尚矣劉氏神仙陳於方伎之末王氏道經書於七志之外今合序仙道錄爲外篇第二王則先道而後佛今則先佛而後道蓋所宗有不同亦由其教有淺深也凡內外兩篇合爲七錄天下之遺書祕記庶幾窮於是矣有梁普通通四年歲維單闕仲春十有七日於建康禁中里宅始述此書通人平原劉杳從余遊因說其

事。杳有志積久。未獲操筆。聞余已先著鞭。欣然會意。凡所抄集。盡以相與。廣其聞見。實有力焉。斯亦康成之於傳釋。盡歸子慎之書也。

古今書最。

七畧書三十八種。六百三家。一萬三千二百一十九卷。

五百七十二家亡。三十一家存。

漢書藝文志書三十八種。五百九十六家。一萬三千三百六十九卷。

五百五十二家亡。四十四家存。

袁山松後漢藝文志書。

案此下當有脫文

八十七家亡。

晉中經簿四部書一千八百八十五部二萬九百三十五卷其中十六卷佛經書簿少二卷不詳所載多少。

一千一百一十九部亡。七百六十六部存。

晉元帝書目四部三百五袞三千一十四卷。

晉義熙四年祕閣四部目錄藤脫此文當

宋元嘉八年祕閣四部目錄一千五百六十四袞一萬四千五百八十二卷。

五十五袞四百三十八卷佛經。

宋元徽元年祕閣四部書目錄二千二十袞一

萬五千七十四卷。

齊永明元年祕閣四部目錄五千新足合二千三百三十二裘一萬八千一十卷。

梁天監四年文德正御四部及術數書目錄合二千九百六十八裘二萬三千一百六卷。

祕書丞殷鈞撰祕閣四部書少於文德書故不錄其數也。

新集七錄內外篇圖書凡五十五部六千二百八十八種八千五百四十七裘四萬四千五百二十六卷。

六千七十八種八千二百八十四裘四萬三

千六百二十四卷。經書二百三種。二百六十
三表。八百七十九卷。圖符。

內篇五錄。四十六部。三千四百五十三種。五千
四百九十三表。三萬七千九百八十三卷。

三千三百一十八種。五千三百六表。三萬七
千一百八卷。經書一百三十五種。一百八十
七表。七百七十五卷。圖也。

外篇二錄。九部。二千八百三十五種。三千五十
四表。六千五百二十八卷。

二千七百五十九種。五千九百七十八表。六
千四百三十四卷。經書七十六種。七十八表。

一百卷符圖

七錄目錄

經典錄內篇一

易部六十四種

案六十舊作本誤合九十六帙二字爲一也今改正

五百九十卷

尚書部二十七種二十八帙一百九十卷

詩部五十二種六十一帙三百九十八卷

禮部一百四十種二百一十一帙一千五百七

十卷

樂部五種五帙二十五卷

春秋部一百一十一種一百三十九帙一千一

百五十三卷

論語部五十一種五十二帙四百一十六卷
孝經部五十九種五十九帙一百四十四卷
小學部七十二種七十二帙三百一十三卷
右九部五百九十一種七百一十帙四千七百
一十卷

記傳錄內篇二

國史部二百一十六種五百九帙四千五百九
十六卷

注^歷部五十九種一百六十七帙一千二百二
十一卷

舊事部八十七種一百二十七帙一千三十八卷。

職官部八十一種一百四帙八百一卷。

儀典部八十種二百五十二帙二千二百五十六卷。

法制部四十七種九十五帙八百八十六卷。

偽史部二十六種二十七帙一百六十一卷。

雜傳部二百四十一種二百八十九帙一千四百四十六卷。

鬼神部二十九種三十四帙二百五卷。

土地部七十三種一百七十一帙八百六十九

卷。

譜狀部四十二種，四百二十三帙，一千六十四卷。

簿錄部三十六種，六十二帙，三百三十八卷，
右十二部，一千二十種，二千二百四十八帙，一
萬四千八百八十八卷。

子兵錄內篇三。

儒部六十六種，七十五帙，六百四十卷。

道部六十九種，七十六帙，四百三十一卷。

陰陽部一種，一帙，一卷。

法部十三種，十五帙，一百一十八卷。

名部九種九帙二十三卷

墨部四種四帙一十九卷

縱橫部二種二帙五卷

雜部五十七種二百九十七帙二千三百三十八卷

農部一種一帙三卷

小說部十種十二帙六十三卷

兵部五十八種六十一帙二百四十五卷

右一十一部二百九十種五百五十三帙三千

八百九十四卷

文集錄內篇四

楚辭部五種五帙二十七卷

別集部七百六十八種八百五十八帙六千四百九十七卷

總集部十六種六十四帙六百四十九卷

雜文部二百七十三種四百五十一帙三千五百八十七卷

右四部一千四十二種一千三百七十五帙一萬七百五十五卷

術伎錄內篇五

天文部四十九種六十七帙五百二十八卷
緯讖部三十二種四十七帙二百五十四卷

①歷筭部五十種五十帙二百一十九卷

五行部八十四種九十三帙六百一十五卷

卜筮部五十種六十帙三百九十卷

雜占部十七種十七帙四十五卷

刑法部四十七種六十一帙三百七卷

醫經部八種八帙五十卷

經方部一百四十種一百八十帙一千二百五

十九卷

雜藝部十五種十八帙六十六卷

右十部五百五種六百六帙三千七百三十六

卷

案巴上內篇每錄總數多與每部下數不合外篇之仙道錄亦然皆宏明集傳寫之

誤也。今無以知爲孰，是仍其舊而錄之。

佛法錄三卷外篇一。

戒律部七十一種，八十八帙，三百二十九卷。

禪定部一百四種，一百八帙，一百七十六卷。

智慧部二千七十七種，二千一百九十帙，三千

六百七十七卷。

疑似部四十六種，四十六帙，六十卷。

論記部一百一十二種，一百六十四帙，一千一

百五十八卷。

右五部二千四百一十種，二千五百九十六帙。

五千四百卷。

仙道錄外篇二。

經戒部二百九十種。三百一十八帙。八百二十

八卷。

服餌部四十八種。五十二帙。一百六十七卷。

房中部十三種。十三帙。三十八卷。

符圖部七十種。七十六帙。一百三卷。

右四部四百二十五種。四百五十九帙。一千一

百三十八卷。

文字集畧一帙。三卷。序錄一卷。

正史刪繁十四帙。一百三十五卷。序錄一卷。

高隱傳一帙。十卷。序例一卷。

古今世代錄一帙七卷。

序錄二帙一十一卷。

雜文一帙十卷。

聲緯一帙一卷。

右七種二十一帙一百八十一卷。

案此數亦不合說見前

阮孝緒撰不足編諸前錄而載於此。

注補續漢書八志序

梁劉昭

臣昭曰昔司馬遷作史記爰建八書班固因廣是曰十志天人經緯帝政絃維區分源奧開廓著述創藏山之祕寶肇刊石之遐貫誠有繁於春秋亦自敏於改作至乎永平執簡東觀紀傳雖顯書志未聞推檢

舊記先有地理。張衡欲存炳發，未有成功。靈憲精遠，天文已煥。自蔡邕大宏鳴條，實多紹宣。協妙元卓，律歷以詳。承洽伯始，禮儀克舉。郊廟社稷，祭祀該明。輪駢冠章，車服贍列。於是應譙，纘其業。董巴襲其軌，司馬續書，總爲八志。律歷之篇，仍乎洪邕所構。車服之本，即依董蔡所立。儀祀得於往制，百官就乎故簿。並藉據前修，以濟一家者也。王教之要，國典之源，粲然畧備，可得而知矣。旣接繼班書，通其流貫，體裁淵深，雖難踰等序，致膚約有傷，懸越後之名史，弗能罷意。叔駿之書，是謂十典，矜緩殺青，竟亦不成。二子平業案平舊誤平今改二子司馬俱稱麗富，華轍亂亡，典

則偕泯雅言邃義於是俱絕沈松因循尤鮮功創時
改見句非更搜求加藝文以矯前棄書流品採自近
錄案書舊錯在流下今正流品與藝文偶句當指謝表書之百官志也初平永嘉圖籍
焚喪塵消煙滅焉識其限借南晉之新虛爲東漢之
故實是以學者亦無取焉范曄後漢良史誠跨衆氏
序或未周志遂全闕國史鴻曠須寄勤閑天才富博
猶俟改具若草昧厥始無相憑據窮其身世少能已
畢遷有承考之言固深資父之力太初以前班用馬
史十志所因實多往制升入校部出二十載續志昭
表以助其間成父述者夫何易哉況曄思雜風塵心
撓成毀弗克貞就豈以茲乎夫辭潤婉贍可得起改

覈求見事必應寫襲故序例所論備精與奪及語八
志頗褒其美雖出拔前羣歸相沿也又尋本書當作
禮樂志其天文五行百官車服爲名則同此外諸篇
不著紀傳律歷郡國必依往式璽遺書自序應徧作
諸志前漢有者悉欲備製卷中發論以正得失書雖
未明其大旨也曾臺雲構所闕過乎榱桷爲山霞高
不終踰乎一壘鬱絕斯作吁可痛哉徒懷纘緝理慚
鉤遠廼借舊志注以補之狹見寡陋匪同博遠及其
所值微得論列分爲三十卷以合范史求於齊工孰
曰文類比茲闕恨庶賢乎已昔褚先生補子長之削
少馬氏接孟堅之不畢相成之義古有之矣引彼先

志又何猜焉。而歲代逾邈，立言湮散，義存廣求，一隅未覲，兼鍾律之妙，素捐校讎，參（歷）算之微，有慚證辨。星候祕阻，圖緯藏嚴，是須甄明，每用疑畧。時或有見，頗邀旁遇，非覽正部，事乖詳密。今行禁止，（案行上舊衍令字今）

刪謂禁止圖緯也

此書外絕，其有疏漏，諒不足誚。

高僧傳序

梁釋慧皎

原夫至道沖漠，假蹄筌而後彰。（元）致幽凝，藉師保以成用。是由聖迹迭興，賢能異託，辯忠烈，孝慈以定名教之道。明詩書禮樂，以成風俗之訓。或忘功遺事，尚彼虛沖，或體任榮枯，重茲達命。而皆教但域中，功在近益。斯蓋漸染之方，未奧盡其神性。至若能仁之爲

訓也。考業果之幽微，則循復三世，言至理之高妙，則貫絕百靈。若夫啓十地以辯慧宗，顯二諦以詮智府。窮神盡性之旨，管一樞極之致。餘方亦猶羣流之歸巨壑，衆星之拱北辰。懋哉邈矣，信難得以言尚。至迺教滿三千，形遍六道。皆所以接引幽昏，爲大利益。而以淨穢異聞，昇墜殊見。故秋方先音形之奉，東國後見聞之益。雲龍表於夜明，風虎彰乎宵夢。洪風旣扇，大化斯融。自爾西域名僧，往往而至。或傳度經法，或教授禪道。或以異迹化人，或以神力拯物。自漢之梁，紀歷彌遠。世踐六代，年將五百。此土桑門，含章秀發。羣英閒出，迭有其人。衆家記錄，敘載各異。沙門法濟。

偏敘高逸一迹。沙門法安。但列志節一行。沙門僧寶。止命遊方一科。沙門法進。廼通撰論傳。而辭事闕畧。並皆互有繁簡。出沒成異。考之行事。未見其歸。宋臨川康王義慶宣驗記。及幽明錄。太原王珍冥祥記。彭城劉俊益部寺記。沙門曇宗京師寺記。太原王延秀感應傳。朱君台徵應傳。陶淵明搜神錄。並傍出諸僧。敘其風素。而皆是附見。亟多疎闕。齊竟陵文宣王三寶記傳。或稱佛史。或號僧錄。既三寶共敘。辭旨相關。混濫難求。更爲蕪昧。瑯琊王巾所撰僧史。意似該綜。而文體未足。沙門僧祐撰三藏記。止有三十餘僧。所無甚衆。中書郗景興。東山僧傳。治中張孝季。廬山僧

傳中書陸明霞沙門傳各競舉一方不通今古務存一善不及餘行逮於即時亦繼有作者然或褒讚之下過相揄揚或敘事之中空引辭費求之實理無的可稱或復嫌以繁廣刪減其事而抗迹之奇多所遺削謂出家之士處國賓王不應勵然自遠高蹈獨絕辭榮棄愛本以異俗爲賢若此而不論竟何所紀嘗以暇日遇覽羣作輒搜檢雜錄數十餘家及晉宋齊梁春秋書史秦趙燕涼荒朝僞_歷地理雜篇孤文片記并博諮故老廣訪先達校其有無取其同異始於漢明帝永平十年終至梁天監十八年凡四百五十三載二百五十七人又傍出附見者二百餘人開其

德業大爲十例。一曰譯經。二曰義解。三曰神異。四曰習禪。五曰明律。六曰遺身。七曰誦經。八曰興福。九曰經師。十曰唱導。然法流東土。蓋由傳譯之勲。或踰越沙險。汎漾洪波。皆忘形殉道。委命(宏)法震旦。開明一焉。是賴茲德可崇。故列之篇首。至若慧解開神。則道兼萬億。通感適化。則彊暴以綏。靖念安禪。則功德森茂。(宏)讚毗尼。則禁行清潔。忘形遺體。則矜吝革心。歌誦法言。則幽顯含慶。樹興福善。則遺像可傳。凡此八科。並以軌迹不同。化洽殊異。而皆德効四依。功在三業。故爲羣經之所稱美。衆聖之所褒述。及夫計覈源流。商榷取舍。皆列諸讚論。備之後文。而論所著辭。微

異恒體。始標大意。類猶前序。未辯時人。事同後議。若
閒施前後。如謂煩雜。故揔布一科之末。通稱爲論。其
轉讀宣唱。原出非遠。然而應機悟俗。實有偏功。故齊
宋雜記。咸條列秀者。今之所取。必其製用超絕。及有
一介通感。迺編之傳末。如或異者。非所存焉。凡十科
所敘。皆散在衆記。今止刪聚一處。故述而無作。俾夫
披覽於一本之內。可兼諸要。其有繁辭虛讚。或德不
及稱者。一皆省畧。故述六代賢異。止爲十三卷。并序
錄合十四軸。號曰高僧傳。自前代所撰。多曰名僧。然
名者。本實之賓也。若實行潛光。則高而不名。寡德適
時。則名而不高。名而不高。本非所紀。高而不名。則備

今錄故省名音。代以高字。其閒草創。或有遺逸。今此十四卷。備讚論者。意以爲定。如未隱括。覽者詳焉。梁會稽嘉祥寺沙門慧皎撰。四庫書未錄。梁高僧傳。故此序不傳。

虎丘山序

陳顧野王

夫少室作鎮。以峻極而標奇。太華神掌。以削成而稱貴。若茲山者。高不概雲。深無藏影。卑非培塿。淺異棘林。秀壁數尋。被杜蘭與苔蘚。椿枝十仞。挂藤葛與懸蘿。曲澗潺湲。修篁蔭映。路若絕而復通。石將頽而更綴。抑巨麗之名山。信大吳之勝壤。若乃九功六義之興。依永和聲之製。志由心作。情以詞宣。形言諧於韶夏。成文暢於鐘律。由來尚矣。未有登高能賦。而韜斐

麗之章。入谷忘歸。而忽鏗鏘之節。故惣轡齊鑣。競雕蟲於山水。雲合霧集。爭歌頌於林泉。於時風清邃谷。景麗修巒。蘭佩堪紉。胡繩可索。林花翻灑。作颺颺於蘭皋。山禽轉響。時弄聲於喬木。班草班荆。坐蟠石之上。濯纓濯足。就滄波之水。傾縹窵而酌旨酒。翦綠葉而賦新詩。肅爾若與三徑齊蹤。踴然似共九成借韻。盛矣哉。聊述時事。寄之翰墨。

侍中沈府君集序

陳劉師知

陳亢有云。趨庭學詩。又聞君子。毛萇亦曰。登高能賦。可爲大夫。言其善觀民風。則與圖王政。若沈恭子者。斯乃當世賢焉。至如敦厚之詞。足以吟詠情性。身之

文也。貞固之節，可以宣被股肱，邦之光也。然此者，君
之小道，猶曰餘行，何則？德之所本，教之所由，實乃孝
篤天倫，義感殊類，有美於斯。鬱爲高士，則余與夫子
故所謂世親者歟，亦所謂友益者歟。疇昔一面，竭來
二紀，自揔角而接清塵，蒙長者之嘉醕，屯險驟更歡
娛，中阻班超旣反，盛憲猶存，春秋美景，朝遊夕宴，酒
酣得意，賦詩聯章，顧余不肖，齒義懸絕，降德忘年，交
情彌至，增榮廣價，知己難忘。南浦之送，未淹北邙之
辭，仍及於時，屬有烽燧，方勤帷屨，遂使褐裘莫計，寶
劍無追，痛此生芻，同茲宿草，九原方遠，百身寧贖，若
乃帳懸秋月，一鴈孤飛，花落春風，數鷺爭弄，伯牙之

絃寂寥長絕。山陽之管。惆悵徒聞。夫盛烈清徽。便傳乎帝載。遺文餘論。被在乎民謠者。斯所以沒而猶彰。死且不朽。今乃撰西還所著文章。名爲後集。

案隋書經籍志

陳侍中沈炯前集七卷。陳沈炯後集十三卷。恭子炯謚也。西還謂自西魏還耳。事詳陳書本傳。

塞上公亭詩序

後魏高允

延和三年。余赴京師。發石門北行。失道路。寓宿代之快馬亭。其俗云。古塞上公所遺之邑也。曰公有良馬。案此下有缺文因以命之。此其所遺也。負長城面南山。臯澤帶其側。涌波灌其前。停駢策以流目。抱遺風以依然。仰德音於在昔。遂揮毫以寄言。代人云。塞上公姓李。代之李氏。並其後也。

水經注序

後魏酈道元

易稱天以一生水。故氣微於北方。而爲物之先也。元中記曰。天下之多者水也。浮天載地。高下無所不至。萬物無所不潤。及其氣流。屈石精薄。膚寸不崇。朝而澤。合靈宇者。神莫與並矣。是以達者莫能測其淵沖。而盡其鴻深也。昔大禹記著山海。周而不備。地理志其所錄。簡而不周。尚書本紀。與職方俱畧。都賦所述。裁不宣意。水經雖粗。綴津緒。又闕傍通。所謂各言其志。而罕能備其宣導者矣。今尋圖訪蹟者。極聆川域之說。而涉土遊方者。寡能達其津照。蹤髣髴前聞。不能不猶深屏營也。余少無尋山之趣。長違問津之性。

識絕深經道淪要博進無訪一知二之機退無觀隅
反三之慧獨學無聞古人傷其孤陋捐喪辭書達士
嗟其面牆默室求深閉舟問遠故亦難矣然毫管闕
天歷筩時昭飲河酌海從性斯畢竊以多暇空傾歲
月輒述水經布廣前文大傳曰大川相閒小川相屬
東歸於海脈其枝流之吐納診其沿路之所躔訪瀆
搜渠緝而綴之經有繆誤者考以附正文所不載非
經水常源者不在記注之限但絲古芒昧華戎代襲
郭邑空傾川流戕改殊名異目世乃不同川渠隱顯
書圖自貿或亂流而攝詭號或直絕而生通稱枉渚
交竒洄湍決復躔絡枝煩條貫系夥十二經通尚或

難言。輕流細漾。固難辨究。正可自獻逕見之心。備陳輿徒之說。其所不知。蓋闕如也。所以撰證本經。附其枝要者。庶備忘誤之矜。求其尋省之易。

五行大義序

隋蕭吉

夫五行者。蓋造化之根源。人倫之資始。萬品稟其變。易百靈因其感通。本乎陰陽。散乎精像。周竟天地。布極幽明。子午卯酉爲經緯。八風六律爲綱紀。故天有五度。以垂象。地有五材。以資用。人有五常。以表德。萬有森羅。以五爲度。過其五者。數則變焉。實資五氣。均和四序。孕育百品。陶鑄萬物。善則五德順行。三靈炳曜。惡則九功不革。六沴互興。原始要終。靡究萌兆。是

以聖人體於未肇。故設言以筌象。立象以顯事。事既懸有。可以象知。象則有滋。滋故生數。數則可紀。象則可形。可形可紀。故其理可假而知。可假而知。則龜筮是也。龜則爲象。故以日爲五行之元。筮則爲數。故以辰爲五行之主。若夫參辰伏見。日月盈虧。雷動虹出。雲行雨施。此天之象也。二十八舍。內外諸官。七曜三光。星分歲次。此天之數也。山川水陸。高下平汙。嶽鎮河通。風迴露蒸。此地之象也。八極四海。三江五湖。九州百郡。千里萬頃。此地之數也。禮以節事。樂以和心。爵表章旗。刑用革善。此人之象也。百官以治。萬人以立。四教修文。七德閱武。此人之數也。因夫象數。故識

五行之始末。藉斯龜筮。乃辨陰陽之吉凶。是以事假象知。物從數立。吉每尋閱墳索。研窮經典。自羲農以來。迄於周漢。莫不以五行爲政治之本。以著龜爲善惡之先。所以傳云。天生五材。廢一不可。尚書曰。商王受命。案當是今商王受之錯誤狎侮五常。珍棄三政。故知得之者昌。失之者滅。昔中原喪亂。晉氏南遷。根本之書不足。枝條之學斯盛。虛談巧筆。競功於一時。碩學經邦。棄之於萬古。末代踵習。風軌遂成。雖復占候之術尚行。皆從左道之說。卜筮之法恒在。爻象之理莫分。月令靡依。時制必爽。失之毫髮。千里必差。水旱興而不辨。其由妖祥作而莫知其趣。非因形像罕徵窮者。觀其

謬惑歎其學人皆信其末而忘本。並舉其粗而漏細。古人有云。登山始見天高。臨壑方覺地厚。不聞先聖之道。無以知學者之大。況乃五行幽邃。安可斐然。今故博採經緯。搜窮簡牒。畧談大義。凡二十四段。別而分之。合四十段。二十四者。節數之氣。總四十者。五行之成數。始自釋名。終於蟲鳥。凡配五行。皆在茲義。庶幾使斯道不墜。知其始焉。若能治心靜志。研其微者。豈直怡神養性。保德全身。亦可弼諧庶政。利安萬有。斯故至人之所達也。昔人感物制經。吉今因事述義。異時而作。共軌殊途。嘆味道之不齊。求利物之一致。倚焉來哲。補其闕焉。上儀同三司。城陽郡開國公蕭

吉撰

續古文苑卷第十一

續古文苑卷第十二

賜進士及第授通奉大夫山東通省督糧道加三級孫星衍撰
序下

千金翼方敘

唐孫思邈

原夫神醫祕術至蹟參於道樞寶餌凝靈宏功浹於
真畛是知關籥元牝駐歷之效已深轡策天機全生
之德爲大稽炎農於紀錄資太乙而反營魂鏡軒后
於遺編事岐伯而宣藥力故能嘗味之績鬱騰天壤
診體之教播在神寰斯道由是濫觴時義肇基於此
亦有志其大者高密問紫文之術先其遠者伯陽流
玉冊之經擬斯壽於乾坤豈伊難老儔厥齡於龜鶴

詎可蠲疴。茲乃大道之真。以持身。抑斯之謂也。若其業濟含靈。命懸茲手。則有越人徹視於腑臟。秦和洞達於膏肓。仲景候色而驗眉。元化剗腸而湔胃。斯皆方軌疊跡。思韞入神之妙。極變探幽。精超絕代之巧。晉宋方技。既其無繼。齊梁醫術。曾何足云。若夫醫道之爲言。實惟意也。固以神存心手之際。意析毫芒之裏。當其情之所得。口不能言。數之所在。言不能諭。然則三部九候。乃經絡之樞機。氣少神餘。亦鍼刺之鈞軸。況乎良醫。則貴察聲色。神工則深究萌芽。心考錙銖。安假懸衡之驗。敏同機駭。曾無挂髮之淹。非天下之至精。其孰能與於此。是故先王鏤之於玉板。往聖

藏之以金匱。豈不以營壘至道。括囊貞頤者歟。予幼
智。蔑聞老成無已才。非公幹。夙嬰沈疾。德異士安。早
纏疴瘵。所以志學之歲。馳百金而徇經方。耄及之年。
竟三餘而勤藥餌。酌華公之錄帙。異術同窺。採葛生
之玉函。竒方畢綜。每以爲生者兩儀之大德。人者五
行之秀氣。氣化則人育。伊人稟氣而存。德合則生成。
是生由德而立。旣知生不再於我。人處物爲靈。可幸
蘊靈心闕。願我性源者。由檢抑神祕。幽求今古。撰方
一部。號曰千金。可以濟物攝生。可以窮微盡性。猶恐
岱山臨目。必昧秋毫之端。雷霆在耳。或遺玉石之響。
所以更撰方翼三十卷。共成一家之學。譬輓軌之相

濟運轉無涯。等羽翼之交。飛搏搖不測。矧夫易道深矣。孔宣繫十翼之辭。元文奧矣。陸續增元翼之說。或泐斯義。述此方名。以貽厥子孫。永爲家訓。雖未能譬言中庶。比潤上池。亦足以慕遠測深。稽門叩鍵者哉。倘經目於君子。庶知予之所志焉。序見本書因四庫書未收千金翼方之故載

秦府十八學士駕真圖序

武德四年。太宗皇帝爲太尉尚書令。雍州牧。左右衛大將軍。新命爲天策上將軍。位在三公上。乃銳意經籍。怡神藝學。開學館以待四方之士。乃降教曰。昔楚國尊賢存道。先於申穆。梁園接士。比德至於鄒枚。咸

以著範前修。垂光後烈。顧惟菲薄。多謝古人。高山仰止。能亡景慕。於是芳蘭始被。深冠蓋之游。丹桂初叢。廣旄俊之士。既而場苗蓋寡。空留皎皎之姿。喬木徒遷。終愧嚶嚶之友。所冀通人正訓。匡其闕如。側席亡倦於齊庭。開筵有慚於燕館。屬大行臺司勳郎中杜如晦。記室考功郎中房元齡。及于志寧。軍諮祭酒蘇世長。天策府記室薛收。文學褚亮。姚察。太學博士陸德明。孔穎達。主簿李元道。天策倉曹李守素。秦王記室虞世南。參軍蔡允恭。顏相時。著作郎記室許敬宗。薛元敬。太學助教蓋文達。典籤蘇勗等。或背淮而致千里。或通趙以欣三見。咸能垂裾邸第。委質藩維。或

宏禮度而成典則。暢詞學而洽風雅。優游幕府。是用嘉焉。宜可以守本官。兼文學館學士。及薛收卒。徵東虞州錄事參軍劉孝孫入館。尋選庫直閣。立本圖形貌。具題名字爵里。仍教文學。褚亮爲之像贊。勒成一卷。號十八學士。並給珍膳。分爲三番。更直宿於閣。每軍國務靜。參謁歸休。即引見。論討墳典。商畧前載。考其得失。或夜分而寢。又降以溫顏。禮數甚厚。由是天下歸心。竒傑之士。咸思自効。於時預入館者。時所傾慕。謂之登瀛洲云。

羣書治要序

唐魏徵

竊惟載籍之興。其來尚矣。左史右史。記事記言。皆所

以昭德塞違。勸善懲惡。故作而可紀。薰風揚乎百代。動而不法。烟戒垂乎千祀。是以歷觀前聖。撫運膺期。莫不懷乎御朽。自強不息。乾乾夕惕。義在茲乎。近古皇王。時有撰述。並皆包括天地。牢籠羣有。競採浮艷之詞。爭馳迂誕之說。騁末學之博聞。飾雕蟲之小技。流宕忘反。殊塗同致。雖辯周萬物。愈失司契之源。術總百端。字缺垂得一之旨。皇上以天縱之多才。運生知之獻思。性與道合。動妙幾神。元德潛通。化前王之所未。字缺化。損己利物。行列聖之所不能行。翰海龍庭之野。並爲郡國。扶桑若木之域。咸襲纓冕。天地成平。外內禔福。猶且爲而不恃。雖休勿休。俯協堯舜。式遵稽

古不察貌乎止水。將取鑒乎哲人。以爲六籍紛綸。百家踳駁。窮理盡性。則勞而少功。周覽汎觀。則博而寡要。故爰命臣等。採摭羣書。翦截淫放。光昭訓典。聖思所存。務乎政術。綴敘大畧。咸發神衷。雅致鉤深。規摹宏遠。網羅治體。事非一目。若乃欽明之后。屈己以救時。無道之君。樂身以亡國。或臨難而知懼。在危而獲安。或得志而驕居。業成以致敗者。莫不備其得失。以著爲君之難。其委質策名。立功樹惠。貞心直道。忘軀殉國。身殞百年之中。聲馳千載之外。或大奸巨猾。轉日迴天。社鼠城狐。反白仰黑。忠良由其放逐。邦國因以危亡者。咸亦述其終始。以顯爲臣不易。其立德立

言作訓垂範。爲綱爲紀。經天緯地。金聲玉振。騰實飛英。雅論徽猷。嘉言美事。可以宏獎名教。崇太平之基者。固亦片善不遺。將以丕顯皇極。至於母儀嬪則。懿后良妃。參徽猷於十亂。著深誠於辭輦。或傾城慙婦。亡國艷妻。候晨雞以先鳴。待舉烽而後笑者。時有所存。以備勸戒。爰自六經。訖乎諸子。上始五帝。下盡晉年。凡爲五帙。合五十卷。本求治要。故以治要爲名。但皇覽遍畧。隨方類聚。名目互顯。首尾淆亂。文義斷絕。尋究爲難。今之所撰。異乎先作。總立新名。各全舊體。欲令見本知末。原始要終。並棄彼春華。採茲秋實。一書之內。牙角無遺。一事之中。羽毛咸盡。用之當今。足

以鑒覽前古傳之來葉。可以貽厥孫謀。引而申之。觸類而長。蓋亦言之者無罪。聞之者足以自戒。庶宏茲九德。簡而易從。觀彼百王。不疾而速。崇巍巍之盛業。開蕩蕩之王道。可久可大之功。並天地之貞觀。日用日新之德。將金鏡以長懸。其目錄次第編之如左。祕書監鉅鹿男臣魏徵等奉勅撰。

玉歷通政經序

唐李淳風

夫天道昭然。畧無差忒。思測不至。占乃無驗。苟能窮神知化。視象玩占。何所不驗。歟。立占之法。本非襲休徵以塞咎。故世治國安。指象爲災。爲君所戒。以保邦於未危。世變國亂。推象探意。筮數究機。以處身於無

禍乃安中閒危凶中閒吉之謂也。通政經敷陳占條列例衆論非無指歸。蓋以天象垂變察乎時政。與上象意相符者爲陳。則占無不驗也。又豈特拘指。豈云虛言。爲一時之應歟。故明列二十八舍。列星三垣。天地所主之事。所司之分。陳其休咎。以五緯二曜。變犯入守。五相加臨。以取專應。故不書往者之占。亦同爲比類矣。

辨正論序

唐陳子良

蓋聞宣尼入夢。十翼之理克彰。伯陽出關。二篇之義爰著。或鉤深繫象。或探賾希夷。名言之所不宣。陰陽之所不測。猶能彌綸天地。包括鬼神。道無洽於大千。

言未超於域內。況乎法身圓寂。妙出有無。至理凝元。迹泯真俗。體絕三相。累盡七生。無心即心。非色爲色。無心即心。故能心斯心矣。無色爲色。故能色斯色矣。藤蛇於是併空。形名所以俱寂。筌蹄之外。豈可言乎。若夫西伯拘羑。遂顯精微。子長蠶室。卒成先志。故易曰。古之作易者。其有憂乎。論之興焉。良有以矣。法師俗姓陳氏。漢太丘長仲弓之後也。遠祖宦遊。播遷江左。近因江寓。又處襄州。隨世入關。從師請業。玉移荆岫。皎潔之性。彌彰桂徙幽林。芬芳之風。更遠。法師應真人之祥。稟黃裳之吉。內該三藏。外綜九流。旣善緣情。尤工體物。篇章婉麗。理致道華。郁郁閒縟。錦之文。

飄飄竦陵雲之氣。班賈金玉未可同年。潘陸江海寧
堪方駕。至如莊生墨生之學。黃子老子之書。三清三
洞之文。九府九仙之錄。登真隱決之祕。靈寶度命之
儀。吞若胷中。說猶指掌。加以舊習中觀。少蘊法華。旣
有聞持。比專著述。運思之外。汲引無疲。辨中觀則龍
樹可期。談自然則老莊非遠。於是四方雜沓。如歸長
者之園。七貴紛綸。若赴華陰之市。固以學侔安遠。才
邁肇生。實開士之棟梁。法城之墻塹者也。乃有道士
李仲卿。劉進喜等。並作庸文。誘毀正法。在俗人士。或
生邪信。法師愍其盲瞽。恐入泥黎。爰發大悲。遂製斯
論。可謂鼓茲法海。振彼詞峯。碧雞之銳。競馳黃馬之

駿爭驚莫不葉墜柯摧。雲銷霧捲。狀鴻爐之焚織羽。猶炎景之鑠輕冰。負勝之儔於斯可見。暫歸慈定。已破魔軍。聊奮慧力。即降愚賊。佛日於是重暉。法雲由其廣被。然法師所作詩賦。啓頌碑誄。章表。大乘教法。及破邪論等。三十餘卷。在世久傳。然此論凡八卷。十二篇。二百餘紙。窮釋老之教源。極品藻之名理。修述多年。仍未流布。昔秦孝公聽說帝而寐。聞談霸而興。陽春和寡。深可悲歎。但法師所述。內外兼該。恐好事後生。致有未喻。弟子潁川陳子良。近伸頂禮。從而問津。爛然溢目。若明月之入懷。寂乎應機。譬寶珠之矚物。既悟四衢之幻。便息百城之遊。於是啓所未聞。聊

爲注解。庶將來同好。幸詳其致焉。東宮學士陳子良撰。

大唐西域記序

唐張說

若夫玉毫流照。甘露灑於大千。金鏡揚輝。薰風被於有截。故知示現三界。粵稱天下之尊。光宅四表。式標域中之大。是以慧日淪影。像化之跡。東歸帝猷。宏闡大章之步。西極有慈恩道場。三藏法師諱元奘。俗姓陳氏。其先潁川人也。帝軒提象。控華渚而開源。大舜賓門。基歷山而聳構。三恪照於姬載。六竒光於漢祀。書奏而承朗月。遊道而聚德星。縱壑駢鱗。培風齊翼。世濟之美。鬱爲景胄。法師藉慶誕生。含和降德。結根

深而菴茂道源浚而靈長竒開之歲霞軒月舉聚沙
之年蘭薰桂馥洎乎成立藝殫墳素九臯載響五府
交辟以夫早悟真假夙照慈悲鏡真筌而延佇顧生
涯而永息而朱紱紫纓誠有界之徽網寶車丹枕實
出世之津途由是擯落塵滓言歸閑曠令兄長捷法
師釋門之棟幹者也擅龍象於身世挺鶖鷲於當年
朝野挹其風猷中外羨其聲彩旣而情深友愛道睦
天倫法師服勤請益分陰靡棄業光上首擢秀檀林
德契中庸騰芬蘭室抗策平道包九部而吞夢鼓枹
元津府四韋而小魯自茲徧遊談肆載移涼燠功旣
成矣能亦畢矣至於泰初日月燭耀靈臺子雲鞞悅

發揮神府。於是金文暫啓。佇秋駕而雲趨。玉柄纒撫。披霧市而波屬。若會斲輪之旨。猶知拜瑟之微。以瀉瓶之多聞。泛虛舟而獨遠。廼於輾轅之地。先摧鏃腹之誇。井絡之鄉。遽表浮杯之異。遠邇宗挹。爲之語曰。昔聞荀氏八龍。今見陳門雙驥。汝穎多竒士。誠哉此言。法師自幼迄長。遊心元理。名流先達。部執交馳。趨末忘本。撫華損實。遂有南北異學。是非紛糾。永言於此。良用憮然。或恐傳譯踳駁。未能筌究。欲窮香象之文。將罄龍宮之目。以絕倫之德。屬會昌之期。杖錫拂衣。第如遐境。於是背元灞而延望。指葱山而矯迹。川陸繇長。備嘗艱險。陋博望之非遠。嗤法顯之爲局。遊

踐之處。畢究方言。鑄求幽蹟。妙窮津會。於是詞發雌黃。飛英天竺。文傳貝葉。聿歸振旦。太宗文皇帝。金輪纂御。寶位居尊。載佇風徽。召見青蒲之上。廼睠通識。前膝黃屋之間。手詔綢繆。中使繼路。俯摛睿思。乃製三藏聖教序。凡七百八十言。今上昔在春闈。裁述聖記。凡五百七十九言。啓元妙之津。書揄揚之旨。蓋非道映雞林。譽光鷲嶽。豈能緬降神藻。以旌時秀。奉詔翻譯梵本。凡六百五十七部。具覽遐方異俗。絕壤殊風。土著之宜。人備之序。正朔所暨。聲教所覃。著大唐西域記。勒成一十二卷。編錄典奧。綜覈明審。立言不朽。其在茲焉。

此文明刻及聚珍板張燕公集俱不載從釋藏西域記錄出

集沙門不應拜俗等事序

唐王隱容

若夫雞渾起一龍聖開三飛義畫而踰繩泛軒文而越契端宸肅宸題尊玉宇之中班屣影裾光佐璿遠之右洪猷僅於禮樂秀業止於仁義亦有棲月籠霞之雋乘黿控鯉之英室慾螭姿茹丹茵於祕洞休糧蛻影吸青露於神丘終驚迅節之期徒侈浮歡之會豈若能仁撫運梵典開宗撰妙輪而曾擊俶寶騎而高引無生之生究生生於至蹟不滅之滅窮滅滅於幽源大千通智炬之輝盡億曳法蚤之響繁置弛網邁三呪於湯年苦浪堙洪軼四乘於夏序浸羣方而演澤濟悠劫而凝勳襲其儀者便屈紫皇之敬入其

道者。乃標黔首之尊。爲愛習之良資。作塵勞之依止。泊乎星潯。褫照日夢。飛光東徙。休屠之像。西漸罽賓之化。高人響係。敷妙說於琅函。茂德肩隨。暢真詞於貝牒。列辟以之崇奉。縣代以之欽尚。故符秦肅念。紆翠輦而同嬉。劉漢虔誠。下緇輿而致禮。惟有牛圖晚運。慧景曖而還明。龍緒衰辰。德水凝而復渙。我大唐澄飛日海。撲燎霞崑。延喜流禎。照華獻吉。財成紫宙。歲蕤改粒之勲。大庇蒼黎。茵藹遷裳之業。皇帝乘雷震極。鑠雷離宮。驅九駁以曾馳。駕八驥而橫厲。希風岨岫。啓鶴苑於神畿。仰化連河。構蜂臺於勝壤。敷攝誘之徽範。敦愛敬之洪謨。而以控國必俟於忠。莊家

實資於孝。爰命僧尼之輩。將申跪拜之儀。則裕凝懷。誅通規於會府。因心在念。捨輿頌於英寮。雖囂議相攻。各言其志。而宸襟歷選。遂率於常。特懷顧復之恩。仍致昇堂之拜。棕上人。冲宇淹穆。秀器韶雅。迴韻道通。峻調閑綽。身城浪謐。飛寶仞以衝天。意樹紛披。聳珍翹而拂漢。既洽九儒之要。還探二藏之微。緇徒擅其姦節。素侶挹其徽望。固以偶迹乘杯。侔聲飛錫者矣。將恐迷生曲學。近識孤聞。以過俗之權。爲會真之實。叩鳳閣而莫遂。叫鸞掖而無從。爰興護念之心。載啓發揮之作。粵自晉氏。迄於聖代。凡其議拜事。並集而錄之。總合三篇。分成六卷。爲之贊論。格以通途。縉

旨含鏘。雕文振彩。信所以激昂幽致。刷盪冥津者也。隱容業寡才踈。名蕪槩淺。坐煙郊而晦迹。泊風戶以棲神。徒以早尚花編。深崇葉篆。欣茲盛事。綴而序之。秋鱗輕光。匪助奔羲之曜。春蛙陋響。寧禪大樂之音。聊以宣情。詎云摘藻。與我同志。幸無誚焉。

唐尚書省郎官石記序

唐陳九言

夫上天垂象。北極著於文昌。先王建邦。南宮列爲會府。六官旣辯。四方是則。大總其綱。小持其要。禮樂刑政。於是乎達。而王道備矣。聖上至德光被。睿謀廣運。提大象以祐生人。躬無爲以風天下。三台淳曜。百辟承寧。動必有成。舉無遺策。年和俗厚。千載一時。而猶

搜擇茂異。網羅俊逸。野罄蘭芳。林殫松秀。盡在於周
行矣。夫尚書郎廿四司。凡六十一人。上應星緯。中比
神仙。咸擅國華。以成臺妙。修詞制天。一之議。伏奏爲
朝廷之容。信杞梓之藪澤。衣冠之領袖。頃朝榮初拜。
或省美中遷。昇降年名。各書廳壁。訛誤多矣。總載闕
如。非所以傳故實。示不朽者矣。今諸公六聯同事。三
署並時。排金門。轡華轂。鸞蹕鳳跂。肩隨武接。而不因
僉謀。補其闕典。其於義也。無乃太簡乎。左司郎中楊
公慎餘。於是合清論。創新規。徵追琢之良工。伐荆藍
之美石。刊刻爲記。建於都省之南榮。斷自開元廿九
年。咸刻名於次。且往者不可及。來者不可遺。非貴自

我蓋取隨時班位以序。昭其度也。豐約從宜。昭其儉也。俾夫金石長固。英華靡絕。不編班固之年。自然成表。未讀馬卿之賦。已辯同時。不其偉歟。開元廿九年歲次辛巳十月戊寅朔二日己卯建朝散大夫行右司員外郎陳九言撰吳都張旭書。

懷素自敘

懷素家長沙。幼而事佛。經禪之暇。頗好筆翰。然恨未能遠覩前人之竒迹。所見甚淺。遂擔笈杖錫。西遊上國。謁見當代名公。錯綜其事。遺編絕簡。往往遇之。豁然心胷。畧無疑滯。魚牋絹素。多所塵點。士大夫不以爲怪焉。顏刑部書家者流。精極筆法。水鏡之辨。許在

末行。又以尚書司勳郎盧象。小宗伯張正言。曾爲歌詩。故敘之曰。開士懷素。僧中之英。氣槩通疎。性靈歡暢。精心草聖。積有歲時。江嶺之間。其名大著。故吏部侍郎韋公陟。覩其筆力。勗以有成。今禮部侍郎張公。謂賞其不羈。引以遊處。兼好事者。同作歌以贊之。動盈卷軸。夫草藁之作。起於漢代。杜度崔瑗。始以妙聞。迨乎伯英。尤擅其美。羲獻茲降。虞陸相承。口訣手授。以至於吳郡張旭。長史雖姿性顛逸。超絕古今。而模楷精法。詳特爲真正。真卿早歲常接遊居。屢蒙激昂。教以筆法。資質劣弱。又嬰物務。不能懇習。迄以無成。追思一言。何可復得。忽見師作。縱橫不羣。迅疾駭人。

若還舊觀。向使師得親承善誘。亟挹規模。則入室之賓。捨子奚適。嗟歎不足。聊書此以冠諸篇首。其後繼作不絕。溢乎箱篋。其述形似。則有張禮部云。奔蛇走虺。勢入座驟。兩旋風聲滿堂。盧員外云。初疑輕煙淡古松。又似山開萬仞峯。王永州邕曰。寒猿飲水撼枯藤。壯士拔山伸勁鐵。朱處士遠云。筆下唯看激電流。字成只畏盤龍去。敘機格則有李御史丹云。昔張旭之作也。時人謂之張顛。今懷素之爲也。余實謂之狂僧。以狂繼顛。誰曰不可。張公又云。稽山賀老粗知名。吳郡張顛曾不易。許御史瓌云。志在新奇無定則。古瘦灘纏半無墨。醉來信手兩三行。醒後却書書不得。

戴御史叔倫云。心手相師。勢轉竒。詭形怪狀。翻合宜。人人欲問此中妙。懷素自言。初不知語。疾速則有竇。御史冀云。粉壁長廊。數十間。興來小豁。胷中氣。忽然絕叫三五聲。滿壁縱橫千萬字。戴公又云。馳豪驟墨。列奔駟。滿座失聲。看不及目。愚劣則有從父司勳員外郎吳興錢起詩云。遠錫無前信。孤雲寄太虛。狂來輕世界。醉裏得真如。皆辭旨激切。理識元奧。固非虛薄之所敢當。徒抱愧畏耳。時大曆丁巳冬十月廿又八日。

墨池編所載此文多不同今不具論

意林序

唐戴叔倫

三聖相師。大易光著。天地之功立矣。經傳之功生焉。

輔成一德。謂之六學。漢收秦業。其道方興。置講習訓授之官。明君臣父子之體。雖禮樂文缺。亦足以新忠孝仁義之大綱。至如曾孔荀孟之述。其蓋數百千家。皆發揮隱微。羽翼風教。祖儒尊道。持法正名。縱橫立權。變通其要。崇儉而有別。即農而得序。傍行而不流。小說去泥。而篇簡繁夥。罕備於士大夫之家。有梁潁川庾仲容。畧其要會。爲子書抄三十卷。將以廣搜採。異而立言之本。或不求全。大理評事扶風馬總。元會家。有子史。幼而集錄。探其旨趣。意必有歸。遂增損庾書。詳擇前體。裁成三軸。目曰意林。上以防守教之失。中以補比事之闕。下以佐屬文之緒。有疏通廣博。潔

淨符信之要。無僻放拘刻。讒蔽邪盪之患。君子曰。以少爲貴者。其是之謂乎。余元會之執友。故序而記之。貞元二年五月廿一日也。撫州刺史戴叔倫序。

岑嘉州集序

唐杜 確

自古文體變易多矣。梁簡文帝及庾肩吾之屬。始爲輕浮綺靡之詞。名曰宮體。自後沿襲。務於妖艷。謂之摛錦布繡焉。其有敦尚風格。頗存規正者。不復爲當時所重。諷諫比興。由是廢缺。物極則變。理之常也。聖唐受命。斲雕爲樸。開元之際。王綱復舉。淺薄之風。滋焉漸革。其時作者。凡十數輩。頗能以雅參麗。以古雜今。彬彬然。燦燦然。近建安之遺範矣。南陽岑公聲稱

老著公諱參代爲本州冠族曾太公文本大父長倩伯父義皆以學術德望官至台輔早歲孤貧能自砥礪徧覽史籍尤工綴文屬辭尚清用意尚切其有所得多入佳境迴拔孤秀出於常情每一篇絕筆則人傳寫雖閭里士庶戎夷蠻貊莫不諷誦吟習焉時議擬公於吳均何遜亦可謂精當矣天寶三載進士高第解褐右內率府兵曹參軍轉右威衛錄事參軍又遷大理評事兼監察御史充安西節度判官入爲右補闕頻上封章指述權佞改爲起居郎尋出虢州長史又改太子中允兼殿中侍御史充關西節度判官聖上潛龍藩邸總戎陝服參佐僚史皆一時之選

由是委公以書奏之任。入爲祠部考功二員外郎。轉
虞部庫部二正郎。又出爲嘉州刺史。副元帥相國杜
公鴻漸表公職方郎中兼侍御史。列於幕府。無幾使
罷。寓居於蜀。時四川節度因亂受職。本非朝旨。其部
統之內。文武衣冠。附會阿諛。以求自結。皆曰中原多
故。劍外小康。可以庇躬。無假向闕。公乃著招蜀客歸
一篇。申明逆順之理。折挫邪佞之計。有識者感歎。奸
謀者慚沮。播德澤於梁益。暢皇風於邛夔。旋軫有日。
犯軼俟時。吉往凶歸。嗚呼不祿。歲月逾邁。殆三十年。
嗣子佐公復纂前緒。亦以文采登名翰場。有公遺文
貯之筐篋。以確接通家餘烈。忝同聲後輩。受命編次。

因令繕錄區分類聚勒成八卷儻後之詞人有所觀覽亦由聆廣樂者識清商之韻遊名山者仰翠微之色足以瑩徹心府發揮高致焉京兆杜確序文見善州集各選家未載所述岑參官位甚詳足補史家未備故錄之

蜀絲州越王樓詩序

唐樊宗師

絲之城帝揭掀掀明威瀾石硝馳涪瀨左陵凌紅稊簪天地送行癸壬且掬跼踖於西北蟠紅顏青越王正故爲樓重軒疊飛門窻蒙傘蹇蹇予始登謂日明昏曉可窺其背雷電合風雲遇霜辛露酸星辰介行鬼神變化草木顯繡髻銜蓑芟皆可察極旣縈視其江帶又極視其土岡斷暴遠近山嶮嶮若閔之東皇

天原開見荆山。我其黃河澗。然爲曲直。淚雨落不可掩。因口其心曰。無害若其自果。星星過歸。尚悲不能解。重爲詩以釋。益不可顧。謂郡中諸君。能無有意。綴以華艷。其念蓄云。

南溪詩序

唐李渤

桂水過灘山。右滙陽江。又里餘。得南溪口。溪左屏列崖巘。鬪麗爭高。其孕翠曳煙。邈迤如畫。右連幽墅。園田雞犬。疑非人間。沂流數百步。至元巖。巖下有污壤沮洳。因導爲新泉。山有二洞。九室。西南曰白龍洞。橫透巽維。蛻骨如玉。西北曰元巖洞。曲通坎嶠。晴眺灘水。元巖之上曰丹室。白龍之右曰夕室。巽維北梯嶮

至仙窟。仙窟北又有石室。參差呀豁。延景宿雲。其洞室並乳溜凝化。詭勢竒狀。仰而察之。如傘如傘。如纒如纒。支撐如蓮。蔓藻井。左睨右瞰。似簾似幃。似松偃竹。裊似海蕩雲驚。其玉池(元)井。嵐窻飈戶。迴還交錯。迷不可紀。從夕室梁溪嚮郭四里而近。去松衢二百步而遙。余獲之自賀。若獲荆璆與虵珠焉。亦疑夫大舜遊此而忘歸矣。遂命發潛敞深。墜危宅勝。旣翼之以亭榭。又韻之以松竹。似讌方丈。如昇瑤臺。麗如也。暢如也。以溪在郡南。因目爲南溪。兼賦詩十韻以志之。(寶歷)二年三月七日序。成紀縣子李渤。

追昔遊集序

唐李紳

追昔遊。蓋歎逝。感時發於悽恨而作也。或長句。或五言。或雜言。或歌。或樂府。齊梁不一其辭。乃由牽思所屬耳。起梁漢。歸諫署。升翰苑。承恩遇。歌帝京風物。遭讒邪。播歷荆楚。涉湘沅。踰嶺嶠。止荒陬。抵高要。移九江。守滁陽。轉壽春。改賓客。留洛陽。廉會稽。過梅里。遭讒者再。賓客爲分務。歸東周。擢川守。鎮大梁。詞有所懷。興生於怨。故或隱顯。不嘗其言。冀知者於異時而已。開成戊午歲秋八月序。

贈鞏疇詩序

唐鄭薰

九華處士鞏疇。擅元言之要。通易老。其於淨名僧肇。尤精達。余在句溪時。重其能。車幣而致之。及到官舍。

再說易。一說老氏將兒姪輩執卷列坐而傳之。老氏
畢業而寇難作。與鞏各散去。不知其何如。存耶亡耶。
余既休居洛師。鎖扉獨靜。已卯冬十一月半。案已卯
蓋宣宗
大中也雪中。有客扣柴門。樵童視之。走復曰。鞏處士。
遽下榻開關。執手話艱苦。鞏背箬笠。草履杖靈壽。下
笠且哈笑曰。聞公恬養澹逸。不屑於榮悴。故以元來
助成之。升榻解笈。散四書。即易老淨肇也。明日講肇
論。階前多偃松。高桂。冰凍墮落。有琴瑟金石聲。理致
明妙。神骨超爽。自謂一時之遇。日與故人爲徒。又意
此樂之難偕也。遂成二十韻贈之。

松陵集序

唐皮日休

詩有六義。其一曰比。比者，定物之情狀也。則必謂之才。才之備者，於聖爲六藝。在賢爲聲詩。噫，春秋之後，頌聲亡寢，降及漢氏，詩道荐作。然二雅之風，委而不興矣。在詩有三言、四言、五言、六言、七言、九言之作。三言者曰：振振鷺，鷺于飛。是也。五言者曰：誰謂雀無角，何以穿我屋。是也。六言者曰：我姑酌彼金罍。是也。七言者曰：交交黃鳥，止于桑。是也。九言者曰：洄酌彼行潦，挹彼注兹。是也。蓋古詩率以四言爲本，而漢氏方以五言、七言爲之也。其句亦出於周詩。五言者，李陵曰：攜手上河梁。是也。七言者，漢武曰：日月星辰和四時是也。爾後盛於建安。建安以降，江左君臣，得以浮

艷之。然詩之六義微矣。逮及吾唐開元之世。易其體
爲律焉。始切於儷偶。拘於聲勢。然詩云。覯憫旣多。受
侮不少。其對也工矣。堯典曰。聲依永。律和聲。其爲律
也甚矣。由漢及唐。詩之道盡矣。吾又不知千祀之後。
詩之道止於斯而已耶。後有變而作者。余不得以知
之。夫才之備者。猶天地之氣乎。氣者止乎一也。分而
爲四時。其爲春。則煦枯發枿。如育如護。百蘄融洽。酣
人肌骨。其爲夏。則赫曦朝升。天地如窰。草焦木渴。若
燎毛髮。其爲秋。則涼颼高瞥。若露天骨。景爽夕清。神
不蔽形。其爲冬。則霜陳一捷。萬物皆瘁。雲沮日慘。若
憚天責。夫如是。豈拘於一哉。亦變之而已。人之有才

者不變則已。苟變之，豈異於是乎？故才之用也，廣之爲滄溟，細之爲溝竇，高之爲山嶽，碎之爲瓦礫，美之爲西子，惡之爲敦洽，壯之爲武賁，弱之爲處女，大則八荒之外不可窮，小則一毫之末不可見，苟其才如是，復能善用之，則庖丁之牛，扁之輪，郢之斤，不足謂其神解也。噫！古之士窮達必形於歌詠，苟欲見乎志，非文不能宣也。於是爲其詞，詞之作固不能獨善，必須人以成之。昔周公爲詩以貽成王，吉甫作誦以贈申伯，詩之酬贈其來尚矣。後每爲詩必多以斯爲事。咸通七年，今兵部令狐員外在淮南，今中書舍人宏農公守毘陵，日休皆以詞獲幸，悉蒙以所製命之和。

各盈編軸。亦有名其首者。十年。大司諫清河公出牧於吳。日休爲郡從事。居一月。有進士陸龜蒙字魯望者。以其業見造。凡數編。其才之變。眞天地之氣也。近代稱溫飛卿李義山爲之最。俾陸生參之。未知其孰爲之後先也。太元曰。稽其門。闢其戶。眼其鍵。然後乃應。況其不者乎。余遂以詞誘之。果復之不移刻。由是風雨晦冥。蓬蒿翳蒼。未嘗不以其應而爲事。苟其詞之來。食則輟之。而自飫。寢則聞之。而必驚。凡一年。爲往體各九十三首。今體各一百九十三首。雜體各三十八首。聯句問答十有八篇。在其外。合之凡六百五十八首。南陽廣文潤卿隴西侍御德師。或旅泊之際。

善其所爲。皆以詞致師。詞之不多。去之速也。大司諫清河公有作。或命之和。亦著焉。其餘則吳中名士。又得三十首。除詩外。有序十九首。總錄之。得十通。載詩六百八十五首。漢書曰。古者諸侯卿大夫交接鄰國。以微言相感。當揖讓之時。必稱詩以喻其志。蓋以別賢不肖也。余之與生。道義志氣窮達是非。莫不見於。是。士君子或爲之覽。賢不肖可不別乎哉。噫。古之將有交綏而退者。今生之於余。豈是耶。生旣編其詞。請於余曰。爾有文。當爲我序。詩道兼十通。以名之。目休曰。諾。由是爲之序。松江吳之望也。別名曰松陵。請目之曰松陵集。前進士皮日休撰。

校定焦贛易林序

宋黃伯思

承議郎行秘書省校書郎臣黃某所校讎中焦延壽
易林定著十六篇篇中或字誤以快爲決以羊爲年
如此者衆校讎已定又若喜或爲嘉鶴或爲鵲義可
兩存皆並著可繕寫焦延壽者字贛梁人以好學得
幸梁王王共其資用令極意學學成爲郡吏察舉補
小黃令以候伺先知盜盜不得發舉最當遷吏民上
書願留詔許增秩卒於小黃其說長於災變以授京
房又著易林十六篇其法每卦變而之六十四爲林
凡三千八百世臣謂延壽之法凡筮得某卦之某卦
則觀其所之卦林以占吉凶或卦爻不發則但觀本

卦林詞。初未嘗分四時節候。至於漢書京房傳。所謂分六十四卦更直日用事者。蓋爻主一日。六十卦當三百六十日。餘四卦爲監司。此法但以風雨寒溫爲候。而占灾變耳。若房封事。所謂辛酉太陽精明。丙戌蒙氣復起之類。孟康注之甚詳。此自延壽占灾祥之一法。非關易筮也。後世昧者弗悟。乃合二術而一之。而於直日卦中求所得卦。以考人之吉凶。謬託燕薊士之祕法。豈不誤甚歟。蓋直日之法。分至外餘日。惟一爻用事。而易林變卦。則非止一爻也。乃知林自林。直日灾祥之法。自直日灾祥之法。二者雖皆本於易。同出於焦贛。而初未嘗一其用也。又本朝有王佖者。

於雍熙二年春遇異人爲筮得觀之賁其林有西去
華山游子爲患之語乃贛易觀中賁林也若以直日
之法用之觀及賁乃白露之卦非春所宜用不當於
觀中求之然其後事應甚著異人之占固不應誤是
知直日之說非可用於筮占也章章矣後之觀者不
可以不辯延壽所著雖卜筮之書出於陰陽家流然
當西漢中葉去三代未遠文辭澹雅頗有可觀覽謹
弟錄上。

校定師春書序

宋黃伯思

承議郎行祕書省校書郎臣黃某所校讎中師春五
篇以相校除複重定著三篇篇中或誤以夢爲曹以

放爲依。如此類者衆，頗擄皆已定，可繕寫。案晉太康二年，汲郡民不準盜發魏襄王冢，得古竹書凡七十五篇。晉征南將軍杜預云：別有一弓，純集左氏傳卜筮事。上下次第及其文義，皆與左傳同名，曰師春。師春似是鈔集人名也。今觀中祕所藏師春，乃與預說全異。預云純集卜筮事，而此乃記諸國世次及十二公歲星所在，并律呂謚法等。末乃書易象變卦，又非專載左氏傳卜筮事。繇是知此非預所見師春之全也。然預記汲冢它書中，有易陰陽說，而無彖繫，又有紀年記三代并晉魏事，疑今師春蓋後人雜鈔紀年篇耳。然預云紀年起自夏商周，而此自唐虞以降皆

錄之。預云紀年皆三代王事，無諸國別，而此皆有諸國。預云紀年特記晉國起殤叔，次文侯，昭侯，而此記晉國卅次自唐叔始，是三者又與紀年異矣。及觀其紀歲星事，有杜征南洞曉陰陽之語，繇是知此書亦西晉人集錄，而未必盡出汲冢也。然臣近考辨祕閣古寶器，有宋公緜餗鼎，稽之此書，繇乃宋景公名，與鼎銘合，而太史公記及它書皆弗同。繇是知此書尚多古事，可備考證，固不可廢云。謹弟錄上。

輿地紀勝序

宋王象之

世之言地理者尚矣。郡縣有志，九域有志，寰宇有記，輿地有記，或圖兩界之山河，或紀歷代之疆域，其書

不爲不多。然不過辨古今，析同異，攷山川之形勢，稽南北之離合，資遊談而誇辯博，則有之矣。至若收拾山川之精華，以借助於筆端，取之無禁，用之不竭，使騷人才士，於一寓目之頃，而山川俱若効竒於左右，則未見其書。此紀勝之編，所以不得不作也。余少侍先君，宦遊四方，江淮荆閩靡國不到，獨恨未能執簡操牘，以紀其勝。及仲兄行甫西至錦城，而叔兄中甫北趨武興，南渡渝瀘，歸來道梁益事，皆袞袞可聽。然求西州圖記於篋中，藏未能一二，雖口以傳授，而猶恐異時無所據依也。余因暇日，搜括天下地理之書，及諸郡圖經，參訂會粹，每郡自爲一編，以郡之因革。

見之編首。而諸邑次之。郡之風俗又次之。其他如山川之英華。人物之竒傑。吏治之循良。方言之異聞。故老之傳記。與夫詩章文翰之關於風土者。皆附見焉。東南十六路。則倣范蔚宗郡國志條例。以在所爲首。而西北諸郡。亦次第編集。第書品浩繁。非一家所有。隨假隨閱。故編次之序。未能盡歸律度。然而一郡名物。亦庶幾開卷而盡得之。則回視諸書。似未爲贅也。或者又曰。昔太史公方行天下。上會稽。探禹穴。歷覽山川竒傑之氣。以爲著書立言之助。先儒至欲効子長之遊。而後始學其爲文。今子乃合天下之書。不出戶牖。而欲名山大川。若躬履焉。於子長之遊。未免有

戾乎。余因自笑曰。昔子長因遊而得作書之趣。余乃因書而得山川之趣。其迹雖不同。然亦未可盡以迹拘也。當從識者而問之。嘉定辛巳孟夏東陽王象之謹序。

此書四庫未錄故載其序

漢制考序

宋王應麟

漢制載於史者。先儒攷之詳矣。其見他書者。未之攷也。嘗謂法始乎伏羲而成乎堯。三代損益。至周大備。夫子從周與從先進之言。所謂百世可知者。其法著於春秋。東遷之初。先王典章。槩有存者。義和桓鬯之賚。王命猶重也。司徒緇衣之美。王官猶賢也。祭仲論京不度。過制之城。猶未衆也。無駭卒。始請族。世官之

敝猶未遠也。泰山有祊，則巡守之蹟猶可復也。九宗五正有後，則封建之制猶可尋也。師服之言建國，臧僖伯之諫觀魚，則據經守古之士猶多也。春秋何爲而作乎？宰咺歸賵，天衷民彛，大泯亂，春秋所以始歟。於獻六羽於稅畝，皆曰初於丘甲於三軍，皆曰作於南門於雉門及兩觀，皆曰新作。夫子蓋傷之也。秦作西時，臚於郊祀，魯惠公請郊禘，史角實往而祀禮始僭矣。其後齊作內政而兵制變，晉作爰田而田制變，晉作執秩而官制變，鄭鑄刑書而刑制變，大夫奏肆夏，季氏旅泰山，晉不知穀烝，魯不知尚羔，禮幾亡矣。然名卿大夫講聞故實，三代文獻藹如也，納鼎有諫。

觀社有諫。申繻名子之對。里革斷罟之規。御孫別男女之贄。管仲辭上卿之饗。柳下季之述祀典。單襄公之述夏令秩官。魏絳之述夏訓。虞箴。郟子能言紀官。州鳩能言七律。子革倚相能誦祈招懿戒。觀射父之陳祭祀。閔馬父之稱商頌。格言猷訓粲然可睹。齊虞人之守官。魯宗人之守禮。懍懍秋霜。夏日之嚴。劉子所云天地之中。子產所云天地之經。胥臣敬德之聚。晏子禮之善物。又皆識其大者。統紀相承。淵原相續。得夏時坤乾。見易象魯春秋。而知三代之禮。所以扶持於未墜者。豈一人之力哉。戰國去籍之餘。孟子言井地曰大畧。言班爵祿曰聞其畧。言諸侯喪禮曰未

學而嘗聞。若其宏綱丕式。因畧而致詳。推舊而爲新。聖人復起。不能易也。春秋大復古。譏變古。井牧變而阡陌。畿服變而郡縣。車乘變而步騎。什一變而箕歛。佩玉變而帶劔。簋席變而杯案。生民之理有窮。則聖王之法可改。古其不可復乎。是意唯太史公知之。於夏殷紀。舉孔子正夏時。善殷輅。卓然見損益之要。指於高帝紀。曰。朝以十月。車服黃屋左纁。蓋歎其襲秦也。漢之止於爲漢。自高帝之襲秦始。雖然。兩漢之制。文中子奚取焉。吁。三代遠矣。漢詔令人主自親其文。猶近於書之典誥也。郎衛執戟之用儒生。猶近於王宮之士庶子也。司徒府有百官朝會殿。以決大事。猶

近於外朝之詢衆也。牧守有子孫，郡國有辟舉，庶幾建侯之舊，丞相進見，御坐爲起，在輿爲下，庶幾敬臣之意。三老掌教化，孝悌力田置常員，鄉遂之流風遺韻，亦閒見焉。是之取爾。君子尚論古之人，以爲漢去古未遠，諸儒佔畢訓故之學，雖未盡識三代舊典，而以漢制證遺經，猶幸有傳注在也。冕服車旗彝器之類，多以叔孫通禮器制度爲據，其所臆度，無以名之，則謂若今某物，及唐儒爲疏義，又謂去漢久遠，唯漢法亦不可攷。蓋自西晉板蕩之後，見聞放失，習俗流敗，漢世之名物，稱謂知者鮮焉。況帝王制作之法象，意義乎。此漢制之僅存於傳注者，不可忽不之攷也。

愚少嘗有聞老弗敢墜。因紬次爲編。以俟後之君子。自流遡原三代之禮。庶乎其可識矣。辛巳夏五子王子序。

金石錄後序

宋李易安

右金石錄三十卷者何。趙侯德父所著書也。取上自三代。下迄五季。鍾鼎甌鬲盤匱尊敦之款識。豐碑大碣。顯人晦士之事蹟。凡見於金石刻者二千卷。皆是正譌謬。去取褒貶。上足以合聖人之道。下足以訂史氏之失者。皆載之。可謂多矣。嗚呼。自王播元載之禍。書畫與胡椒無異。長輿元凱之病。錢癖與傳癖何殊。名雖不同。其惑一也。余建中辛巳。始歸趙氏。時先君

作禮部員外郎。丞相時作吏部侍郎。侯年二十一。在太學作學生。趙李族寒。素貧儉。每朔望謁告出。質衣取半千錢。步入相國寺。市碑文果實歸。相對展玩。咀嚼。自謂葛天氏之民也。後二年。出仕宦。便有飯蔬衣練。窮遐方絕域。盡天下古文奇字之志。日就月將。漸益堆積。丞相居政府。親舊或在館閣。多有亡詩逸史。魯壁汲冢所未見之書。遂盡力傳寫。浸覺有味。不能自己。後或見古今名人書畫。三代奇器。亦復脫衣市易。嘗記崇寧閒。有人持徐熙牡丹圖。求錢二十萬。當時雖貴家子弟。求二十萬錢。豈易得耶。留信宿。計無所出而還之。夫婦相向惋悵者數日。後屏居鄉里十

年仰取俯拾衣食有餘連守兩郡竭其俸入以事鉛
槩每獲一書即同共校勘整集籤題得書畫彝鼎亦
摩玩舒卷指摘疵病夜盡一燭爲率故能紙札精緻
字畫完整冠諸收書家余性偶強記每飯罷坐歸來
堂烹茶指堆積書史言某事在某書某卷第幾葉第
幾行以中否角勝負爲飲茶先後中即舉杯大笑至
茶傾覆懷中反不得飲而起甘心老是鄉矣故雖處
憂患困窮而志不屈收書旣成歸來堂起書庫大幘
簿甲乙置書冊如要講讀即請鑰上簿關出卷帙或
少損污必懲責楷完塗改不復向時之坦夷也是欲
求適意而反取膠慄余性不耐始謀食去重肉衣去

重采首無明珠翡翠之飾。室無塗金刺繡之具。遇書史百家字不刊闕。本不譌謬者。輒市之。儲作副本。自來家傳周易左氏傳。故兩家者流。文字最備。於是几案羅列枕藉。意會心謀。目往神授。樂在聲色。狗馬之上。至靖康丙午歲。侯守淄川。聞金人犯京師。四顧茫然。盈箱溢篋。且戀戀且悵悵。知其必不爲己物矣。建炎丁未春三月。奔太夫人喪南來。旣長物不能盡載。乃先去書之重大印本者。又去畫之多幅者。又去古器之無款識者。後又去書之監本者。畫之平常者。器之重大者。凡屢減去。尚載書十五車。至東海。連艫渡淮。又渡江。至建康。青州故第。尚鎖書冊什物。用屋十

餘閒。期明年春再具舟載之。十二月金人陷青州。凡所謂十餘屋者。已皆爲煨燼矣。建炎戊申。秋九月。侯起復。知建康府。己酉春三月罷。具舟上蕪湖。入姑孰。將卜居贛水上。夏五月至池陽。被旨知湖州。過闕上殿。遂駐家池陽。獨赴召。六月十三日。始負擔捨舟。坐岸上。葛衣岸巾。精神如虎。目光爛爛射人。望舟中告別。余意甚惡。呼曰。如傳聞城中緩急。奈何。戟手遙應曰。從衆。必不得已。先去輜重。次衣被。次書冊卷軸。次古器。獨所謂宗器者。可自負抱。與身俱存亡。勿忘也。遂馳馬去。塗中奔馳。冒大暑感疾。至行在。病瘧。七月末。書報卧病。余驚怛。念侯性素急。奈何。病瘧。或熱必

服寒藥疾可憂遂解舟下一日夜行三百里比至果
大服芫胡黃芩藥瘧且痢病危在膏肓余悲泣倉皇
不忍問後事八月十八日遂不起取筆作詩絕筆而
終殊無分香賣履之意葬畢余無所之朝廷已分遣
六宮又傳江當禁渡時猶有書二萬卷金石刻二千
卷器皿茵褥可符百客他長物稱是余又大病僅存
喘息事勢日迫念侯有妹壻任兵部侍郎從衛在洪
州遂遣二故吏先部送行李往投之冬十二月金人
陷洪州遂盡委棄所謂連艦渡江之書又散爲雲烟
矣獨餘少輕小卷軸書帖寫本李杜韓柳集世說鹽
鐵論漢唐石刻副本數十軸三代鼎彝十數事南唐

寫本書數篋。偶病中把玩。搬在卧內者。歸然獨存。上江旣不可往。又虜勢叵測。有弟遠。任勅局刪定官。遂往依之。到台。台守已遁。之剡出睦。又棄衣被。走黃巖。顧舟入海。奔行朝。時駐蹕章安。從御舟海道之温。又之越。庚戌十二月。放散百官。遂之衢。紹興辛亥春三月。復赴越。王子又赴杭。先侯疾亟時。有張飛卿學士。攜玉壺過視侯。便攜去。其實珉也。不知何人傳道。遂妄言有頒金之語。或傳亦有密論列者。余大惶怖。不敢言。亦不敢遂已。盡將家中所有銅器等物。欲赴外廷投進。到越已移。幸四明。不敢留家中。并寫本書寄剡。後官軍收叛卒。取去。聞盡入故李將軍家。所爲歸。

然獨存者。無慮十去五六矣。惟有書畫研墨。可五七
簾。更不忍置他所。常在卧榻下。手自開闔。在會稽卜
居士。民鍾氏舍。忽一夕。穴壁負五簾去。余悲慟不得
活。重立賞收贖。後二日。鄰人鍾復皓。出十八軸求賞。
故知其盜不遠矣。萬計求之。其餘遂牢不可出。今知
盡爲吳說。運使賤價得之。所謂歸然獨存者。乃十去
其七八。所有一二殘零。不成部帙書冊。三數種平平
書帖。猶復愛惜如護頭目。何愚也邪。今日忽開此書。
如見故人。因憶侯在東萊靜治堂。裝卷初就。芸籤縹
帶。束十卷作一帙。每日晚吏散。輒校勘二卷。跋題一
卷。此二千卷有題跋者五百二卷耳。今手澤如新。而

墓木已拱。悲夫。昔蕭繹江陵陷沒。不惜國亡。而毀裂
書畫。楊廣江都傾覆。不悲身死。而復取圖書。豈人性
之所著。生死不能忘歟。或者天意以余菲薄。不足以
享此尤物耶。抑亦死者有知。猶斤斤愛惜。不肯留人
閒耶。何得之艱。而失之易也。嗚呼。余自少陸機作賦
之二年。至過蘧瑗。知非之兩歲。三十四年之閒。憂患
得失。何其多也。然有有。必有無。有聚。必有散。乃理之
常。人亡弓。人得之。又胡足道。所以區區記其終始者。
亦欲爲後世好古博雅者之戒云。紹興二年。元默歲。
壯月朔甲寅。易安室題。此文舊本刪節。德州盧氏
刊金石錄。依元本增補。

吳越春秋序

元徐天祐

吳越古稱東南僻遠之邦。然當其盛疆，往往抗衡上國。黃池之會，夫差欲尊天子，自去其僭號稱子，以告令諸侯。及越既與吳，句踐大盟四國，以共輔王室。要其志皆歸於尊周，其知所天矣。孔子作春秋，雖小國猶錄而書之，而況以世言，則禹稷之裔，以地言，則會稽具區，其川其浸，周職方氏列爲九州之首，皆足以望天下，故記可闕而不傳乎？吳越春秋，趙曄所著，隋唐經籍志皆云十二卷，今存者十卷，殆非全書。二志又云：楊方撰吳越春秋，削繁原注：唐志作煩五卷，皇甫遵撰吳越春秋傳原注：隋志缺傳字十卷，此二書今人罕見。獨曄書行於世，曄傳在儒林中，觀其所作，乃不類漢文。按

邯鄲李氏圖書十志目亦謂楊方嘗刊削晁所爲書至皇甫遵遂合二家考正爲之傳註又按史記註有徐廣所引吳越春秋語而索隱以爲今無此語者他如文選註引季子見遺金事吳地記載闔廬時夷亭事及水經註嘗載越事數條類皆援據吳越春秋今晁本咸無其文亦無所謂傳註豈楊方所已刊削而皇甫所未攷正者耶晁書最先出東都時去古未甚遠晁又山陰人故綜述視他書所紀二國事爲詳取節焉可也其言上稽天時下測物變明微推遠僚若著蔡至於盛衰成敗之迹則彼己君臣反覆上下其議論種蠡諸大夫之謀迭用則霸子胥之諫一不聽

則亡。皆鑿鑿然可以勸戒萬世。豈獨爲是邦二千年
故實哉。晁書越舊嘗鈐梓。歲久不復存。汴梁劉侯來
治。越獎勵學校。蒐遺文。修墜典。乃輟義田廩。羨財重
刻於學。不鄙謏聞。屬以考訂。且命序其左端。夫越人
宜知越之故。則是舉也。於所闕不爲無補。遂不得辭。
厥旣刊。正疑譌。過不自量。復爲之音註。併考其與傳
記同異者。附見於下。而互存之。惜其閒文義。猶有滯
礙。不可訓知。不敢盡用臆見。更定。又無皇甫本可證。
姑從其舊。以俟後之君子考焉。侯名克昌。世大其字
云。郡人前進士徐天祐受之序。此序俗本俱缺據
元大德刊本錄之

續古文苑卷第十二

續古文苑卷第十三

賜進士及第授通奉大夫山東通省督糧道加三級孫星衍撰
頌

竇將軍北征頌

漢傅毅

逮漢祖之龍興。荷天符而用師。曜神武於幽冀。遇白
登之重圍。何獯鬻之桀虐。自弛放而不羈。哀昏戾之
習性。阻廣漠之荒垂。命竇侯之征討。躡衛霍之遺風。
奉聖皇之明策。奮無前之嚴鋒。探伊吾之城壁。蹈天
山而遙降。案此處藝文類聚未備引曝名烈於禹跡。
奉旗鼓而來旋。聖上嘉而褒寵。典禁旅之戎兵。內雍
容以詢謨。外折衝於無形。惟倜儻以宏遠。委精慮於

朝廷。

司隸校尉楊孟文石門頌并 漢王 升

惟以靈定位。川澤股躬。澤有所注。川有所通。余谷之川。其澤南隆。八方所達。益域爲充。高祖受命。興於漢中。道由子午。出散入秦。建定帝位。以漢詆焉。後以子午。鑿路並難。更隨圍谷。復通堂先。凡此四道。垓南尤艱。至於永平。其有四年。詔書開余。鑿通石門。中遭元二。西夷虐殘。橋梁斷絕。子午復脩。上則縣峻。屈曲流顛。下則入冥。廡寫輸淵。平阿淥泥。常蔭鮮晏。木石相距。利磨礪船。臨危槍礪。履尾心寒。空輿輕騎。遮尋弗前。惡虫齧狩。蛇蛭毒蟄。未秋截霜。稼苗夭殘。終年不

登匱餒之患。卑者楚惡。尊者弗安。愁苦之難。焉可具言。於是明知故司隸校尉楗爲武陽楊君。厥字孟文。深執忠伉。數上奏請。有司議駁。君遂執爭。百遼咸從。帝用是聽。廢子由斯。得其度經。功飭爾要。敞而晏平。清涼調和。烝二艾寧。至建和二年仲冬。上旬。漢中太守楗爲武陽王升。字稚紀。涉歷山道。推序本原。嘉君明知。美其仁賢。勒石頌德。以明厥勲。其辭曰。君德明二。炳煥彌光。刺過拾遺。厲清八荒。奉魁承杓。綏億衙疆。春宣聖日。秋貶若霜。無偏蕩二。真雅以方。寧靜烝庶。政與乾通。輔主匡君。循禮有常。咸曉地理。知世紀綱。言必忠義。匪石厥章。恢宏大節。謹而益明。

揆往卓今。謀合朝情。醜艱即安。有勲有榮。禹鑿龍門。君其繼縱。上順斗極。下荅川皇。自南自北。四海彼通。君子安樂。庶土悅雍。商人咸懷。農夫永同。春秋記異。今而紀功。垂流億載。世二嘆誦。

序曰。明哉仁智。豫識難易。原度天道。安危所歸。勤二竭誠。榮名休麗。

武都太守李翕西狹頌并序

漢武都太守漢陽阿陽李君諱翕字伯都。天姿明敏。敦詩悅禮。膺祿美厚。繼世郎吏。幼而宿衛。弱冠典城。有阿鄭之化。是呂三劄符守。致黃龍嘉禾。木連甘露之瑞。動順經古。先之呂博愛。陳之呂德義。示之呂好。

惡不肅而成不嚴而治。朝中惟靜威儀抑抑督郵部
職不出府門政約令行強不暴寡知不詐愚屬縣趨
教無對會之事傲外來庭面縛二千餘人年穀屢登
倉庾惟億百姓有蓄粟麥五錢郡西狹中道危難阻
峻緣崖俾閣兩山聳立隆崇造雲下有不測之谿阨
芒促迫財尙車騎進不能濟息不得駐數有顛覆實
隧之害過者創楚惴惴其慄君踐其險若涉淵水嘆
曰詩所謂如集于木如臨于谷斯其殆哉困其事則
爲設備今不圖之爲患無已勅衡官有秩李瑾掾仇
審回常繇道徒鑿燒破析刻石確嵬減高就埤平夷
正曲柙致土石堅固廣大可呂夜涉四方无雍行人

懽懽民歌德惠。穆如清風。乃刊斯石曰。

赫赫明后。柔嘉惟則。克長克君。牧守三國。三國清平。詠歌懿德。瑞降豐稔。民呂貨殖。威恩並隆。遠人賓服。鑿山浚瀆。路呂安直。繼禹之迹。亦世賴福。建寧四年六月十三日壬寅造。

漢故穀城長蕩陰令張君表頌并序

君諱遷字公方。陳留己吾人也。君之先出自有周。周宣王中興。有張仲以孝友爲行。披覽詩雅。煥知其祖。高帝龍興。有張良善用籌策。在帷幕之內。決勝負千里之外。析珪於留。文景之間。有張釋之。建忠弼之謨。帝遊上林。問禽狩所有。苑令不對。更問嗇夫。嗇夫事

對於是進嗇夫爲令。令退爲嗇夫。釋之議爲不可。苑
令有公卿之才。嗇夫喋喋小吏。非社稷之重。上從言。
孝武時有張騫。廣通風俗。開定畿寓。南苞八蠻。西羅
六戎。北震五狄。東勤九夷。荒遠旣殫。各貢所有。張是
輔漢。世載其德。爰旣且。金石文字記於君。蓋其纒纒。
纒戎鴻緒。牧守相係。不殞高問。孝弟於家。中蹇於朝。
治京氏易。聰麗擢畧。藝於從畋。紫吳玉搢金石存釋
也少爲郡吏。隱練職位。常在股肱。數爲從事。聲無細
聞。徵拜郎中。除穀城長。蚤月之務。不閉四門。臈正之
僚。休囚歸賀。八月筭民。不煩於鄉。隨就虛落。存恤高
年。路無拾遺。犁種宿野。黃巾初起。燒平城市。斯縣獨

全子賤孔蔑其道區別尚書五教君崇其寬詩云愷
悌君隆其恩東里潤色君垂其仁邵伯分陝君懿于
棠晉陽珮瑋西門帶弦君之體素能雙其勛流化八
基遷蕩陰令吏民頡頏隨送如雲周公東征西人怨
思奚斯讚魯考父頌殷前喆遺芳有功不書後無述
焉於是刊石豎表銘勒萬載三代以來雖遠猶近詩
云舊國其命惟新

於穆我君既敦既純雪白之性孝友之仁紀行來本
蘭生有芬克岐有兆綏御有勛利器不覲魚不出淵
國之良幹垂愛在民幣沛棠樹溫溫恭人乾道不繆
唯淑是親既多受祉永享南山干祿无疆子子孫孫

表 惟中平三年歲在攝提二月震節紀日

上旬陽氣厥析感思舊君故吏韋萌等僉然同聲僨石孫興刊石立表以示後昆共享天祚億載萬年

麒麟頌

吳薛綜

懿哉麒麟惟獸之伯政平覲景否則戢足德以衛身不布牙角屏營唐日帝堯保祿委體大吳以昭遐福天祚聖帝享茲萬國

又見藝文類聚少帝堯保祿二句享茲作永享

鳳頌

吳薛綜

猗與石磬金聲玉振先王搏拊以正五音百獸翔感儀鳳舞麟在昔堯舜斯磬乃臻宗廟致敬乃冒來顧贊揚聖德上下受祚

案詳文義當是磬頌今仍藝文類聚舊題云

黎樹頌

晉王 讚

太康十一年。黎樹四枝與中枝合生于囿。皇太子令侍中頌之。

嘉木時生。瑞我皇祚。修榦外揚。隆枝內附。翌翌皇儲。克光其敬。神啓其和。人隆其盛。降自元圃。合體連性。時惟令月。躬親北林。樂在同人。如蘭如金。木之期應。乃同其心。同心之生。啓自神明。在心斯動。於言斯形。先民有則。稱詩表情。惟永作歌。以休厥靈。

案隋書經籍志梁有

散騎侍郎王讚集五卷七

黃帝頌

晉牽 秀

邈矣軒轅。應天載靈。通幽遠覽。觀象設形。誕敷厥訓。

彝倫攸經。德從風流。化與雲征。皇猷允塞。地平天成。
爰登方岳。封禪勒成。紛然鳳舉。龍騰天清。違茲九土。
涉彼高冥。民斯攸慕。涕泗沾纓。遐而不墜。式頌德聲。

木連理頌

晉湛方生

相彼神奇。遠見禎祥。兩樹連柯。本枝俱昌。皇基增構。
靈祚維長。運隆周室。道均三王。丕顯奕世。國風載揚。

後漢史君頌

晉史 援

山嶽降精。川瀆耀靈。猗歟史氏。世濟其英。忠言允塞。
嘉猷有聲。從容變理。散誕飛纓。含香青瑣。敷奏丹庭。
有犯無隱。唯言是聽。王室斯賴。諸侯以寧。內侍帷幄。
外典專城。爲政以德。察獄以情。化俗草偃。溪谷風清。

金相玉質。不隕厥名。處溢不驕。居勞不憚。視險如夷。
忘身逐叛。駟頌美魯。青蒲安漢。執簡書憇。姦邪逃竄。
匪君之忠。孰能戡亂。在昔隆漢。姻婭皇家。唯帝念功。
爵命屢加。三台五鼎。駙馬奉車。腰佩兩印。綬帶雙綬。
何彼穠矣。常棣之華。如珪不玷。似玉無瑕。節之以禮。
儉而不奢。篤生我侯。英畧備舉。有藝有才。能文能武。
孝以奉親。忠惟衛主。赤眉始結。白波猶侮。執銳破堅。
斬馘滅虜。截彼長蛇。殲斯猾豎。策賞廟堂。書勲王府。
功成弗居。名立不取。簡在帝心。酬封祚土。厥土惟何。
在溧之澣。初食三千。卒封萬戶。葭莖揭揭。麀鹿麀麀。
禾役旆旆。原田膺膺。俯營川陸。魚鹽所聚。蝗飛火滅。

還珠去虎子民輯悅建茲城宇大厦眈眈聽政之所

祠堂石殿生靈攸處

字闕

春秋兮祭祠不阻

建康志云舊志後漢

史君崇墓在溧陽縣北三十里考證云崇為司空驃騎將軍青冀二州刺史贈溧陽侯使持節徐兗二州

刺史有神道碑在墓所晉永和八年立唐貞觀十四

年十八代孫越王府東閣祭酒常州長史仲謨題云

頌末大亂避地閩越碑壞再立其頌曰云云今考此未載援名故題之以補其闕

芍藥花頌

晉傅統妻

眈眈芍藥植此前庭晨潤甘露晝晞暘靈曾不踰時
荏苒繁茂綠葉青葱應期吐秀緗蕊攢挺素華菲敷
光譬朝日色艷芙蕖媛人是採以廁金翠發彼妖容
增此婉媚惟昔風人抗茲榮華聊用興思染翰作歌

案隋書經籍志梁有晉散騎常侍傅伉妻辛蕭集一卷亡統伉不同未知孰是

菊花頌

晉傅統妻

英英麗草稟氣靈和春茂翠葉秋曜金華布濩高原
蔓衍陵阿揚芳吐馥載芬載葩爰採爰拾投之醇酒
御於王公以介眉壽服之延年佩之黃耆文園賓客
乃用不朽

姜嫄頌

晉劉柔妻王氏

英英姜嫄實德之純肇承靈瑞武敏是遵誕育岐嶷
毗贊皇綸播殖之訓萬葉攸循案隋書經籍志梁有
晉劉柔妻王邵之集

十卷
亡

啓母塗山頌

晉劉柔妻王氏

塗山靜居。元朗悟幾。大禹至公。過門不歸。明此道訓。
孩允。是綏仁哲。以成永繫。天暉。

麒麟頌

晉西涼武昭王

一角圓蹄。行中規矩。游必擇地。翔而後處。不入陷阱。
不罹網罟。無德而至。爲之折股。

溫泉頌

魏元 萇

魏使持節散騎常侍都督離州諸軍事安西將軍離
州刺史松滋公河南元萇振興溫泉之頌并序
夫駕輕煙。勒麟鳳。駛及奔星。走攀流月。蟬變羽化之
民。食霞■之士。斯蓋有道存焉。固非人事之所覲。
覲至若泥行水驟。血食之夫。興沒自天。去來非已。寸

陰■於朝露百齡迅於滅電一物不諧則朏贅以生
庶事不康則風火以敗故聖王■百姓之多疹撰藥
石以濟之造化愍蒼生之鳩毒設甘餌以救之蓋溫
泉者乃自然之經方天地之元醫出於河渭之南泄
於麗山之下淵華玉澈■清數刃靈感超異峻極不
測無樵薪之爨而揚湯沸於楚鑊無公蔬之採而寒
暑調於夏鼎高塘之雲朝舞於水湄巫山之雨夕收
於淵際青林碧草含露而迺岸香風蕙色列■而環
渚於是左湯谷右濛汜南九江北瀚海千城萬國之
氓懷疾枕痾之■莫不宿糒而來賓療苦於斯水但
上無尺棟下無環堵悠悠君子我將安泊孤忝發軔

咸池分條紫漢道屬昇平弱年數仕既歷通顯朝望
已隆爰自常伯出居分陝地兼陸海之饒祿厚封君
之室而報天之効無聞卹民之譽安在每思傾■微
寒深責以爲斯泉天實登之而人畧未備廼翦山開
鄣因林構宇邃館來風清簷駐月望想煙霞遲羽衣
之或顧願言多士恕因茲以蕩穢廼作頌曰

皇皇上靈愍我蒼生泌彼溫泉于此麗川其水尅神
尅神尅聖濟世之醫救民之命其聖伊何排霜吐旭
其神伊何吞眚去毒無藉烟炭誰假樵木湛若虞淵
沸如湯谷東枕華山西拒咸陽連疇接畛墟落相望
彩林爭翠萊樹成行香風旦起文霞夕張陟彼麗山

望想千里。廼作高堂。鴻飛鳳起。三輔之英。五都之士。
慕我芳塵。爰居爰止。其德既首。其聲既遠。金華屑桂。
春山九轉。目放羣羊。手■■犬控鵠來。思俊我■堂。
而下闕

隴東王感孝頌 并序

北齊申嗣邕

惟夫德行之本。仁義之基。感洞幽明。擾馴禽獸。清音
帶冰而挺潔。素采映雪而流輝。根矩定於一丸。止吾
絕於三失。開府儀同三司尚書右僕射尚書左僕射
尚書令攝選新除。特進使持節齊州刺史隴東王胡
長仁。雌黃雅俗。雄飛戚里。入膺北斗。執柄端衡。出牧
東秦。揔條連率。未脫崔林之屣。聊帽賈宗之襜。視聽

經過訪詢耆舊。郭巨之墓。馬鬣交阡。孝子之堂。鳥翅
銜旨。君王愛竒好古。歷覽徘徊。妃息在傍。賓僚侍側。
躋疑秦鏡。炳煥存形。柱識荆珉。宗寥遺字。所以斂眉
長歎。念昔追遠。遂若羊公登峴。還同處墨。飲泉慨賢
勝之多弊。嗟至德而無紀。蘭溪儻不見松。穀城何以
知石。於時開府中兵參軍梁恭之。盛工篆隸。騎兵參
軍申嗣邕。微學摘藻。並應命旨。俱營頌筆。以大齊武
平元季正月廿二日。權輿雕瑩。表建庭宇。棟刻蒼文。
檐栽翠柏。庶令千葉之下。彌振金聲。九原之中。恒浮
玉樹。其詞曰。

天經地義。啟聖通神。重華曾閔。萊子樂春。時多美迹。

世有芳塵前漢逸士河內貞人分財雙季獨養壹親
客舍凶弭兒埋福臻穹隆感異旁薄貽珍懸車遽落
夜臺弗晨千齡俄古萬祀猶新朱驂紫蓋撫俗調民
高山達節景慕縈嘖式憑不死永播衣巾

華嶽頌并序

周万紐于瑾

易不云乎天險不可阨地險山川丘陵險之時義大
矣哉惟華山者於書爾雅謂之西嶽周官則爲豫州
之鎮下枕周秦之郊上應東井之宿俯臨汾射咫尺
荆梁盤紆截薛刻峭崢嶸干雲漢而孤秀屬江河而
峻峙巨靈䟽豁亢高掌於巖端削成辟立流黃河於
峴曲左分底柱見朝夕之揚波右綴終南眺連山之

無極顯仁藏用。蘊智含靈。鼓以雲雷。潤以風雨。信羣
帝之所休憇。衆神之所盼響。芝駕自此不歸。霓裳於
焉屢拂。豈止績羽爲衣。葺荷成蓋。化同毛女。客類園
公。每挹僊人之漿。昔停酒母之騎。坐石白而穿陷。乘
白鹿以遊嬉。寥宗忽恍。往而不反者也。至如芳年華
月。零斂雲開。谷包得一。河經千里。聳翠嶠於紫微。挺
高峯於天漢。暫駐羲和之騫。能挂恒娥之驂。積醴成
池。泓澄蠶岫。聚卉爲髮。藿葦生焉。庭鱸夜萃。必歸伯
起之學。苦霧晨興。非獸公超之市。若乃柴類方明之
壇。望仙集靈之觀。休牛散馬之地。反僻祖龍之辭。有
祈必感。無請不遂。保乂我金方。裁成我三海。振素祇

以統億兆。肅秋節以衛蒼生。國荷其慶。民賴其福。前代曾創祠宇。兼植柏樹。歷年茲多。榱棟崩褫。樹亦往往殘缺。太祖文皇帝。固天攸縱。誕膺符命。道邁三分。功超九合。將欲寧一區寓。納之仁壽。而餘霽尚梗。燕趙未并。治戎河上。志圖廓掃。每以講閱之暇。親履陰晉。眷言舊所。良用依然。以大統六年歲在旃蒙。乃謁諸天子。命車騎大將軍儀同三司西兗州大中正華山郡守城陽縣開國公恒農楊子昕。經始締構。別更列植青松二千餘根。堂廟顯敞。房廊肅穆。芬哉薜席。赫矣神居。桂酒徐斟。清哥緩節。無復霑濡之事。豈有顛沛之容。暨水德告終。蒼精肇運。獄訟知歸。人神胥

悅皇帝負宸君臨宸居馭朽執玉帛以朝萬國叩金
繩而享百靈睿智之所牢籠英威之所彈壓日月之
所昭晉舟車之所被通莫不乘毳駕風梯山航海重
譯屈膝請吏勤王太師大家宰晉國公任屬阿衡親
惟旦奭弼諧六樂緝熙五禮廢典聿修羣望咸秩光
贊皇猷式康帝載俾七百之祚長扇於無壇維天和
二年歲次大淵獻月旅沽洗爰詔史臣爲之頌曰
攸攸大極巖巖削成渾元旣判載濁浮清含仁配厚
蘊智爲靈功遂勿處日用無名在秋戒肅居金作鎮
嚴霜比威膏液等潤容而不有施而匪吝窮地之險
極天之峻川澤通氣山藪藏疾靈嶽峨峨清于秩秩

隈積冬霰。峩峩留夏日。雷霆以之。風雲自出。殷憂啓聖。多難開基。大人利見。或躍俟昔。袞冕赤舄。三牡龍旂。鼓腹行樂。擊壤而熙。神教以道。民化惟德。沈漸以剛。高明柔克。文軌叶同。皇猷允塞。如山之壽。寧我郡國。

大周天和二年歲在丁亥十月戊辰朔十日丁丑立。使持節驃騎大將軍開府儀同三司大都督司宗治內史臨淄縣開國公万紐于瑾造此文。車騎大將軍儀同三司縣伯大夫趙興郡守白石縣開國男南陽趙文淵字德本奉勅書。

大唐紀功頌并序

唐高宗

若夫元功攸宰。丕業光於帝先。神用斯沖。峻道輝於

象外。至於炯誠千祀。昭訓百王。則有彫金揚不朽之
基。鏤玉啓無疆之迹。而阪泉師律。旌德之範。未章疇
野兵鈴。銘徵之典。猶昧乘巢革夏。愆先覺於丹碑。濟
鮪戡殷。媿生知於翠碣。惟睿之失。其大者歟。自否運
辭炎。墊寓之灾。梗極餘靈。泣素稽霄之浸。滔天風夏
癸以昏初。則忠良旣逐。政殷辛之虐。往則邦國斯悴。
穀霏黃而霧地。下黷方祇。繩亂赤而雨天。上塲圓象。
人怨神怒。語亡之兆。遽彰衆叛親離。規存之謀。遂爽
月弓宵而空桂。則蝕屢金波。星箭夕而奔榆。則妖飛
玉弩。塵埋五岳。見陵谷之遷移。水竭百川。覩江湖之
騰沸。鼎已問於輕重。裂周綱者七雄。德遂寢於休明。

絕秦綱者幾國。天工是代。紫庭無享。覘之賓。神道克
恭。元冕乏郊禋之辟。故以鄒瀛眇眇。同結向隅之悲。
亥跡茫茫。共軛推溝之怨。妖精紊象。寶庫延災。萃綠
林者。煙霏屯黑山者。霧合戰龍于野。則亂起干戈。飛
鴻在陸。則害生戎馬。先文皇帝。憫黎元之已燎。救焚
洪燄之爐。悼品物之將淪。拯溺橫流之溘。握寶符於
代北。鞏建丹旗。剖神珠於漢東。方擣白羽。運五材而
杖順。陰陽未測。懸兩耀而龔行。幽明叶契。而武關先
入。楚猴之暴未誅。漸臺雖覆。蜀鼃之聲猶振。王充盜
移鳳辰。註誤伊湮。竇德假署龍官。虔劉趙魏。同惡相
濟。共爲脣齒。先帝威加有截。思入無方。窮幽測神。研

幾作聖。薛公三策。明出下科。陳相六奇。懸符上畧。親御姬鉞。問罪晉京。墨守屢殫。般攻益贍。鑿脩芒之壤。舉覆匱而成山。引曲洛之波。沃濫觴而爲沼。飛衝業業。降臨負戶之危。長隧悠悠。上窺析骸之急。奔鯨之穴。染鏹非遙。封豨之林。倒戈斯在。建德駢白波之衆。濟馬頰之津。據青犢之資。踐牛口之谷。吞沙石而賈勇。召風雨而成梟。圖解鄴城之圍。規降上黨之守。蜂飛萬旅。猬起千羣。竭汜水之洪流。褫岬山之崇堵。羽書狎至。駟遽交馳。夕照趙烽。晨驚魯柝。於時謀臣鉗口。息其請箸之談。猛將含牙。弭其穿札之氣。或請退師函谷。以避前鋒。或請反旆崤陵。以圖後舉。先帝乃

謂諸將曰。本欲先定涇東。次平河朔。今既逮投天網。自取膏原。建德若擒。王充必敗。虢亡虞滅。理有固然。韓并魏從。義無或爽。天實贊我。不可失乎。兵道尚竒。屬斯舉也。牽裾之議。踐幕庭而局影。斷珎之規。望轅門而累息。獨決神衷。揔排輿誦。留偏裨之將。分拒王城。引趨武之師。移和制邑。滎波遠派。遙䟽官度之濱。廣武斜臨。迴據成臯之險。嚴闔槩日。巨防潛雲。寰中逐鹿之郊。寓內瞻烏之地。興亡之道。楚漢之迹。猶存得喪之途。曹袁之基。未泯。以代藩之貴。均士伍之勞。處唐侯之尊。等更徭之膳。越醪露惠。赴白刃以求仁。楚續銜恩。捐蒼壁而取義。廼率數百騎。入其境五十。

餘里。觀其部列，摩壘而旋。於是醜類相奔，凶渠競進。短兵交戰，長圍亟合。望柘弧而盡殪，類棊布於中原。應蕭斧而咸摧，若星羅於平隰。僅而獲反，百無一焉。若夫趙主入秦，昭之關事。從權免晉，后察王敦之壘。道以詐全，業蹈往辰。功優昔載，自是鋒芒遂斲。鉦鼓載衰，奪林父之心。破姜維之膽，退歸漳滏。恐天討之乘奔，逸越輟轅。懼王師之兼弱，深溝板渚。斂轡車關，數十罪而不驚。示三駟而未款，乃休牛洛汭。暫息桃林之墟，牧馬河陽。聊駕襄城之野，樵蘇已遠。虛月壘以招兵，雉堞不脩。偃日羽而延寇，建德深然。楚閒不疑，秦諫空峭。譬以徑前，沉輕舟而直進。先帝勒兵背

水列騎依山。光流闕鞏之甲。聲振武安之瓦。神規嶽
鎮。未許代御之辭。聖畧川凝。無受致師之請。欲戰不
可。求反無路。肇自霞初。迄于景晏。湯風爛石。溽暑流
金。羸糧不從。壺漿莫繼。思仇餉于葛野。想蠲渴于梅
林。齊侯絕華泉之遊。楚將無穀陽之飲。窮魚失水。望
清漢而摧鱗。暍鳥傾巢。仰曾天而折翮。先帝別命旌
麾。以乘其背。親當矢石。以擊其心。表裏夾攻。遠迹同
至。始則開行跡。鴈分彼陣。以弱其鋒。終乃合勢。形虵
離敵衆。而孤其力。冀馬追風。彩桃花而翼路。燕犀奪
日。輝若枝而鏡野。縱金憤關隴之氣。凌險若夷。浴鐵
收熊羆之心。陷堅如朽。應龍畫角。百川爲之震蕩。靈

鼉制鼓。九鎮所以傾頹。投石蒙輪。霜映彫戈之末。翹
關拔距。電流文劍之端。舉長篲以布新。卷崩雲以祛
稜。攻虛匪實。塵靡藉於曳柴。擊衆以寡。火無勞於結
燧。俘虜十餘萬。斬首三千級。生擒建德。徇于城下。覲
顏流汗。曾無解楊之言。懷德畏威。翻有蒯通之說。然
後操袂天闕。伏鎧旗亭。齊燃薰卓之膏。頭飲智瑤之
器。王充牽羊請服。刑馬求盟。開定鼎之郊。獻測圭之
邑。義貞白水。信縶丹書。赦其繆櫬之辜。宥其挺堦之
命。情安共主。忘鯁氣於田橫。怨切周天。忍凶終於魏
豹。於時沴卷東浸。鏡萬里而河清。妖斂西氛。陣千重
而雲散。昔高宗鬼方致伐。遠克三年。周武牧野陳師。

尚勞再駕。未有曾吞宇宙。掌握乾坤。正西北之傾天。
軸東南之毀地。英謀一振。功成晷漏之間。勅敵雙擒。
業茂須臾之頃。故能基大寶於王業。錫祉(元)珪。掃元
凶於天步。臻祥綠錯。國八紘而績禹。功邁敘倫。家六
合而心勛。德超則大。犧皇語聖。旣桀往而堯今。農帝
方神。遂昏前而旦即。竒謀沖秘。非假書於黃石。雄斷
縱橫。詎窺符於(元)女。近以五載巡初。省方伊洛。九冬
狩晚。講戎許鄭。舉鸞旗而遐指。飛翠蓋以長駟。垣壘
肅而未遷。山川儼而無改。徘徊丹浦。事乖聞禮之辰。
顧步青丘。情異撫軍之日。波瞻舊渚。水變沉沙之竒。
堦望前墉。城餘拔幟之所。是以滄哀霜露。攀日月而

不追茹痛風枝懷天地而莫報金墀在御方九仞以
悲深玉案升珍擬萬鍾而怨切麟圖遺範義百楹書
鳳篆留規道千裘冶虔守天位憂輟峻於洪基肅奉
帝猷誠虧光於寶祚屬辭抽思實無覲於揚名相質
披文庶有裨於紀德乃爲頌曰

乾綱肇絕神鼎初飛妖凌三季兵踰九圍元功孰慕
神器無歸瞻烏逐變即鹿乘機穆穆聖祖桓桓神武
電擊河汾雲飛京宇克清龍戰載安鼉柱禮叶禋宗
樂諧率舞漳濱獨起洛汭鴟張荐驚權柝亟犯封疆
裂冠稱帝犯蹕圖王豈知吳滅未辯虞亡睿后生知
謀絕羣彥雲翱西伐霜戈東戰元惡懸首凶渠革面

一網而擒。義多昔卞。冰銷日域。霧斂星區。龍庭受吏。
鳳穴來蘇。虔奉天祿。恭膺帝圖。陶甄太素。亭育尊盧。
啓光夏政。誦恢周道。濫以菲躬。聿承大寶。宅侔宇宙。
業均犧昊。豈惟文明。實資衡保。載省王風。順駟月駟。
津由漂鹵。途經絕轡。思動則天。慕纏因地。敬愛攸屬。
明發奚洎。寒移暑謝。律變星迴。陣雲先滅。月壘猶開。
毀垣殘柳。寒井荒苔。水侵發石。燧掩飛灰。泗水詞斑。
濟陽紀蔡。式傳經畧。敢竭虛昧。坤紐方輿。乾張圓蓋。
騰實萬古。飛英百代。

顯慶四年歲次己未八月

乙巳朔十五日己未建。

盧公清德頌

唐劉穆之

大唐洛州滎陽縣頭陀逸僧識法師上頌聖主中興
得賢令盧公清德之文并序

粵允矣於昭聖唐天子中興拓跡開統廼建皇極握
乾符驅駕百靈揔齊萬類貴與天乎比壽富與地乎
侔資日月迴薄以淑清告象陰陽變通以樂和乘氣
龍不隱德鳳不潛靈懷生之徒根著之物咸遂其性
固能使河海靜默宇宙文明舊物惟新昌圖啓旦大
定禮樂戢藏干戈人薄而還淳刑措而不用覆燾之
恩溥生育之理足於是邑老田父擊壤而歌張掖而
僊顧而爲頌曰康哉堂哉廼聖廼神代有非常之主
必有非常之臣非常者所謂竒尤桀出與時偕運則

我賢令盧公其人焉。古曰聖主得賢臣，今見之矣。百里令長親人之要者也，煩劇所鍾，賢良是責，故有四科堂室。孔甫稱乎冉求，三國股肱，趙武知乎邢伯，應星雷而鎮風雨，類父母而若神明，鄭產之開喻，獲禽魯恭之垂仁及獸，循聲流於簡牘，良政在於歌謠，斯焉取斯之子之遠，若乃張英風於上國，宣懿範於中都，允升大猷，年 彖 有成績，休光終不圉，盛德莫與京，觀其化焉，則盧公之心可知矣。公名正道，字真直，范陽人。昔元年景辰，上帝甄其九萬，正月甲子，太公課其八百，漢祖以同日相愛，利建藩維，魏祖以餘風可嘉，聿推楨榦，或清虛而循禮典，早識張華，或文思而

發詩書。深知越石。曾祖昌衡。隨金州刺史儀同三司
太子左庶子。風神澹雅。經史該博。宣六察而馳熊軾。
翊五善而列鳳條。德爲人表。行脫士則金石萃編云
祖寶素。隨晉州別駕。有禮有法。于綱于紀。得管輅之
清談。發王祥之雅詠。考安壽。皇朝朝散大夫襄州司
馬。繇州長史。蘭芬桂月。鑒霜明。珠臯則洗憤擅竒。
玉壘則題輿絹化。公五行秀氣。五色淳光。忠肅恭懿。
以立身。孝敬溫良。以行已。涵珠孕璧。懸闕澤之高名。
舞柏吟松。動嵇康之逸韻。文史足用。方朔之言有徵。
器宇難量。叔則之才可覲。解褐調爲冀州。信都縣主
簿。轉絳州太平縣丞。長河之閒。彼汾之曲。朱鉤理劇。

黃綬安卑。鴻漸于磐。鷺遷于木。勅授陝州司士參軍。又改汴州浚儀縣令。佐檐帷於陝服。式允清嚴。縮銅墨於梁城。克敷恩信。我皇紹膺丕業。嗣守珍期。明一之徽。号聿崇。凡百之榮。階式敘。神龍元年。制加朝散大夫。隨班例也。居無何。制爲洛州新安縣令。又改滎陽縣令。爾其索亭舊邑。滎澤奧區。郊連北制。地接東里。上纏鶉火。旁控龍泉。神州則帶河沂洛。洪漕則通江達海。五方雲湊。公驟私奔。百族星稠。邀時射利。盤根錯節。允屬於外卿。先教後刑。必推於季子。公下鳧鳥。用牛刀。承天理人。以居其職。遵五屏四。以制其範。開道途焉。設堤防焉。陳之以禮樂。導之以德義。宣柔

嘉恤孤寡。去末返本。利用厚生。至爲濟濟。庠塾莘莘。冠履王渙之勸。率佐吏范甯之惠。養生徒。人識廉讓之儀。家行俎豆之禮。其崇學有如此者。龍鱗促務。馬骨攘灾。就穡占於五星。納稼詳於十月。子竒之鑄器。童恢之易牛。其勸農有如此者。持寬濟猛。以禮代刑。兩造盡其根源。五聽窮其詞色。穿窬自息。請託不行。歸遇臘之囚。原復讎之罪。桴鼓罕施於道路。桎梏無用於狴牢。其政令有如此者。貞年巡戶。定賦徵徭。情爲^偽字。必探高卑咸若。心同懸鏡。自辯妍蚩。手類持衡。不差輕重。其平直有如此者。果行育德。脩己正身。徐邈之有常。石奮之無潤。冰壺載潔。塵甑自空。其清白

有如此者。入其境。則田疇盡墾。草萊盡闢。此恭敬以信。故其人盡力也。入其邑。則墻屋甚完。樹木甚茂。此忠信以寬。故其人不偷也。至其庭府。吏甚清閑。諸下用命。此明察以斷。故其政不擾也。可謂季路爲宰。復在于斯。任人以逸。從善如流。耳目平而心氣和。四支全而百工理。父事三人以教孝。兄事五人以教悌。可謂子賤爲宰。復在于斯。固以得良吏之要津。行古人之至道。頃者年穀不登。時雨未降。聖皇減太官之膳。出幽圜之囚。是歌雲漢之詩。式備山川之禱。恐一物之失所。慮百姓之阻飢。徒有之無。遂起泛舟之役。賑貧救乏。爰行發廩之施。公上祇元澤。下罄丹誠。家到

戶至。哀多益寡。優之柔之。撫之育之。里詠途歌。人安俗泰。雖雲行載沐。旋符以夜之期。而風教特隆。實荷如春之德。導揚庶美。字育羣甿。惠化所以周洽。風流所以藉甚。豈直王譚在職。時叟号其無雙。張旣臨官。京輔稱其第一而已。河南道巡察使衛州司馬路敬潜。以政術尤異。奏聞使乎使乎。得其人矣。是知韓稜之飛章已奏。徵入有期。焦貢之行兩載。馳願留難。遂丞馬據。主簿解伯宗。尉高賁。司馬貽道等。並干將重寶。新甫貞柯。道可濟時。位不充量。溟海即鯤鵬所化。枳棘非鸞鳳所栖。翊賛多方。聲華有裕。望逸驥而將遠。撫留犢以增傷。孤我德而無鄰。勞我思而無極。爰

有等慈寺頭陀逸僧識法師俗姓葉氏漢丞相之後
秀也天稟聰偉生而俊竒發願爲國敬造阿彌陀石
碑像并頌聖德及鑄神鍾鄉人前巴州曾■縣尉劉
虔獎錄事王虔福常守一佐史里正等或簪纓著族
夙勞州郡之班或仁義在躬慙屈鄉閭之任耕田鑿
井遭聖主之休明孝道忠規受君子之名教以爲叫
丹闔而一借未達由衷樹翠碣而長懸方存相質惠
我無疆之澤徽烈允光思君不樂之情德音何已殷
溝作頌文在茲乎其詞曰

上地山河中天朝市玉帛萬國子男百里惟索之亭
惟京之水膺膺原隰森森杞梓其粵茲撫字須彼仁

賢俗之化者。君之宰焉。操我利器。亨我小鮮。歌聞下
邑。舞洽重泉。其二其政不嚴。其儀不忒。秩秩詩禮。光光
道德。爰務耕桑。罕施徽纆。無偏無黨。有典有則。其三琴
鳴密賤。花發潘仁。俸惟計日。甌乃上塵。視人如子。臨
事如神。秋鷹坐化。瑞雉行馴。其四自冬徂春。密雲不雨。
曲降絲綉。載傾敖庾。沐蘭奠桂。救貧濟窶。旋感月離。
方期歲取。其五其祝良何德。汲黯何功。遠望千載。寧逾一
■。既流膏雨。克播循風。聲聞于外。化協于中。其六鳳使
載揚。驥途攸展。芳菊無絕。甘棠勿剪。式紀清芬。爰憑
翠篆。歌詠不足。聊稱其善。其七
神龍三年歲次丁未五月戊戌朔八日己巳建前中書舍人內供奉劉

穆之篡琅琊王守質書。

唐龔丘縣令庾公德政頌序 唐李陽冰

荀藐古之良宰也。榆次碣之庾公。今之賢百里也。龔丘頌之。姑無其能。孰謬其紀。議者謂庾公之政尤矣。公初告羣吏曰。昔孝宣憂元元。以爲經國致理。先乎令長。廼擇郎官御史。出宰縣邑。我自任城尉。驟居五百石。非才何以當之。誓務整。蘇疲人。祇若明命。廼室禮讓。省刑罰。紓力役。闢土田。宣慈務寬。訓儉示德。潤作時雨。咏爲春風。於是齊魯丕變。井閭咸復。三載考績。一方歸最。都督兼侍御史清河張公曰。昌牧伯之賢也。訓俗馭官。勸直沮枉。述職之地。類能稱之。曰。方

諸爽氣日暮更清。比之松筠。歲寒轉茂。題以上下之目。出乎羣萃之表。百城千里。異聲同歡。曰以伯達之良牧。賞次孫之茂宰。宜矣。公名賁。字文明。其先潁川人。成周之時。世爲掌庾。因以命族。公其胄焉。公之考曰欽嗣。爲兗州別駕。王父曰元汪。爲尋陽令。曾王父曰師則。爲蜀王文學。楷模繼代。龜麟接武。大歷中。邑老彭滔等三十五人。以公故柔之大。咸願刻石褒美。申於元戎。元戎允荅。縣人以陽冰與公周旋。備詳德行。俾之作頌。多媿能文。辭曰。

於穆庾公。宰字之良。化洽百里。風摛遷一方。邑老上請。願言頌德。元戎嘉之。金石廼刻。

大歷五年九

月三日建。

姒神頌并序

唐李 謹

粵若稽古。徵諸陳迹。雖年移代謝。而損益昭然。是以宋玉高唐之辭。盛傳於南國。曹王洛神之賦。永播於東周。莫不事載圖書。名標史策。河東之美者。有姒水之祠焉。其神周代之女。介推之妹。初文公出國。介推從行。有割股之恩。無寸祿之惠。誓將畢命。肯顧微軀。儀形飄殞於■煙。名跡庶幾於不朽。後縱深悔。前路難追。因爲滅焰之辰。更號清明之節。妹以兄涉要主。身非令終。遂於冬至之後。日積一薪。烈火焚之。爲其易俗。諺云。百日斫柴。一日燒。此之謂也。闔境之內。疇

敢不恭順之。則風雨應期。違之則雷雹傷物。兄則運心以求合。我則處室以全真。兄則禁火以示誠。我則焚柴以見志。惟兄及妹。與世殊倫。傳曰。介之推終不言祿。祿亦不及。渾天記曰。著寒食者。爲助陽氣。用厭火星。所說不同。牙有得失。其來遠矣。安可闕如。縱因事之宜。亦自我作古。祭法曰。其有廢之。莫敢舉也。其有舉之。莫敢廢也。東北至土門之口。西南距盤石之山。方圓百里。別成一境。天寶中。以賊臣背化。國步猶艱。塗炭生靈。焚燒甲第。伊我遺廟。歸然猶存。簪裾近叶於當時。庭宇更新於往日。性惟孤直。虛見授於妒名。行本堅貞。實堪垂於公範。今幸邊塵不動。海水無

波叢尔小戎。曷足爲患。昔虞舜至聖。尚有苗人之誅。殷湯至明。豈無葛伯之伐。蓋以君爲元首。臣作股肱。飄飄轅門。藩屏王室。乃命河東節度副大使兼工部尚書太原尹北京留守薩公諱兼訓。登此禁闈。公掌握衡鏡。心韞韜鈴。勢若轉規。謀如泉湧。運籌帷幄。孫吳詎可比其能。料敵戎旃。衛霍不足方其妙。浙江遺愛。但美還珠。汾浦來蘇。惟欣去獸。申命我承天軍使節度副使前永平軍節度右廂兵馬使銀青光祿大夫試鴻臚卿同山南東道節度經畧副使上柱國党公諱昇。鎮茲巨防。公天子忠臣。元戎外壻。志惟清而惟謹。行不諂而不驕。往任滑臺。職居惣統。近歸本道。

位處專城。投醪之義。遠聞挾纊之情。久著爰自至止。星管再周。路不拾遺。人皆樂業。長筵繼日。士■其勞。細柳垂陰。衆歌其美。水碾成而永逸。聚米難儔。軍井達而嘗閑。伏波不竭。君依神以傲福。神依君以庇躬。事勢相因。理亦條貫。固宜書其已往。播於將來。貞石既磨。斯文可作。尔其泉湧祠下。蓄爲碧潭。飛入大河。噴成瀑布。崩澗舉澗。雜雷霆之聲。盪雲沃日。類風水之會。經汙寒而氣蒸。萬家處炎燠而清潤。一川灌木扶疎。引柔條而接影。纖苗霍靡。夾寫岸而隨風。自古及今。非軍則縣。未嘗不揆月撰日。備其享禮。春祈秋賽。庶乎年登。坐覲進而神之聽之。官寮拜而或俯或

仰既而坎坎伐鼓。五音於是克諧。戔戔側弁。三軍以之相悅。公之德也如此。神之應也如彼。且河北數州。山西一道。或衣以錦繡。或奠以珍羞。無晝夜而息焉。豈翰墨之能諭。咸以商者求之而獲利。仕者禱之而累遷。蠶者請之而廣收。農者祈之而多稔。不然則奚能遐邇奔湊。奉其如在。蓋聞有而不言。謂之隱。無而言之。謂之諛。又聞誇目者尚奢。愜心者貴當。承命述事。敢不勉旃。僅因退食之餘。竊比陳其梗槩也。銘曰。凡有異行。宗之曰神。匪害於物。實利於人。兄則禁火。妹乃積薪。共爲佳節。在乎芳春。今古千齡。方圓百里。德音無斃。蒸嘗不已。祭具珍羞。服先錦綺。所求必應。

高山仰止。將軍塞下。細柳營邊。晴開朝鏡。霧雜鑪煙。
神理昭昭。靈草芊芊。紀諸令範。光我承天。井陘西南。
太原東北。妒祠之水。澹爲黛色。跳波噴浪。如有可則。
古往今來。源流不忒。興雲致雨。侔造化力。顛顛昂昂。
粵君之德。或祈或禱。永無休息。神之歆之。福善寧億。
大唐大^歷十三年歲次丙辰五月丁亥朔十六
日壬寅巳時建。判官游擊將軍守左清道率府率賜
紫金魚袋上柱國李諲撰。

上皇帝繡像頌

并序

唐釋法琳

緬以八樹韜光。兩河晦迹。匿王懸仰。鑄臘而寫全身。
迦帝翹誠。鎔金而圖真相。乃洎乎青睛南度。白馬東

翻像教鬱興靈儀遍跼於是儼神姿以登松井屈聖體而施明珠光烈張橋色流滬瀆示佩日於漢后感揮毫於晉君或顧步而躡萬山乍徘徊而遊夢渚禎祥嘉瑞兆自由來未有刺縷圖真援空範狀我大唐皇帝曩植四宏夙資五德神功邁於軒昊至治美於成康仁動上元力侔大造慶雲垂彩金鏡含七曜之暉瑞鳥呈祥玉燭和四時之氣累髮文身之長俱請命於王庭穿曾瞻耳之酋共獻睽於魏闕加以留心八正篤意五乘廣運檀那聿修淨業永言善逝冥漠何追爰勅上官式摹遺景奉造釋迦繡像一幀并菩薩聖僧金剛師子備摛仙藻殫諸神變六文雜沓五

色相宣。寫滿月於雙針。託修揚於素手。妍踰蜀錦。麗
越燕緹。紛綸含七曜之光。布濩列九華之綵。日輪吐
焰。藹園客之絲。蓮目凝輝。發秦姬之縷。楊侯百里之
珠。慚斯百福。子羽千金之璧。愧彼千輪。華蓋陸離。看
疑涌出。雲衣搖曳。望似飛來。何但極思迴腸。抑亦巧
窮元妙。以今歲在庚寅。案貞觀四年也月居太簇。三元啓候
之節。四始交泰之辰。乃降綸言。於勝光伽藍。設齋慶
像。四十九僧。三七行道。大秦紅粟。備香積之餐。周穆
金膏。陳梵王之供。四等福田。生生具足。六因善報。世
世莊嚴。劫石碎而寶歷長存。芥城空而皇基永固。不
勝慶悅。輒迺頌云。

於鑠上帝。天策我君。乃神乃聖。允武允文。就之如日。
望之如雲。禎符輝煥。美氣氤氳。光宅天下。攸序彝倫。
體道迴向。式建福田。針裁赤果。縷制青蓮。文含綺爛。
彩奪霞然。花疑迴發。蓋似空懸。方諸涌地。邁彼騰天。
歲在提格。時旅青陽。奉遵徽命。爰崇道場。千科星聚。
八座霞張。風迴雅梵。殿鬱名香。鴻基盛業。永永無疆。
贊

硯贊

魏繁 欽

或薄或厚。乃圓乃方。方如地象。圓象天常。藝文類聚五十八無

此四句班采散色。漚染毫芒。點黛文字。曜明典章。施而

不德。吐惠無疆。浸漬甘液。吸受流光。藝文類聚作漸光作

芳朱長文墨池
編以爲銘誤

巢父惠施贊

晉左九嬪

泱泱長流。沔沔清波。思文巢惠。載詠載歌。垂綸一畝。去
萬象匪多。神乎暢矣。緬同基阿。

虞舜二妃贊

晉左九嬪

妙矣二妃。體靈應符。奉嬪於媯。光有此虞。沅湘示教。
靈德永敷。

周宣王姜后贊

晉左九嬪

昭昭宣王。克復前制。亶亶姜后。乃激乃厲。執心至公。
以恢明世。

孟軻母贊

晉左九嬪

鄒母善導。三徒成教。鄰止庠序。俎豆是効。斷織激子。廣以墳奧。聰達知禮。敷述聖道。

狂接輿妻贊

晉左九嬪

接輿高潔。懷道行謠。妻亦冰清。同味元昭遺俗。榮津志遠神遼。

荆武王夫人鄧曼贊

晉左九嬪

天道惡盈。極數則微。邈哉鄧曼。心暎禍幾。覩兆歎亡。考德知衰。賢智卓殊。邈哉難追。

齊杞梁妻贊

晉左九嬪

遭命不改。逢時險屯。夫卒莒場。郊弔不賓。哀崩高城。訴情穹旻。遂赴淄川。託軀清津。

齊義繼母贊

晉左九嬪

聖教(元)化禮貴信誠至哉繼母行合典經不遺宿諾
義割私情表德來裔垂則後生

魯敬姜贊

晉左九嬪

邈矣敬姜含德之英於行則高於理斯明垂訓子宗
厲發竒聲宣尼之歎萬代遺馨

班婕妤贊

晉左九嬪

恂恂班女恭讓謙虛辭輦進賢辯祝理誣形圖丹青
名侔樊虞

虞舜像贊并序

晉庾闡

夫至道(元)妙非器象所載靈化潛融非軌迹所傳故

道資沖樸則謂之三皇德被羣生則號稱舜禹是以先王因其會通制爲準極功極於天則配乎上帝法施於民則載在祀典然後名教彰於致治王道煥乎無窮故茲堂之構也有自來矣然樹寢所以棲神而寢非神之所期立像所以表德而像非德之所存若乃廢其軌景洞其元真雖冥照之鑑獨朗天下惡乎注其耳目哉遂乃顯圖靈像廓其廟壇俾天光焜於宇宙南風散乎五弦豈謂神道之妙可寄之於有涯哉蓋亦暢悠悠之心者也其辭曰

元像焜耀萬物之靈飛龍在天陽德文明神道雖寂務由機生擁琴高詠寄和五聲元風旣暢妙盡無名

民鑒其朗，孰測窈冥。

二妃象贊

晉庾闡

二妃^(元)達，含靈體妙，協德坤元。配虞齊燿，明兩既麗。重光作照，有邈其神。微風遐劭。

孫登贊

晉庾闡

靈巖霞蔚，石室鱗構。青松標空，蘭泉吐漏。龍薈可遊，芳津可漱。^(元)谷蕭寥，鳴琴獨奏。先生體之，寂坐幽岸。凝冰結樸，熙陽靡煥。潛真內全，飛榮外散。凌崖高嘯，希風朗彈。道有冥廢，運有昏消。達隱不巖，^(元)跡不標。或曰先生，晦德逍遙。嵇子秀達，英風朗烈。道儻薰芳，鮮不玉折。兆動初萌，妙鑒竒絕。翹首丘冥，仰想^(元)哲。

黃帝贊

晉曹毗

軒轅應元期。幼能摠百神。體統五靈妙。氣含雲霧津。
摻石曾城岫。鑄鼎荆湖濱。豁焉天扉闢。飄然跨騰鱗。
儀轡灑長風。褰衣躡紫宸。

翟徵君贊

并序

晉庾亮

夫所謂至人者。體包傑量。神凝域表。該落萬動。元心
獨融。故能蚪驤慶霄。而不紺秦龍之轡。鳳鳴瑤林。而
不屈伶倫之籠。豈必欣太清而樂瓊藹哉。顧蹄泚不
足以濯神鬚。翳蒼不足以翔雲翻。是故藐姑有綽約
之廬。箕阜有高嘯之宇。唐勳喪於元庭。夏功忘於虛
室。晉徵士南陽翟君。案翟湯也在稟逸韻於天陶。含

沖氣於特秀。體虛任而委順。恢昭曠而高蹈。先生載
營抱一。泊然獨處。神棲飈藹之表。形逸巖澤之隅。雖
束帛仍降。輶冕屢招。而弓旌屈於匪石。帝命慙於虛
復矣。是以高風振宇宙。遠詠冠當時。方將表大庭於
絕代。恢(元)解以釋紛。仰朝霞而晞翼。陵扶搖以獨翔。
景命不延。卒於尋陽之南山。哲人其萎。高軌孰倣。余
欽若人之風。常問道於無何之廬。竇想(元)珠主以瞻
授。沐道霑淳。固以實而歸矣。自昔之違。於茲七稔。何
悟先生。忽焉升遐。感至德之長泯。悼仁風之永翳。標
爾其傷。潸然增欵。乃授翰詠跡。以宣來葉。其辭曰。
卓哉先生。逸韻遐超。蚪盤玉津。鳳戢瓊條。滌耳夏鼎。

高揖唐朝。洪崖邈矣。元跡載劭。淳風沐世。飛芳九霄。

伏犧讚

晉王彪之

悠悠皇犧。體寂神澄。無爲而化。世道之凝。不知有之。冥感自興。因應之跡。畫象結繩。

老子贊

晉湛方生

教由嚴宗。化必有資深矣。若人乃作皇師。亦參儒訓。道實希夷。恂恂孔父。是敬是祇。

水贊

晉殷仲堪

大象無形。氣以分麓。淡淡沖津。質有雖虛。清瀾可瀨。明激弗渝。孰能懷之。汎然靡拘。

閑遊贊 并序

晉戴逵

昔神人在上。輔其天理。知溟海之禽。不以籠樊服養。櫟散之質。不以斧斤致用。故能樹之於廣漠。棲之於江湖。戴之以大猷。覆之以元風。使夫淳朴之心。靜一之性。咸得就山澤。樂閑曠。自此而箕嶺之下。始有閑遊之人焉。降及黃綺。逮於臺尚。莫不有以保其太和。肆其天真者也。且夫巖嶺高。則雲霞之氣鮮。林藪深。則蕭瑟之音清。其可以藻元瑩素。庇其皓然者。舍是焉故。雖援世之彥。翼教之傑。放舞雩以發詠。聞乘桴而慄厲。况乎道乖方內。體絕風塵。理楫長謝。歌鳳逡巡。盪八疵於元流。澄雲崖而願神者哉。然如山林之客。非徒逃人患。避爭門。諒所以翼順資和。滌除機心。

容養淳淑。而自適者爾。況物莫不以適爲得。以足爲至。彼閑遊者。奚往而不適。奚待而不足。故蔭映巖流之際。偃息琴書之側。寄心松竹。取樂魚鳥。則澹泊之願。於是畢矣。然竒趣難均。(元)契罕遇。終古皆孤棲於一巖。獨玩於一流。苟有情而未忘。有感而無對。則輟斤寢絃之歎。固已幽結於林中。驟感於遐心。爲日久矣。我故遂求方外之美。畧舉養和之具。爲雜贊八首。暢其所託。始欣閑遊之遐逸。終感嘉契之難會。以廣一往之詠。以抒幽人之心云爾。

茫茫草昧。絲邈(元)世。三極未鼓。天人無際。萬器旣判。靈朴乃翳。實有神宰。忘懷司契。冥外旁通。潛感莫滯。

愬順巢鷗兼應夷惠。緬矣遐心。超哉絕步。顧揖百王。
仰怡泰素。矜其天真。外其囂務。詳觀羣品。馳神萬慮。
誰能高佚。悠然一悟。

尚長禽慶贊

晉陶潛

尚子昔薄宦。妻孥共早晚。貧賤與富貴。讀易悟益損。
禽生善周遊。周遊日已遠。去矣尋名山上山。豈知反

此贊陶集缺
載故錄之

論語贊

晉謝道韞

衛靈問陳於孔子。孔子對曰。俎豆之事。則嘗聞之。軍
旅之事。未之學也。

庶則大矣。比德中庸。斯言之善。莫不歸宗。麤者乖本。

妙極令終。嗟我懷矣。興言攸同。

景陽樓慶雲贊

宋孝武帝

非煙非雲。曳紫流光。懸華曜藻。奄鬱臺堂。粵子休明。震乎珍祥。積慶有文。靈貺無疆。

孤桐贊

宋孝武帝

珍無隱德。產有必甄。資此孤幹。獻枝楚山。梢星雲界。衍葉炎塵。名列貢寶。器贊虞弦。

吳季子札贊

宋范泰

延州高遠。棄國師誠。優遊大邑。觀風上京。仁懷邦壤。道暢聖明。鑒徹昔代。樂察未形。羸溥遠死。解劍在生。夫子戾止。爰詔作名。明趙嶠石墨鐫華誤。以此贊爲陶潛作。

張長公贊

宋范泰

長公秉心獨逸。世表量物難同。審已彌了。情雖高遠。跡無抗矯。靡當夷惠。孰識多少。

高鳳贊

宋范泰

遐哉元古。邈矣皇羲。自茲已降。顯默參差。智爲世駭。才爲物竒。跡出無泯。潛躍俱馳。曖曖若人。孰測其爲。戢曜幽壑。採真重崖。冲情莫亮。汗跡示疵。輕俗無際。肆志莫羈。

老子讚

唐睿宗

爰有上德。生而長年。白髮遺象。紫氣浮天。函關之右。經留五千。道非常道。元之又元。

孔子讚

唐睿宗

猗歟夫子。實有聖德。其道可尊。其儀不忒。刊詩定禮。百王取則。吾豈匏瓜。東西南北。

顏回讚

唐明皇

杏檀槐市。儒述三千。回也亞聖。丘也稱賢。四科之首。百行之先。秀而不實。得無慟焉。

蕭子雲飛白蕭字贊并序

唐李約

梁侍中蕭子雲書。祖述鍾王。備該衆體。始變蔡張。二王飛白古法。妙絕冠時。雖名存傳記。而迹絕簡素。唯建鄴古壁。餘此蕭字焉。韓晉公鑒古擅書。聞之嗟異。遷之於南徐。置於海榴堂座右之壁。余後獲之。載以

入洛書之故實。事之本末。中書舍人張公崔監察備
撰記詳焉。余少好圖書。耽嗜竒古。雖志業不立。而性
莫能遷。非不干求爵祿。心憎時事。自與名疎。非欲乖
時好尚。養痾守獨。所見遂僻。僻則僻矣。與夫酣酒聲
妓。奔走權利者。俱亡羊也。亡則孰多。余每閱翫此跡。
而圖書之光。如逢古人。似得良友。加以琴酒靜暢。書
齋晝閒。榮富賤貧。是日何在。至若尋翰墨輕濃之勢。
窮點畫分布之能。與日彌深。隨見逾妙。嗟夫。昔賢垂
不朽之藝。知傳寶於後世。後人覩妙絕之迹。見得意
於當時。名齊日月。情契古今。傳曰。游於藝。藝可已乎。
知者相賀。比獲蘭亭之書。世情觀之。未若野人之塊。

不闕於世。在世爲無用之物。苟適余意。於余則有用已多。乃作贊曰。

昔創飛白。蔡氏所得。起於聖帝。播於翰墨。張王繼作。子雲精極。壁昏蜃素。墨古池色。翻飛露白。乍輕乍濃。翠箔映雪。羅衣從風。崩雲委地。遊霧縈空。鱗刺勢動。蟻蟠氣雄。昆池駭鯨。時門鬪龍。攢毫疊札。或橫或縱。層層陣雲。森森古松。君子況德。高人比蹤。抱素自潔。含章內融。逸疑方外。縱在矩中。密而不雜。踈而有容。藝通造化。比象無窮。子雲臣梁。蕭字逾貴。點畫均豐。姿形端異。迹絕繭素。名空傳記。明徵褒貶。惟此一字。

李太白脫鞞圖贊

宋牟子才

錦袍兮烏幘。神清兮氣逸。凌轢兮萬象。麾斥兮八極。我思古人。伊李太白。孰爲使之朝禁林。而暮采石也。其天寶之嬖倖歟。䟽擿詞篇。浸潤宮掖。吾觀脫鞵之圖。未嘗不嫉小人之情狀。而傷君子之踈直。惟公之高躅兮。霍神龍之不可以羈紲。矧富貴如敝屣兮。其得失又何所欣戚也。

黃山谷返棹圖贊

宋牟子才

幅巾兮野服。貌腴兮神肅。孤騫兮風雅。唾醜兮爵祿。我思古人。伊黃山谷。曷爲使之六年。棘道而九日。姑孰也。其符紹之朋黨歟。組織寺記。指摘實錄。吾觀反權之圖。未嘗不感君子之流落。而痛小人之報復。惟

公之高風兮。渺驚鴻之不可以信宿。矧吾道猶虛舟

兮。其去來又何所榮辱也。先祖存齋先生立朝剛正

乃修撰出守姑孰作脫鞞返權二圖以寓意宋臣益怒

後以資政殿大學士致仕贈光祿大夫謚清忠公於

今八十三年矣不肖孫承行省命監督海漕敬奠祠

下摩州路歸安縣尹兼勸農事年應復謹識

續古文苑卷第十三

續古文苑卷第十四

賜進士及第授通奉大夫山東通省督糧道加三級孫星衍撰
箴

邊都尉箴

漢胡廣

巍巍上聖光被八垠矧惟內面罔不來賓季末陵遲
王澤壅隔戎狄作難鬼方騷述桓桓猛將是攘是闢
殷宗周宣用顯其績大漢龍興念存治平蕩蕩率土
來同門屏守撫其民尉典其戎五才並用文武程功

陵令箴

漢胡廣

昔在黃葉葬野衣薪■禮極哀不樹不墳瓦棺望周
虞夏攸稱壤不毀膚賄不害生是蹈皇極百王此經

故厚不可始皇。薄不可王孫。案舊脫孫字今補乃眷西顧。爰矩孝文。陵臣司墓。敢告守人。

太醫令箴

漢崔寔

動不肆勤。靜不宴逸。有疾歸天。醫無能恤。晉平好內。四時是一。非鬼非食。惑以自失。雖有秦和。焉所施術。太上防疾。其次萌牙。腠理不蠲。骨髓奈何。

女師箴

漢皇甫規

觀象制教。肇經乾坤。家有王義。室有嚴君。各有定位。陰陽是分。昔在軒轅。陶化正刑。此句詳有刑於壺闈以臨百官。煌煌后妃。元統是閑。穆穆夫人。爰采潔蘩。帥禮莫違。而神罔時。怨關睢首化。萬國承流。實有淑女。

允作好逌。唐媛興媯。文母盛周。案母舊誤武今改德音不回。
宏濟大繇。咨爾庶妃。鑿輅斯邁。戰戰兢兢。厲省鞶帶。
漸進不形。變起無外。行難著而易喪。事易失而難追。
動若順流。應如發機。奉上惟敬。撫下惟慈。怨豈在明。
患生不思。

皇后箴

漢傅幹

煌煌四星。著天垂曜。赫赫后妃。是則是效。舜納二女。
對揚茂教。正位於內。頑嚚輟暴。案暴舊譌恭今正辛亂妲己。
共則情悅。此句有詳未詳牝雞亂晨。殷祀用絕。孝成寬柔。縱
弛紀綱。王擅朝權。趙專椒房。巨猾是緣。竊弄神器。故
禍不出。所憎常出。所愛是以在昔。明后。案昔舊譌日晉今正

新其化。匪唯訓外。亦訓於內。

太子少傅箴

晉傅

元

夫金木無常。方員應形。亦有隱括。習以性成。故近墨者黑。案故下當脫四字一句聲和則響清。形正則影直。正人在側。德義盈堂。鮑肆先入。蘭蕙不芳。傅臣司訓。敢告君王。

女史箴

晉裴

頤

膏不厭鮮。水不厭清。玉不厭潔。蘭不厭馨。爾形信直。影亦不曲。爾聲信清。響亦不濁。綠衣雖多。無貴於色。邪徑雖利。無尚於直。春華雖美。期於秋實。冰壁雖澤。期於見日。浴者振衣。沐者彈冠。人知正服。莫知行端。

服美動目。行美動神。天道祐順。常與吉人。

幽人箴

晉庾 敳

有物混成。先天地生。乃剖乃判。二儀既分。高卑以陳。
貴賤攸位。榮辱相換。業以上五句乾道尚謙。人神同
符。危由忽安。溢緣飾虛。苟識妙膏。厥美有腴。韓信耽
齊。殞首鐘室。子房辭留。高迹卓逸。實不足榮。利不足
希。華繁則零。樂極則悲。歸數明白。勢豈容違。人徒知
所以進。而忘所以退。穰侯安寵。襄公失愛。始乘夷道。
終嬰其類。羲和升而就翳。望舒滿而就虧。盈挹之分。
自然之規。悠悠庶人。如何勿疑。幽人守虛。仰鑽元遠。
敢草斯箴。敬咨黻冕。

太子侍臣箴

晉溫嶠

勿謂其微。覆篲成高。勿謂其細。巨由織毫。故曰善不積。不足以成名。話言如絲。而萬里來享。元以處極。而利在永貞。案元舊誤無今改是以太子之在東宮。均士抗禮。以卑厥情。入學齊齒。言稱先生。不以賢自臧。不以貴爲榮。思有虞之蒸蒸。尊周文之翼翼。晨昏靡違。夙興寔息。師傅是瞻。正人在側。屏彼佞諛。納此亮直。故傳敬德義。臣思盡忠。或稽古訓導。惟道之不融。或造膝詭辭。懼咎之蘊崇。惴惴兢兢。思二雅之遺風。鑒乎九三。天祿永終。近臣司規。敢告常從。

逸民箴

晉江道

至人應務。是統是營。乃制上下。以牧羣生。君位孰在。
匪聖伊明。賢愚相奉。臣主以成。如彼百節。各役天形。
率分委質。仰應一情。心膂有位。股肱有經。豈以處下
爲戚。爲榮。案爲榮當脫二字各安其所。舉體用平。夫設爵列
土。懸弓垂旌。卑尊之級。貴賤之名。匪以恣物之欲。實
大猷而是經。處遁之士。奚眷於時。行矣先覺。捐俗長
辭。明乎憂患。故超爾不疑。解髮靈崖。被褐絃絲。飄飄
臺上。輕舉高之。穆穆二仲。攜策相期。盤幽隱寂。與物
無治。凡厥後來。順乃所往。鑒茲俗累。戒於顛蕩。無殉
外物。心煩技養。無弃恬曠。憂勤是掌。林人司箴。敢進
善黨。

冠子箴

梁蕭子範

是月惟令。敬擇良辰。式遵士典。諮筮於賓。嘉字爰錫。醮酒方陳。禮莊爾質。德成爾身。永變童心。長移悼齒。朱錦辭髮。青紵在履。丹石爲操。冰泉厲己。務簡朋匹。田蘇遊止。在我尚謙。推物盡美。面諂退言。弗納於耳。直弦矢辭。斯爲良士。

銘

王史威長銘

漢西都時。南宮寢殿內。有醇儒王史威長。死葬銘曰。明明哲士。知存知亡。崇隴原壘。非寧非康。不封不樹。作靈乘光。厥銘何依。王史威長。

扇銘

漢傅毅

翩翩素圓清風載揚君子玉體賴以寧康冬則龍潛夏則鳳舉知進能退隨時出處

戟銘

漢李尤

枝戟之設

案枝舊誤鼓今改

以戒非常秉執操持邪暴是防

須臾之忿

案忿舊誤分今改

終身為殃山陵之禍起於毫芒

張溥輯李尤集獨缺此銘故錄之

岷涘銘

漢張休

太山雖高無得而擬劔道雖險孰可為比吁嗟此山高且險只上眡彼蒼相去能幾宜乎昆侖日月所蔽行人過茲鮮不歎涕深念於斯刊銘岷涘

漢延熹二年三月初

張休

劔銘

漢士孫瑞

臣有劔一枚駿羣標首藍田玉乞以備乏信給用左

右也

見北堂書鈔一百二十二當是序故補入於此

天生五才金德惟剛從革作辛含景吐商辨物利用
勲伐彌彰暨彼良工歐冶于將爰造寶劔巨闕墨陽
上通皓靈太平御覽三百四十四引上作精獲茲休祥剖山竭川虹
蜺消亡昭威耀武震動遐荒楚以定霸越以取強

漢鏡銘

絜精白而事君怨陰驩攬之弁明煥元錫之流澤志
疏遠而日忘慎庠美之窮嗤外丞驩之可欲說慕安

於重泉。願永思而毋紀。內請碩以昭明。光輝桌夫日
月。心忽揚而願忠。然壅塞而不池。右鏡銘內外層合
七十一二字錢氏坊
釋請碩爲清妍借硯爲之或然釋壅爲
壁則誤釋池爲施是也其文體似楚騷

又

日有熹。月有富。樂無事。常得意。美人會。竽瑟侍。商
市程。萬物平。老復丁。復生寧。

又

久不見。侍前希。秋風起。予志悲。

又

湛若止水。皎如秋日。清暉內融。菱花外發。洞照心膽。
屏除娛孽。永世作珍。服之無沫。

又

尚方御竟大母傷巧工刻之成文章左龍右虎辟不祥朱鳥元武順陰陽子孫備具居中央涑治銀錫清而明長保二親樂富昌壽敝金石如侯王

又

許氏作竟自有紀青龍白虎居左右聖人周公魯孔子作吏高遷車生耳郡舉孝廉州博士少不努力老乃悔吉

又

天地成日月明五嶽靈四瀆清十二精八卦貞富貴盈子孫寧皆賢英福祿并

座右銘

魏卞蘭

重階連棟。必濁汝真。金寶滿室。將亂汝神。厚味來殃。
艷色危身。求高反墜。務厚更貧。閉情塞欲。老氏所珍。
周廟之銘。仲尼是遵。審慎汝口。戒無失人。從容順時。
和光同塵。無謂冥漠。人不汝聞。無謂幽窅。處獨若羣。
不爲福先。不與禍鄰。守元執素。無亂大倫。常若臨深。
終始爲純。

斫猛獸刀銘

魏何晏

徒搏不兵。作戒宣丘。用造斯器。螭獸是劉。制禽允良。
昏明亶時。永釐厥後。蠲民之災。太平御覽三百四十六此下有注云言作
斬虎刀銘曰螭虎是劉案注謂唐人改虎字爲獸耳

筆銘

魏傅巽

昔在上古結繩而治降及後載易以書契書契之興
興自頡皇肇建一體浸遂繁昌彌綸羣事通遠達幽
垂訓紀典匪筆靡脩實爲心畫案畫舊誤盡今改臧否斯由
厥美宏大置類鮮疇德興之著唯道是揚苟逞其違
禍亦無方案隋書經籍志梁有尚書傳巽集二卷亡藝文類聚巽作選誤也今改正

燭銘

晉傅元

煌煌丹燭焰焰飛光取則龍景擬象扶桑昭彼元夜
炳若朝陽焚形監此無隱不彰此銘張溥傳元集不載

反金人銘

晉孫楚

晉太廟左階之前有石人焉大張其口而書其胷曰

我古之多言人也。無少言。無少事。少言少事。則後生何述焉。我讀三墳五典。八索九丘。曠罔深而不探。理無奧而不鉤。故言滿天下。而無口尤。夫唯言立。乃可長久。胡爲塊然。生緘其口。自拘廣庭。終身义手。俱上五百九十九太平御覽凡夫貪財。烈士殉名。盜跖爲濁。夷柳爲清。鮑肆爲臭。蘭圃爲馨。莫貴澄清。莫賤滓穢。二者言異。歸於一會。堯懸諫鼓。舜立謗木。聽采風謠。惟日不足。道潤羣生。化隆比屋。末葉陵遲。禮教彌衰。承旨則順。忤意則違。時好細腰。宮中皆飢。時悅廣額。下作細眉。逆龍之鱗。必陷斯機。括囊無咎。乃免誅夷。顛覆厥德。可爲傷悲。斯可用戒。無妄之時。假說周廟。於言爲蚩。

是以君子追而正之。

已上依藝文類聚十九張溥輯楚集失采御覽今補之

塵尾銘

晉王導

道無常貴。所適惟理。勿謂質卑。御於君子。拂穢清暑。虛心以俟。

黑塵尾銘

晉許詢

卑尊有宗。貴賤無始。器以通顯。廢興非己。偉質軟蔚。岑條䟽理。體隨手運。散飈清起。通彼(元)詠。申我先子。

白塵尾銘

晉許詢

蔚蔚秀氣。偉我竒姿。荏弱軟潤。雲散雪霏。君子運之。
(元)探理微。因通無遠。廢興可師。

諸葛武侯宅銘

晉習鑿齒

達人有作，振此頽風。彫薄蔚采，鳴闌

初學記

惟豐義

範蒼生，道格時雄。自昔爰止，於焉盤桓。

初學記

躬耕

西畝，永嘯東巒。迹逸中林，神凝巖端。罔窺其奧，誰測

斯歡。堂堂偉匠，婉翻陽朝。傾巖搜寶，高羅九霄。慶雲

集矣，鸞駕三招。

案三字依初學記廿四改藝文類聚作亦非

隱几銘

晉蘇彦

良匠造器，妙巧應規。俯仰灼照，商畧神奇。假物與思

須以忘疲。

隋書經籍志梁有晉北中郎參軍蘇彥彥集十卷亡

邛竹杖銘

晉蘇彥

安不忘危，任在所杖。秀矣雲竹，勁直條暢。節高質貞，

霜雪彌亮。

北堂書鈔一百三十三貞作固霜雪作負霜

圓以應物，直以居

當妙巧無功，竒不待匠。君子是扶，逍遙神王。

木弓銘

晉嵇含

烏號之朴，豐條足理。弦鳴走括，截飛駭止。射隼高墻，出有議擬。既用禦侮，亦以招士。

團扇銘

宋孫康

有圓者扇，誕此秀儀。晞露濯色，擬日定規。朗姿玉暢，

惠氣蘭披。

隋書經籍志：梁有宋征南長史孫康集十卷，亡。

齊海陵王墓銘

齊謝眺

中樞誕聖，膺^歷受命。於穆二祖，案高帝武帝也天臨海鏡。顯

允世宗。

案文惠太子也。

溫文著性，三善有聲。四國無競，嗣德

方衰。

案鬱林王也。

時惟介弟，景祚云及。多難攸啓，載驟載

獵高闕代邸庶辟欣欣威儀濟濟亦既負辰言觀帝
則正位恭己臨朝淵嘿虔思寶締負荷非克敬順天
人高遜明德帝明西光已謝東旭又良龍燾夕儼葆
挽晨鏘風搖草色日照松光春秋非我晚夜何長中
書侍郎謝朓撰此文朓集不載

鼎銘

梁周捨

天下寧康異方同軌九牧作貢百司咸理範金鑄器
式鎮階祀波圓月鏡傳之無已

洛橋銘

後魏常景

浩浩大川泱泱清洛道源熊耳控流巨壑納穀吐伊
貫周淹亳近達河宗遠朝海若兆惟洛食實曰土中

上映張柳。下據河嵩。寒暑攸叶。日月載融。帝世光宅。
函夏同風。前臨少室。却負太行。制巖東邑。峭峘西疆。
四嶮之地。六達之莊。恃德則固。失道則亡。詳觀古昔。
列見丘墳。乃禪乃革。或質或文。周餘九裂。漢季三分。
魏風衰晚。晉景彫曠。天地發輝。圖書受命。皇建有極。
神功無競。魏錄仰天。元符握鏡。璽運會昌。龍圖受命。
案此二句衍也因各本皆有姑仍之乃睠書軌。永懷保定。敷茲景跡。流
美洪模。襲我冠冕。正我神樞。水陸兼會。周鄭交衢。爰
勒洛汭。敢告中區。

石門銘

此門蓋漢永平中所穿。將五百載。世代綿迴。屯夷遞

作乍開乍閉通塞不恒自晉氏南遷斯路廢矣其崖
岸崩淪礮閣堙禡門南北各數里車馬不通者久之
攀蘿捫葛然後可至皇魏正始元年漢中獻地哀斜
始開至於門北一里西上鑿山爲道峭岨槃迂九折
無以加經途巨礙行者苦之梁秦初附實仗才賢朝
難其人裒蘭良牧三年詔假節龍驤將軍督梁秦諸
軍事梁秦二州刺史秦山羊祉建旗幡漾撫境綏邊
蓋有叔子之風焉以天峻難升轉輸難阻表求自迴
車已■開創舊路釋嶺磴之勞就方軌之逸詔遣左
校令賈三德領■一■人共成其事三德
巧思機發精解冥會雖元凱之梁河德衡之損躡未

足偶其竒。起四年十月十日。訖永平二年正月畢功。閣廣四丈。路廣六丈。皆填礮棧。豁碎嶮梁。自迴車至谷口。二百餘里。連輶駢轡而進。往哲所不工。前賢所輟思。莫不夷通焉。王生履之。可無臨深之歎。葛氏若存。幸息木牛之勞。於是畜產鹽鐵之利。紈錦芻蕘之饒。充仞川內。四民富實。百姓息肩。壯矣。自非思埒班爾。籌等張蔡。忠公忘私。何能成其事哉。乃作銘曰。龍門斯鑿。大禹所彰。茲巖廼穴。肇自漢皇。導此中國。以宣四方。其功伊何。既逸且康。去深去阻。匪閣匪梁。西帶汧隴。東控樊襄。河山雖嶮。惟德是強。昔惟畿甸。今則關疆。永懷。在人亡。不逢殊績。何用再光。

水眺悠■林望幽長夕凝曉露晝含曙霜秋風夏起
寒鳥春傷穹窿高閣有車麟麟威夷石道駟牡其駟
千載絕軌百兩更新敢刊巖曲以紀鴻塵
魏永
平二年太歲己丑正月己卯朔卅日戊申梁秦典籤
太原郡王遠書

西壁文後漢永平中開石門今大魏改正始五年爲
永平元年餘功至二年正月訖手開復之年同曰永
平今古同前極矣哉後之君子異世同聞焉

天柱山銘

後魏鄭道昭

孤峯秀峙高冠霄星實曰天柱鎮帶萊城懸崖萬仞
峻極霞亭據日開月麗景流精朝暉岩室夕曜松青

九仙儀彩餘用栖形龍遊鳳集斯處斯寧淵緜窮想
照燭空溟道暢時乘（暄）光幽明雲門煙石登之長生

天柱山銘

北齊鄭述祖

巖巖岱宗魯邦仍其致祭奕奕梁山韓國以之作鎮
蓋由拳石吐雲扶寸布雨五岳三望六宗九獻祈禱
斯應禮秩攸明天柱山者即魏故通直散騎常侍中
書侍郎國子祭酒秘書監青光相三州刺史先君文
恭公之所題目南臨巨海北眺滄溟西帶長河東瞻
大壑斜嶺槩天層峯隱日尋十州於掌內總六合於
眼中文鯨自此經傳精衛因其止息始皇遊而不返
武帝過以樂留豈直蛾眉鳥翅二別兩峻對談大小

共敘優劣者也。公稟氣辰象。含靈川嶽。禮義以成。規矩仁智。用爲樞機。自結衣冠。逞譽革履。傳聲組綬。相輝貂冕。交映。至於愛仙樂道之風。孝敬仁慈之德。張良崔廓。未之云擬。文先夏甫。何以能加。魏永平三年。朝議以此州俗。關南楚境。號東秦。田單奮武之鄉。麗其騁辯之地。民猷鄙薄。風物凌遲。謔諮俾乂。非公勿許。及駟雞御下。享魚理務。羣情款密。庶類允諧。變此澆夷之俗。侔彼禮樂之邦。懋績布在哥謠。鴻範宣諸史策。公久闊扮榆。永懷桑梓。同昇隴而灑泣。類陟岵以興嗟。於此東峯之陽。仰述皇祖。魏故中書令秘書監兗州刺史文貞公迹狀。鐫碑一首。峯之東。堪石室之

內複製其銘。余忝資舊德。力構前基。遂秉笏朝門。策
名天府。出入蕃邸。陪從帷幄。凡諸身歷。羸趙滄冀。懷
及兗光。行正十州刺史。北豫州大中正。三登常伯。再
履納言。光祿大常。頻居其任。揣究庸虛。無階至此。直
是遺薪。妄委餘慶。濫鍾何曾。不想樹嗟風。瞻天愧日。
猥當今授。踵迹此蕃。敢慕楹書。仰宣庭誨。其詞曰。

嵩高峻極。太華峭成。祈望諸素。禋禱羣經。崇哉天柱。
迴出孤亭。地險榭德。藉此爲名。赫矣先公。道深義富。
如桂之馨。如蘭之茂。尊祖愛親。存交賞舊。翻屬愚淺。
實慚穿構。

大齊天統元年歲次乙酉五月壬午

朔十八日己亥刊。使持節都督光州諸軍事車騎大

將軍中儀同三司光州刺史熒陽鄭述祖作。

吳郡橫山頂舍利靈塔銘

隋嚴德盛

竊以至理無言。非言無以寄理。元蹤無體。非體無以明蹤。然則八十種好。呈應身之妙。三十二相。表化質之妍。至如獻土童兒。聚沙稚子。尚獲無窮之報。猶成莫盡之因。況撒身命重財崇。諸聖業者矣。但樹因之最。無過起塔。崇福之重。詎甚建幢。而銀青光祿大夫吳郡太守李顯者。乃華陽杞梓。江漢芳蘭。夙布素誠。少匡王國。吐納風雷之際。出處朱紫之庭。縻爵峻於其身。隆基茂於往葉。溫良洽於郡國。孝友睦於閨門。建節贊治。張振化風。門雖望族。世載公卿。安仁樂智。

之心無違終食謙明惠厚之德造次必存仍共獎勸郡部官人奉爲皇帝皇后齊王六宮眷屬各捨七珍同崇八福在郡城之西山頂上營造七層之寶塔以九舍利置其中金瓶外重石槲周護留諸弗朽遇劫火而不燒守諸不移漂劫水而不易時有龍華道場比丘法首者歲居齟齬即起踰城之心年將志學仍持航海之操自離親捨俗三十許年洞識苦空明閑法要誠心內發冥夢外酬時聞此山爲古之佛殿乃共於此所成斯勝業願寶鐸常搖法輪恒轉含生迴向■歸心上通有頂之天傍及無邊之地同離生死之苦俱成涅槃之樂其辭曰

相焉是滅法矣。非生蓋纏虛萃。渴愛徒盈。不無不有。何體何名。業風既息。法水便清。以茲勝地。令德來持。功施合矩。化動成規。如雲出岫。狀月臨池。清流不倦。貽銘無疲。虔心局體。同歸共慕。施彼七珍。崇斯六度。下被羣品。上資天祚。萬福莊嚴。千靈輔護。少宣令問。彼秀苗蕞。業蕞舊誤聚今改輪轉三有。馳流六通。獨善非德。兼濟爲功。俱成法雨。用息塵籠。

大隋大業四年

歲次戊辰九月辛未朔八日戊寅立銘。吳郡司戶嚴

德盛製文。司倉魏瑗書。

吳郡志云寶積寺在橫山下亦名楞伽寺山頂有塔隋人

所書塔銘碑石全好案今已不存矣

萬年宮銘

唐高宗

朕聞金臺遠遶。超忽崑閬之間。玉闕參差。綿邈蓬瀛。之際。是以周王肆轍。唯招既往之僊。漢帝遐遊。空益將來之弊。豈如岐陽峻鼻。鎮茲京甸。䟽林光之別館。建甘泉之離宮。東望翦華。千林結影。西瞻隴坂。派水分流。南俯茶原。風雲交暎。北臨石柱。川■朝宗。迴迴孤岑。秀三襲於震表。斜斜危路。環九折於雲心。複澗澄陰。扇炎風而變冷。重巒潛暑。韜夏景而飜寒。故知五鎮之基。空号神州之地。三仙之嶺。虛傳靈府之都。未若翦石裁宮。構飛檐於迴漢。騰虛架宇。聳紫殿於遙空。百仞朱樓。月盈虧於青瑛。千尋翠閣。雲舒卷於丹墀。岫綴霞衣。點虹梁而散錦。巖懸溜帶。瀆石砌而

飛珠浮涼氣於彤闈。庭留花而雪夏。凝清陰於碧沼。池結鏡而冰春。泉起花岑。■雙蓮而吐秀。波搖錦石。皎兩鏡而騰暉。幾片斷雲。縈松合蓋。數蓂幽桂。插月分香。暝壑栖煙。籠千崖而散碧。朝原上日。輝四野而舒紅。笑樹餘花。低空落影。吟風宿鳥。響谷雙騎。援不恨而虛啼。蝶無癡而起舞。朕載懷千古。流鑒百王。思欲屏逸收驕。怡神遣慮。崆峒訪道。欽往哲之高風。姑射尋真。挹先賢之宿志。所以停軒禁蘂。駐蹕榆川。非欲賞恣盤遊。途窮轍迹。加以時侵首夏。日■餘春。露泣脩篁。風清邃澗。松蘿雲起。藤葛星懸。可以陶瑩心靈。澄清耳目。鏡冰霜則廉潔。斯在。撫松筠則貞操。非

遙昔姬后西征。猶刊弁石。秦皇東指。尚勒稽峯。勝
地淹留。何必華胥之國。蕭然物外。不假元圃之阿。故
以劭美千齡。騰徽萬古。景其前躅。爰紀茲地。其銘曰。
靈山作鎮。挺秀岐陽。遠圖天柱。迴儷瑤房。鸞驕淑氣。
花泛韶光。樹含冬霰。巖留夏霜。構宇重巘。栽基疊岫。
石砌披錦。山窓點繡。佩小蘭新。峯殘蓮舊。雪徑常花。
冰溪恒晝。標途天外。聳闕雲端。煙霾邃谷。霧宿危巖。
徑湍彤闈。潛暑翠幌。凝寒憩駕。離宮淹留。禁苑柳初眉細。
潭深鏡遠。蓋逐雲穿。苔隨溜卷。葉冷惟秋。疋濃若晚。泉飛嶺腹。
景鏤巖心。霞䟽錦薄。草密袍深。露荷傾玉。風螢散金。檐空鷁靜。
山昏日沈。

丘壑怡神，林篁賞性。千里眺覽，八州澄鏡。玉燭調序，薰琴動詠。仰則茨山，刊規遠映。大唐永徽五年歲次甲寅三月景午朔十五日庚申建。

唐西明寺鐘銘

維大唐麟德二年歲躔星紀月次降婁二月癸酉朔八日庚辰皇太子奉爲二聖於西明寺造銅鐘一口可一萬斤發漢水之奇珍採蜀山之秘寶虞倕練火晉曠飛鑪帶龍虛而騰規應鯨桴而寫製聲流九地遐宣厚載之恩韻徹三天遠播曾旻之德寤羣生於覺路警庶類於迷塗業擅香垣功齊塵劫式旌高躅敢勒貞金頌其銘曰。

青祇薦祉，黃離降精。渦川毓德，瑤嶺飛英。吹銅表性，問寢登情。興言淨業，載啓香城。七珍交鑄，九乳圖形。翔龍若動，偃獸疑驚。制陵周室，規踰漢庭。風飄旦響，霜傳夜鳴。仰延皇祚，俯導蒼生。聲騰億劫，慶溢千齡。

姚元景造象銘

竊惟大雄利見，宏濟無邊。真諦克明，神通自在。是以三千世界，禪河注而不竭。百億須彌，甘露灑而恒滿。歸依妙理，無乃可乎。朝散大夫行司農寺丞姚元景，慈悲道長，忍辱心遐。悟朱紱之儻來，沿紺池而利往。發願上下平安，爰於光宅寺法堂石柱造像一鋪。爾其篆刻彰施，儀形圓滿。真容湛匿，坐青石而披蓮。法

柱承而排紺霄而舞鸛雲②開朗金光炳然風塵晦
冥玉色逾潔身不可垢道必常明宴坐經行善宏多
矣俾我潘輿盡敬將法輪而恒轉姜被承歡曳天衣
而下拂崑丘燎火還披鷲嶺之雲寶劫成塵蘄滌龍
宮之水廼爲銘曰

法無上兮神化昌流妙宇兮爍容光
彌億齡兮慶未央
長安四季九區十八②書

晉史憲銘

唐史 疑

伊昔有熊道德資始名列五帝澤流千祀文捨伯邑
武興太史官有世功春秋所紀衛尉疇嗣孝成以康
將軍樹績光武其昌事列盟府功書太常源分陸海

派別三江，懿彼侍中。飛纓殿內，爲王之伯。熙帝之載，
左貂右蟬。切問近對，八舍攸履。七車不昧，散騎帝友。
朝夕進規，奉輿肅事。贊道攸宜，有濟之論。兼濬之儀，
獻替之美。復在於斯，桓桓積石。允文允武，外擅爪牙。
內爲心膂，氣逸南仲。才高召虎，作師之貞。爰誓其旅，
豫章太守。人之領袖，如玉之貞。如松之茂，共理天下。
實資時秀，良二千石。抑非虛授，惟君挺生。材術縱橫，
黃裳元吉。白賁永貞。荆巖植潤，漢水騰明。是謂家寶，
膺茲國楨。英英學藝，爲郎滿歲。紫帳趨榮，青縑沐惠。
王譚練習，鄭泰才計。持實有章，大猷無替。悠悠廣熙，
南海之湄。言典斯郡，遠予將之。變其風俗，鎮以宣慈。

人斯攸賴。吏不忍欺。列郡之政。茲焉爲盛。開國承家。大君有命。山川光錫。圭組輝映。是曰懋功。往哉惟敬。重此台望。期諸棟隆。初欣鄭鹿。奄歎虞鴻。麟傷孔子。馬思滕公。死而可作。善始令終。言式其墓。岬山之路。如斧載形。廣輪爲度。委鬱松楨。蒼茫草露。萬古同悲。千春罷曙。猗歟雲允。世豈乏賢。不忘其本。願述其先。陸家茂德。潘氏流泉。■聲懿範。日月俱懸。案建康志考證云晉書憲爲尚書山陰侯史嶷撰神道碑唐景龍四年作其碑字多磨滅是周應合所見銘文尚可讀今則亡其石矣錄載銘中取與王史威長海陵王一例也

景龍觀鐘銘

原夫一氣凝真。含紫虛而構極。三清韞祕。控碧落而

崇因雖大道無爲濟物歸於善貸而妙門有教滅咎
在於希聲景龍觀者中宗孝和皇帝之所造也曾城
寫質閤苑圖形但名在騫林而韻停鐘簋朕翹情八
素締想九元命彼鼓延鑄斯無射考虞倕之懿灑得
晉曠之宏規廣召鯨互遠徵鳧匠耶溪集寶麗壑收
珍警風雨之辰節昏明之候飛廉扇炭屏翳營鑪翫
鶴呈姿蹲熊發狀角而不震侈而克揚庶其曉散靈
音鎮入鵲鸞之殿夕騰仙韻恒流鳩鵲之闈聳俗聽
而咸痊迷方聞而永悟洪鈞式啓寶字攸鐫其銘曰
紫宸御歷青元樹曰傾巖集寶竭府收珎杜夔律應
張永規陳形包九乳儀超萬鈞上資七廟傍延兆人

風嚴韻急，霜重音新。自茲千歲，從今億春。懸玉京而
薦福，侶銅史而司辰。景雲二年太歲辛亥，金九
月癸酉，金朔一十五日丁亥，土鑄成。

唐渾儀銘

後魏太史令晁崇修渾儀以觀星象，按其儀以永興
四年歲次困敦。原注：王子也。案是歲王子。創造傳至後魏末，入齊。

往周隋，至于大唐，歷年久遠，儀蓋傾墜。以太史原注

歷正也。去景雲三年，奉勅重令脩造，使銀青光祿大夫

檢校將作少監楊務廉與銀青光祿大夫行太史令
瞿曇悉達正議大夫行太史令李仙宗試太史令殷
知易、荊州都督祕書監兼右衛率薛玉、銀青光祿大

夫檢校祕書監吳師道正議大夫行祕書少監閭朝
隱等首末共營各盡其思至先天二年歲次赤奮若
原注丑也案是歲癸丑成其銘曰

周天三萬七千里分寸無欺成歲三百六十日盈縮
有期敬之敬之以授人時

號國公楊花臺銘并序

唐申屠液

原夫真性即空從色聲而有相道源無體因法教以
沿流所以人天捨千萬之資神鬼建由旬之塔金衣
紺髮盡留多寶之臺銀疊青蓮並入真珠之藏湛然
釋氏一千餘年輔國大將軍號國公楊等皆天子貴
臣忠義盡節布衣脫粟將軍有丞相之風牛車鹿裘

驃騎減中人之產。爰抽淨俸。申莊嚴之事也。華簷覆像。盡垂交露之珠。玉砌連龕。更飾雄黃之寶。風箏逸韻。飛妙響於天宮。花雨依微。灑輕香於世界。猶恐蓬萊兼變。石折不周。仍鑿長者之經。必勒輪王之偈。書工紀事。廼爲銘曰。

昭昭大覺。巍巍聖功。身融剎海。願洽虛空。閉衆趣以窒惕。闡(元)門以包蒙。物成緣而必應。理無幽而不通。有美至人。股肱良臣。受聖寄狂。聞難經綸。英謀貫士。韜略通神。一蒙金鉞。屢建華勛。善代不伐。功成不居。功歸天子。善托真如。乃貢靈相。用答冥符。佛心雖空。佛福常在。願普此因。同臻性海。

開元十二年十

月八日判官亳州臨渙縣尉申屠液撰

案此序及銘在西安府花

塔寺分刻序與銘各為一石故於銘前另題云揚將軍新在像銘著錄金石者多分為二王氏萃編始知其誤今從之去

古井銘

唐趙光乘

天寶九載冬十月尉趙光乘檢校造因勒銘云

費城之井昭然道周土缶舊得石幹今修徵大易之

不改垂一善於千秋末有紹聖四年逢完題字井在

得攢羊之井費即季氏邑此銘前人未載

崑臺銘

唐元結

浯溪東北廿餘丈得怪石焉周行三四百步從未申至丑寅崖壁斗絕左屬回鮮前有磴道高八九十尺

下當洄潭。其勢礪礪。半出水底。蒼蒼然泛泛。若在波
上。石顛勝異之處。悉爲亭堂。小峯嵌竇。宜閒松竹。掩
映軒戶。畢皆幽竒。於戲。古人有畜憤悶。與病於時俗
者。力不能築高臺以瞻眺。則必山巔海畔。伸頸歌吟。
以自暢達。今取茲石。將爲嵒臺。蓋非愁怨。乃所好也。
銘曰。

湘淵清深。嵒臺隋陵。登臨長望。無遠不盡。誰厭朝市
羈牽。局促借君。此臺壹縱心目。陽崖龔琢。如瑾如珉。
作銘刻之。彰示後人。
有唐大(歷)二年歲次丁未
六月十五日刻。河南元結字次山撰。

唐頌銘

唐元結

浯溪之口有異石焉高六十餘尺周回四十餘步西

面在江中

篆西篆作幽古文也或釋爲山者非

東望嵒臺北面臨大淵

南枕浯溪唐廡

即亭

當瘁石上異木夾扉

即戶

踈竹

旁簷瀛州言无諤

即由

此可信若在廡上目所厭者

遠山清川耳所厭者水聲松歛霜朝厭者寒日方暑

厭者清風於瘁厭不厭也厭猶愛也命曰唐廡旌獨

有也銘曰

一名之五罍

即寅字

得木土林埜之客所耽水石年猶

即將

五十始有唐廡愜心自適與世忘情廡旁石上

篆刻此銘

有唐大

歷

貳年歲次戊申閏六月九

日

東厓銘

唐元結

崑臺西面，敝伎高迴。在唐亭爲東厓，下可行坐八九人。其爲形勝，與石門石屏亦猶宮羽之相資也。銘曰：崑臺蒼蒼，西厓雲端。亭午厓下，清陰更寒。可容枕席，何事不安。

大岷山銘

唐洪經綸

登於大岷，命古文所經過，頂凸坤儀，根壓洪河。天生忠良，濟物宏多。山靈河神，俾環海戢戈。

唐建中元年四月廿六日，勅魏博成德幽州等道黜陟使諫議大夫洪經綸題。

石刻在黎陽山，以黎陽爲大岷，承臣攢之誤。大岷當在今汜水，不在濬縣也。

唐濟瀆廟北海壇二所新置祭器沈幣雙舫雜

物之銘并序

唐張洗

有唐六葉海內晏然偃革■儒崇乎祀典封茲瀆爲
清源公建祀於泉之初源也置瀆令一員祝史一人
齋郎六人執魚鑰備灑掃其北海封爲廣澤王立壇
附於水之濱矣天子以迎冬之日命成周內史奉祝
文宿齋毳冕七旒五章劍履玉珮爲之初獻縣尹加
繡冕六旒三章劍履玉珮爲之亞獻邑丞元冕加五
旒無章亦劍履玉佩爲之終獻用三牲之享邦之大
事先在祀乎濯纓不才謬領茲邑下車入廟每事皆
問主者有云俎豆素闕弊難悉數其尤者有五北海

望壇臨事壘土朽椁一歲而費數金爲勞之甚其弊一也二所祭器凡百有二十二事至時請於上察轉轂入洛去來三百餘里仍以稅緡酬之積有歲時不知窮極其弊二也沈幣雙舫又以車取沁河渡口之舟往返之勞結綵之飾其弊三也兩壇位席百領有餘戶至誅求爲擾非潔其弊四也牀榻乃至匕箸器用之類門到斂索事終存亡太半其弊五也旣革前弊輒爲之銘銘曰

寤寐求思如神有知大風離披壞木於斯人吏驚馳念茲悟茲前年夏及今年春大風壞楸槐數株因用此材而爲祭器兼沈幣之舫也爲余有意廟中無備沈幣雙舫二壇祭器子來悅使所借

皆遂觀者闐闐事無闕焉刻之於石以俟後賢是時也貞元十有三年朝散大夫行河南府濟源縣令張洗字濯纓撰

軒轅黃帝鑄鼎原碑銘并序 唐王 顏

惟天爲大惟帝堯則之惟道爲大惟黃帝得之南華經曰道神鬼神帝生天生地黃帝守一氣衍三墳以治人之性命廼鑄鼎茲原鼎成上升得神帝之道原有爲谷之變銘紀鑄鼎之神銘曰

道匪神帝帝在子人大哉上古軒轅爲君化人以道鑄鼎自神漢武秦皇仙冀徒勤去道日遠失德及仁恭惟我唐元德爲鄰方始昌運皇天所親唐與茲原

名常鼎新。

虢州刺史太原王顏撰。華州刺史兼

御史中丞陳郡袁滋籀書。唐貞元十七年歲次辛巳正月九日癸卯建。

南溪元巖銘并序

唐李涉

桂爲郡也。巖其先之。有井室人民百千祀矣。居是邦者。匪哲則豪。何四三里之內。而巖不載於前籍。爲巖將屈於古。而合伸於今哉。爲人未知其巖。巖俟人以時哉。青溪子昧而未詳也。予之仲曰渤。受天雅性。生不雜玩。少嘗讀高士傳。列仙經。遊衡霍幽遐之境。巢嵩廬水石之奧。凡俗所覲。必皆礮磨大璞。翦鑿遺病。意適而制。非主於名寶。歷初。自給事中。出藩於桂。一

之年治鄉野之病。二之載搜郭郭之遺。得隱山元巖冥契素尚。余因謫去炎海。途由桂林巖之勝。再遂其賞。勒銘洞石。表遠跡於他年。銘曰。

桂之有山。潛靈億年。拔地騰霄。戟列刀攢。巖之有洞。窈窕鬱盤。虎挂龍懸。形狀萬端。威馳杳冥。仰沓巒岈。玉落磬墜。幽聲晝寒。巴陵地道。小有洞天。文籍之聞。吾何有焉。酒一卮兮琴一曲。堪巖之下。可以窮年。

青溪子李涉。

後浯溪銘

唐王邕

歸然岵臺。枕於祁陽。迥然楚方。臨於瀟湘。孤標一峯。不止百尺。嵯峨巨峻。潔堪礪。英才別業。雅有儒風。

河南元公高卧其中。位爲獨坐。人不知貴。興愜茲地。心閑勝事。松花對偃。薜葉交垂。鑿巘作逵。因泉漲池。乃構竹亭。乃葺茅宇。羣書當戶。靈藥映圃。嘉賓駐舟。愛子能文。弄琴對雲。酒熟蘭薰。何必磻溪。方可學釣。何必衡嶠。方可長嘯。我牧此郡。契於幽尋。刻銘山岑。敢告烟林。

修養雜訣氣銘

一氣未分。三才同源。清濁旣異。元氣各存。天法象我。我法象天。我命在我不在於天。昧用者天。善用者延。性和志寂。守一神閑。靈芝在身。不在於山。返一守和。理合元元。精極乃明。神極乃靈。氣極乃精。無氣乃冥。

因氣而衰。因氣而榮。因氣而死。因氣而生。喜怒亂氣。性情交爭。擁構成患。神形豈寧。鍊陽銷陰。其氣自行。以正遠邪。其患自平。乾坤澄淨。子後午前。閉目平空。握固冥然。納息虛中。吐息天關。入息微微。出息絲絲。以意引氣。臟腑迴旋。然後呵之。榮衛通宣。但有不和。遣之踵前。五呵六呵。無疾不蠲。凡欲胎息。導引爲先。經脉不擁。關節不煩。或如射雕。側身彎環。或舉腰膝。如蟾半圓。交匝腦後。左旋右旋。勁展兩足。氣出指端。擺掣四肢。捉搦三關。熟摩尺澤。氣海亦然。叩齒集神。合眸固關。真心忘形。任意往還。覺氣調勻。擁塞喉閒。擁氣則咽。三五相連。轉舌漱入。咽下丹田。以意送之。

令聲汨然一咽三咽再咽如前三十六咽胎息成焉
大道無爲爲於無爲不爲爲爲莫若無爲不思爲思
莫若無思萬法自然不假施爲不寒不熱不渴不飢
恬淡無爲以道自怡妙中之妙微中之微懷道君子
銘之佩之

唐鏡銘

絕照覽心圓輝矚面藏寶匣而光掩挂玉臺而影見
鑿羅綺於後庭寫衣簪乎前殿

又

團團寶鏡皎皎昇臺鸞窺自儻照日花開臨池似月
覩兒嬌來

又

月樣團圓水樣清。好將香閣伴閑身。青鸞不用羞孤影。開匣當如見故人。

許長史井銘

宋徐鉉

長史含道棲真九天人。非邑改丹井存焉。射茲谷鮒。冽彼寒泉。分甘玉液。流潤芝田。我來自西。尋真紫陽。若愛邵樹。如升魯堂。敬刊翠琰。永識銀牀。噫嗟後學。挹此餘光。此銘集內未載

盧縣說性亭銘

宋申革

我饗皇澤。粵自前年。罷秩浙右。宰邑河邊。下車餘月。曾不怡顏。蓋其公舍。鄙陋非全。俄選隙地。構亭成閒。

茅覆其上。莎植其前。南瞻巨浸。西逼深泉。北依綠樹。東對岑山。周回顧望。景色相連。自公之暇。據此幽閑。命題說性。孰謂不然。勒銘因事。萬世絲絲。

皇宋淳化二年十月廿日立。

碑在陽穀安樂鎮山左。金石志缺載。予始訪得。

故存其文

泰山天門銘

元杜仁傑

元氣裂。兩儀具。五岳峙。真形露。惟岱宗。儼箕踞。仰彌高。屹天柱。浩千劫。窒來去。誰爲鑿。起天慮。非斤斧。乃祝詛。一竅開。達底處。十八盤。盤千步。薺初吐。抱圍樹。日車吳。慘曦馭。六龍頽。莽迴互。踏此往。嘉無數。無懷下。兵刑措。七十君。接鑿輅。聖道熄。彝倫斲。揖讓歇。篡

奪虜忽焉闔。梗無路象緯森。勅訶護朝百靈。由茲戶。
金璀璨。朱閒布。九虎蹲。萬夫怖。我欲叩。閹者怒。闢何
時。坦如故。對冕旒。獲控翹。豁蒙蔽。泄塵霧。刮政疵。剔
民蠹。上得情。下安作。額血殫。帝聰悟。崖不磨。蒼壁豎。
刻我銘。期孔固。垂萬世。正王度。

續古文苑卷第十四

續古文苑卷第十五

賜進士及第授通奉大夫山東通省督糧道加三級孫星衍撰
碑志一

三公山碑

元初四年常山相隴西馮君到官承饑衰之後衆惟
三公御語山三條別神迥在領西吏民禱祀興雲膚
寸徧雨四維遭離羌寇蝗旱鬲斥民流道荒醮祠希
罕敬奠不行由是之來和氣不臻乃來道要本根其
原以三公息廣其靈尤神處幽道艱存之者難卜擇
吉土治東就衡山起堂立壇雙闕夾門薦牲納禮以
寧其神神熹其位甘雨屢降報如景響國界大豐穀

斗三錢民無疾苦永保其年長史魯國顏浮五官掾
 閻格戶曹史紀受將作掾王籊元氏令茅匡丞吳音
 廷掾郭洪戶曹史翟福工宋高等刊石紀焉翁氏釋文規誤

作視衡山上脫就字

漢滎口石門碑

漢邊韶

惟陽嘉三年二月丁丑使河隄謁者王誨疏達河川
 適荒庶土往大河衝塞侵齧金堤以竹籠石葺土而
 為埭壞隕無已功消億萬請以濱河郡徒疏山采石
 壘以為障功業既就徭役用息辛未詔書許誨立功
 府卿規基經始詔策加命遷在沈州乃簡朱軒授使
 司馬登令纘茂前緒稱遂休功登以伊洛合注大河

南則緣山東過大伾回流北岸其勢鬱蒙濤怒湍急
激疾一有決溢彌原淹野蟻孔之變害起不測蓋自
姬氏之所常感昔崇鮪所不能治我二宗之所劬勞
於是乃跋涉躬親經之營之比率百姓議之於臣伐
石三谷水匠致治立激岸側以捍鴻波隨時慶賜說
以勸之川無滯越水土通演役未踰年而功程有畢
斯乃元勲之嘉課上德之宏表也昔禹修九道書錄
其功后稷躬稼詩列於雅夫不憚勞謙之勤夙興厥
職充國惠民安得湮沒而不章焉故遂刊石記功垂
示於後其辭云云案酈氏云石銘歲遠字多淪
缺其所滅蓋闕如也謂此使河
隄謁者山陽東緡司馬登字伯志代東萊曲成王誨

字孟堅河內太守宋城向豹字伯尹丞汝南鄧方字
德山懷令劉丞字季意河隄掾匠等造陳留浚儀邊
韶字孝先頌碑云陳留邊韶字孝先頌漢人立碑之
載撰又姓氏者惟此又云伊洛合注大
河南則緣山東過大伾足證漢人所言大
伾在成皋不如臣瓚以黎陽山當之也

敦煌太守裴岑紀功碑

惟漢永和二年八月敦煌太守雲中裴岑將郡兵三
千人誅呼衍王等斬馘部衆克敵全師除西域之灰
同災蠲四郡之害邊竟艾安振威到此立海祠以表萬
世海祠言祠在西
海或作德祠誤

濟陰太守孟郁修堯廟碑

漢永康元年■月■惟昔帝堯聖德慶苞宏號赫

赫蕩蕩垂基。赤精之胃。爲漢始別。陵氣炎煜。上交倉
元。魏魏之盛。乾川見徵。敬修宗壑。長吏奉祠。三牲粢
饌。獻珍于時。俵著燿銘。宣颺厥休。乃招禎祥。萬
來。鴻名遂顯。傳于千秋。

濟陰太守河南偃陟孟府君諱郁字敬達治尚書經
博覽衆文天姿瑋度體性溫仁闕極道之要妙游觀
六藝之原掇旋機之政務在濟民歷典六郡威教若
神遺訓垂歌淵懿允純功績煥炳恩如浩倉咨招巖
穴股肱賢良廣祈多福雯雯夙興聞帝堯陵在成陽
遣戶曹掾史具中牢祠常以甲子曰與西宮樂生俱
詣大聖陳上古之禮舞先王之樂鞀磬祝圖五音

之儀莫不盡備。敷列技藝以榮大聖。延熹十年仲春二月。陽氣浸陰。始雩來享祀羣神。仰瞻雲漢。孟府君奉宣詔書。行縣到成陽。將辭帝堯。行禮未周。則景雲四集。翔風膏雨。即時大降。嘉澍優沾。利茂萬物。陰陽和協。百姓賴福。是時欣然悅。諸產繁殖。倉庾充塞。孟府君深惟響應。效之經典。知聖堯精靈與天通神。修治墜地。致墻堦石關二坐。昭配帝圖象。規矩五畫。上下相承。無所遺失。陟工旌密。有班道之巧。使府內百石城。吳諱升字三君。守衛園陵。興置屋。詔書大祠。升與縣令丞恭奉肅敬。齊絜炊爨。莫不雍雍。列種柏樹。吏卒養護。南通靈

臺東注城域委曲月市。墀然■望圖紀萬世功驗永著。時令河南河南呂君諱亮字元山宰政宣化慈惠博覆爲藜元來福奉事大聖司司不解垂拱無爲如治。案今本隸釋誤治爲始據洪文惠跋云其言無爲如治正之如即而字也其允君也。丞河內州王諱萇字伯盛左尉潁川潁陽■諱愴字世高皆闕綜睢藝通洞運度詢于上下僉然同謀因孟府君飭治大壑自率掾史■駐駕便坐南北■望表內相副赫如屋赭蘭然成就孟府君必受大聖嘉福公侯傳子孫濟陰吏士歌術功稱萬世常存成陽丞民蒙其榮賜■訓發聲呂君諸壁干祿于天令裕衍蔓永汜无窮。

惟序仲氏祖統所出本繼於姬周之遺苗天生仲山
甫翼佐中興宣平功遂受封於齊周道衰微失爵亡
邦後嗣乖散各相土譯居帝堯萌兆生長葬陵在於
成陽聖化常存慕魏魏之盛樂風俗之美遂安處基
業屬都鄉高相里因氏仲焉以傳于今子孫承緒履
仁好義耽樂道術教授經業雍徒帶衆滋滋汲汲誨
人不倦海內稱之曰鴻術之宗天監孔明祚善應
印紼相承銀艾不絕稟性乾元世世廉約故能高如
不危滿如不溢孟府君繕飭殿牆立百石舍仲氏宗
家共作大壑前石礪階陞欄楯貧富相扶會計欣懽
不謀同辭錢應時即具招工募石燿然俱至各進琦

巧不日成之。詔書九月三往。大祠諸所。造作煥然成。就仲氏宗家。並受福賜。復刊碑勒諫。昭示來世。表著孟府君美勛於陽。昧疑作聃字紀祖禪所出。官位宦學。皆不可測。子子孫孫。必蒙大聖。休烈之福。以勸後進。昌熾無極。

淳于長夏承碑

君諱承。字仲亮。東萊府君之孫。大尉掾之中子。右中郎將弟也。累葉牧守。印紱典據。十有餘人。皆德任其位。名豐其爵。是故寵祿傳于歷世。策薰著于王室。君鍾其美。受性淵懿。含和履仁。治詩尚書。兼覽羣藝。靡不尋賜。州郡更請。屈己匡君。爲主薄。督郵。五官掾。功

曹上計掾守令冀州從事所在執憲彈繩糾枉忠絜
清肅進退以禮允道薦愛先人後己克讓有終察孝
不行大傅胡公歆其德美旌招俯就羔羊在公四府
歸高除淳于長到官正席流恩褒善糾姦示惡旬月
化行風俗改易轡軒六轡飛躍臨津不日則月皓天
不弔殲此良人季五十有六建寧三季六月癸巳淹
疾卒官嗚呼痛哉臣隸辟踊悲動左右百姓號咷若
喪考妣咳孤憤泣忉怛傷摧勒銘金石惟以告哀其
辭曰

於穆皇祖天挺應期佐時理物紹縱先軌積德勤約
燕于孫子君之羣感並時繁祉明明君德令問不已

高山景行。慕前賢。烈庶同如蘭。意願未止。中遭冤天。
不終其紀。夙垂靈祚。早喪懿寶。抱器幽潛。永歸蒿里。
痛矣如之。行路感動。黨魂有靈。罔後不朽。

成陽靈臺碑

惟帝堯母。昔者慶都。兆含穹精。氏姓曰伊。體蘭石之
操。履規矩之度。則乾川之象。通三光之曜。游觀河濱。
感赤龍交如生。堯厥後。堯來案當是祖統。慶都告以

河龍。堯歷三河。有龍授圖。躬行聖政。以育苗萌。火陽
之盛。先閭後明。遂以侯伯。迹踐帝宮。慶都僊歿。蓋死
于茲。欲人莫知。名曰靈臺。上立黃屋。堯所奉祠。下營
以水。神龍所熹。靈龜隱刑。汾踊波流。比目鮪魚。濯鱗

通泉元礫菟蠶生。造臺涯貫長歷久。崇如■■三代
改易荒廢不脩。五運精還漢受濡期。興威繼絕如堯
爲之承祠基年。鮪魚復生故有靈臺。畜夫魚陟衛仕。
驛憲鮪魚服之。逆壽■■之際道小衰沮。遂遭亡新
禮祠絕矣。於是故廷尉仲定深惟大漢隆盛德。彼四
表大平未至。靈瑞未下。四夷數侵軍甲數擾。匪皇啓
居日禘不夏。案經考典。河洛祕奧。漢感赤龍堯之苗
胄。當脩堯祠。追遠復舊。復治黃屋。推原聖意。災生變
見。天以譴告。前後奏上。陳敘大義。招祥塞咎。爲漢來
祚。朝廷克省。帝納其謀。歲以春秋奉大牢祠。時廷尉
選位連自兩漢金石記云所見重刻表奏。詔英嘉命。

選位連自

兩漢金石記云所見重刻
本作白洪作自當是說

表奏詔英嘉命

遂見聽■■爲大中大夫歸治黃壁令月吉日圖立
規塋興業會工厥覆夷平上合天意下應■■
■餽五色華精上重刻本闕通天戶嚮少陽前設大
壁俟神之堂地致石墀其下清涼可舞八■以■大
章時濟陰太守魏郡審晃成陽令博陵管遵各遣大
掾輔助仲君經之營之不日成之神靈精氣依怙於
人廢之則亡存之則神復帥羣宗貧富相均共慕市
碑著立功訓■勒石銘中門之表卜擇元日齊革精
誠先薦毛血謹慎犧牲祈祠獲福神享其靈甘雨時
降百穀孰成幽荒率服徐方來庭萬國蒙祉犁元賴
榮莫不被德咸歌頌聲其辭曰

於赫慶都。德彊大兮。承神精耀。統赤裔兮。爰生聖堯。
名蓋世兮。上受符命。迓帝制兮。廣彼之恩。流荒外兮。
歷紀盈千。垂遺愛兮。陵廟復崇。享大祭兮。上來多怙。
降福沛兮。萬國禧寧。孰不賴兮。光宣美勛。永■幣兮。
垂視罔極。億萬歲兮。

濟陰太守魏郡陰安審君諱晃字元讓從公車令來。
成陽令博陵彘吾管君諱遵字君臺從東明門司馬
來丞潁川新汲尹茂字伯舉遷下邳尉尉潁川襄城
楊調字君舉仲訢伯海從右中郎將遷鉅鹿太守仲
球伯儀從大尉掾遷呂長仲選孟高辟司徒府遷徙
不絕皆興治大聖黃屋之力。

建寧五年五月造。

司隸校尉楊淮碑

故司隸校尉楊君厥諱淮字伯邳舉孝廉尚書侍郎上蔡雒陽令將軍長史任城金城河東山陽太守御史中丞三爲尚書尚書令司隸校尉將作大匠河南尹伯邳從弟諱弼字穎伯舉孝廉西鄂長伯母憂去官復舉孝廉尚書侍郎遷左丞冀州刺史大醫令下邳相元弟功德牟盛當究三事不幸早隕國喪名臣州里失覆二君清頌約身自守俱大司隸孟文之元孫也。

黃門同郡卞玉字子珪以熹平二年二月廿二日謁

歸過此。追述勒銘。故財表記。財即昇字。或誤釋爲財。

武都太守耿勲碑

漢武都太守右扶風茂陵耿君諱勲字伯瑋其先本自鉅鹿世有令名爲漢建功俾侯三國卿守將帥爵位相承呂迄于君君敦詩說禮家仍典軍壓難和戎武慮慷慨呂得奉貢上計廷陳惠康安遏之謀上納其謨拜郎上黨府丞掌令考績有成符莢乃洪闕今補脰熹平二年三月六日郎洪癸酉到官奉宣詔書哀閔垂恩猛不殘義寬不宥姦喜不縱慝威不戮仁賞恭罰否昇主今洪闕補奧流其於統系洪闕今補寵存贈亡篤之至也歲在癸丑厥運淫雨傷害稼穡率土普議開倉振澹

身冒炎赫火星之熱。至屬縣。巡行窮匱。陟降山台。經

營拔涉。草止露宿。扶活餐洪闕今補兩漢金餐洪作石記云下半從食餐今

改千有餘人。出奉錢市洪誤作洪誤衣。賜給貧

乏。發荒田耕種。賦與洪闕寡獨王佳小男楊孝等三

百餘戶。減省貪吏二百八十人。勸課洪勉趨時。百姓樂

業。老者得終其壽。幼者得呂全育。甘棠之愛。不是過

矣。又開故道銅官。鑄作錢器。興利無極。外羌且居洪闕

補等。佈威悔惡。重譯乞降。修治狹道。分子効力。復大

洪闕此二字小民洪如農得眾北之歡心。可謂印之若明神

者已。夫美政不紀。人無述焉。國人僉洪誤命。嘆刊勒斯

石。表示無窮。其辭曰。

泰華惟岳，神曜吐精，育茲令德，既喆且明，寔謂耿君。

天胙顯榮，司牧莅政，布化惟成，柔嘉惟則，穆如風清。

勤卹民隱，拯阨扶傾，匪皇啓處，洪東撫西。

征赤子遺慈，呂活呂生，山靈挺寶，凶災洪乃洪誤。

平愷悌父母，民賴呂寧，熹平三年四月廿日壬

戌，西部道橋掾下辨李禔造。此碑校隸續有不同，及多出者詳每字下。

豫州從事尹宙碑

君諱宙，字周南，其先出自有殷，廼迄于周，世作師尹。

赫赫之盛，因以爲氏，吉甫相周，宣勛力有章，文則作

頌，武襄獫狁，二子著詩，列于風雅，及其元孫言多，世

事景王，載在史典，秦兼天下，侵暴大族，支判流僊，或

居三川。或徙趙地。漢興以三川爲潁川。分趙地爲鉅
饒。故子心騰於楊縣。致位執金吾。子孫以銀艾相繼。
在潁川者。家于僑陵。克纘祖業。牧守相亞。君東平相
之元。會稽大守之曾。富波侯相之孫。守長社令之元
子也。君體溫良恭儉之德。薦親於九族。恂恂于鄉黨。
交朋會友。貞賢是與。治公羊春秋經。博通書傳。仕郡
歷主簿。督郵。五官掾。功曹。守昆陽令。州辟從事。立朝
正色。進思盡忠。舉衡以處事。清身以厲時。高位不以
爲榮。卑官不以爲恥。含純履軌。秉心惟常。京夏歸德。
宰司嘉焉。季六十有二。遭離寢疾。熹平六年四月己
卯卒。於是論功敘實。宜勒金石。乃作銘曰。

於鑠明德于我尹君龜銀之冑奔世載勛綱紀本朝
優劣殊分守攝百里遺愛在民佐翼牧伯諸夏肅震
當漸鴻羽為漢輔臣位不福德壽不隨仁景命不永
早即幽昏名光來世萬祀不泯

溧陽長潘乾校官碑

蓋漢三百八十有七載
斯金石其誄曰
于
銘功著

溧陽長潘君諱乾字元卓陳國長平人蓋楚太傅潘

崇之末緒也君稟資南霍洪闕今補之禔洪闕今補天洪闕今補

單禧釋文兩漢金石記德之絕捺髻髦克洪闕依敏

釋作神天上■作有洪闕今補學典謨祖講詩易剖演奧藝外覽百氏

砥洪闕今補或釋為志

家洪作衆雋洪闕依單釋兩挈聖抱不測之謀秉高世

之介屈私趨公即仕佐上郡位既畢洪作重孔武赴箸

疾惡義形從風征暴執訊獲首除曲阿尉禽姦芟猾

寇息善歡履菰竹之廉蹈公儀之絜察廉除茲初案

字當作初未詳實爲初未詳 厲清肅賦仁義之風脩洪闕今補或釋

之迹■■ 化放虐岐周流愛雙虐■■ 親取寶智進

直退慝布政優優令儀令色獄無呼嗟之寃壘無叩

匈之結矜孤頤老表孝貞節重義輕利制戶六百省

無正絲不責自畢百姓心歡官不失實於是遠人聆

聲景附樂受一塵既來安之復洪闕依役三年惟泮

宮之教反失洪闕依俗之禮構修學官洪作宗懿招

德既安且洪作呂依單釋改寧于侯用張。匱豆用陳。發彼有
的雅容。閑鍾磬縣矣。于肯樂焉。乃作敘曰。

翼翼聖慈。惠我羣蒸。貽我潘君。平茲溧陽。彬文赴武。

扶弱抑彊。龕洪闕今補刈馘雄流。惡顯忠咨。疑元老師。取

作朋。修學童冠。琢質繡章。實天生德。有漢將興。尚且

在昔。我君存今。即洪闕依單釋此龜艾。遂尹三梁。永垂支

百。民人所彰。子子孫孫。卑尔熾昌。

丞沛國銍趙勲。字蔓伯。左尉河內汲董並。字公房。右

尉豫章南昌程陽。字孝遂。

時將作吏名。戶曹掾楊淮。議曹掾李就。議曹掾梅洪作

桓依單釋改檜。戶曹史賀。從掾位侯祖。主記史吳超。門

下史吳訓門下史吳翔門下史時球。

光和四季十月己丑朔廿一日己酉造。

此碑校隸釋有碑校隸釋

出者詳每字下反失俗之禮建康志作決拾之禮視碑實爲失俗元至順癸酉濟陰單禧釋文是矣

邵陽令曹全碑

君諱全字景完敦煌效穀人也其先蓋周之胄武王

秉乾之機翦伐殷商既定爾勲福祿攸同封弟叔振

鐸于曹國

兩漢金石記誤脫此字

因氏焉秦漢之際曹叅夾輔

王室世宗廓土序竟子孫遷于雍州之郊分止右扶

風或在安定或處武都或居隴西或家敦煌枝分葉

布所在爲雄君高祖父敏舉孝廉武威長史巴郡胸

忍令張掖居延都尉曾祖父述孝廉謁者金城長史

夏陽令蜀郡西部都尉。祖父鳳孝廉。張掖屬國都尉丞。右扶風。隃麋侯相。金城西部都尉。北地大守。父琇少。貫名州郡。不幸早世。是以

兩漢金石記誤脫此二字

位不副德。

君童齟好學。甄極絳緯。無文不綜。賢孝之性。根生於心。收養季祖母。供事繼母。先意承志。存亡之敬。禮無遺闕。是以鄉人爲之諺曰。重親致歡。曹景完。易世載德。不隕其名。及其從政。清擬夷齊。直慕史魚。歷郡右職。上計掾史。仍辟涼州。常爲治中。別駕。紀綱萬里。朱紫不謬。出典諸郡。彈枉糾邪。貪暴洗心。同僚服德。遠近憚威。建寧二年。舉孝廉。除郎中。拜西域戊部司馬。時疏勒國王和德弒父篡位。不供職貢。君興師征討。

有爽臆之仁。分醪之惠。攻城野戰。謀若涌泉。威牟諸
賁。和德面縛。歸死還陟。振旅諸國。禮遺且二百萬。悉
以薄官。遷右扶風。槐里令。遭同產弟憂。棄官。續遇禁
囚。潛隱家巷。七年。光和六年。復舉孝廉。七年三月。除
郎中。拜酒泉祿福長。誅賊張角。起兵幽冀。寇豫荆揚。
同時並動。而縣民郭家等。復造逆亂。燔燒城寺。萬民
騷擾。人裹不安。三郡告急。羽檄仍至于時。聖主諮諏
羣僚。咸曰。君哉。轉拜郃陽令。收合餘燼。芟夷殘迸。絕
其本根。遂訪故老商量。案碑陰云。縣三僇艾王。敞王
畢等。恤民之要。存慰高年。撫育鰥寡。以家錢糴米粟。
賜瘠盲大女。桃斐等。合匕首藥。神明膏。親至離亭。部

吏王臯

案此臯字也各家釋作宰非

各程橫

案碑陰云故市掾程璜孔休蓋橫同字耳

等賦與有疾者咸蒙瘳俊惠政之流甚於置郵百姓

緝負反者如雲戢治廬屋市肆列陳風雨時節歲獲

豐年農夫織婦百工戴恩縣前以河平元年遭白茅

台水災害退於戊亥之間興造城郭是後舊姓及修

身之士官位不登君乃閔縉紳之徒不濟開南寺門

承望峯嶽鄉明而治庶使學者李儒

案碑陰云徵博士李儒文優

藥規程寅等各獲人爵之報廓廣聽事官舍廷曹廊

閣升降揖讓朝覲之階費不出民役不干時門下掾

王敞錄事掾王畢

案碑陰云故門下議掾王畢世異

敞元主簿

王歷戶曹掾秦尚

案碑陰云故功曹秦尚孔都

功曹史王顓等嘉

慕奚斯考甫之美。乃共刊石紀功。其辭曰。
懿明后。德義章。貢王庭。征鬼方。威布烈。安殊荒。還師
旅。臨槐里。感孔懷。赴喪紀。嗟逆賊。燔城市。特受命。理
殘圯。芟不臣。寧黔首。繕官寺。開南門。闕嵯峨。望羊山。
鄉明治。惠沾渥。吏樂政。民給足。君高升。極鼎足。
中平二年十月丙辰造。

秦君碑

余聞湯武千載。周孔異世。以義相高。况余忝祿。踐跡
遵基。竊慕揚善。喟然而嘆。其鄙辭曰。

於穆秦君。命世優邁。承祖皇。裔出畢。紀行錄功。
必本其初。惟君總角。勵志仲尼。從容六藝。佃田疇。

升階英妙。轉典蒸黎。爲政崇博。五教並和。仁賢敘位。
法依蕭何。囹圄空虛。鄉無逋逃。凡百肅雍。莫不率從。
境內旣寧。路不資遺。耕夫千畝。餘種不歸。立清介白。
食茹拔葵。三年有成。嬰兒謠歌。鼓腹喜德。踊躍嘔唏。
水靜魚集。國富民繁。戶增十倍。牧守孔嘉。怒不斷刑。
寬不容非。化准邠邵。比翮而飛。永如南山。不缺不虧。
畧取大較。丹書刻石。垂示後昆。識者察焉。碑在滕縣
今不存蓋

近歲失
之也

靈帝河閒舊廬碑

漢張超

赫赫在上。陶唐是承。繼德二祖。四宗是憑。上龜鑒乎
羲農。中結軌乎夏商。元首旣明。股肱惟良。乃因舊宇。

福德所基。修飾經構。農隙得時。樹中天之雙闕。建冠山之華堂。通樓閒道。丹階紫房。金牖鬱律。玉壁內瑤。青蒲充庖。朱草棲箱。川魚踴躍。雲鳥舞翔。煌煌大漢。合德乾綱。體効日月。驗化陰陽。格于上下。震暢八荒。三光宣曜。四靈効祥。天其嘉享。豐年穰穰。騶虞奏樂。鹿鳴薦觴。工祝致告。福祿來將。永保萬國。南山無量。

魯夫子碑

漢 禰衡

受天至精。純粹睿哲。崇高足以長世。寬容足以廣包。幽明足以測神。文藻足以辨物。然而敏學以求之。下問以諏之。虛心以受之。深思以詠之。愍周道之迴遹。悼九疇之乖悖。故發憤忘食。應聘四方。魯以大夫之

位任以國政之權。譬若飛鴻鸞於中庭。聘騏驥於閭巷也。是以期月之頃。五教克諧。移風易俗。邦國肅焉。無思不服。懿文德以紆餘。綴三五之紀綱。流洪耀之休赫。曠萬世而揚光。夫文明以動。天則也。廣大無疆。地德也。六經混成。洪式也。備此三者。聖極也。合吉凶於鬼神。遂殂落於夢寐。是以風烈流行。無所不通。故立石銘勛。以示昭明。辭曰。

煌煌上天。篤降若人。邈矣悠哉。千祀一鄰。明德宏監。情性存存。奕奕純嘏。稽憲乾坤。曜彼靈祇。以訓黎元。終日乾乾。配天之行。在險而正。在困而亨。窮達之運。委諸穹蒼。日月則陰。天地不光。聖獻殂崩。大猷不綱。

顏子碑

漢 禰衡

稟天地之純和。鍾岳瀆之休靈。睿哲之姿。誕自初育。英絕之才。顯乎嬰孩。在東脩之齒。入宣尼之室。德行邁於三千。仁風橫於萬國。知微知彰。聞一覺十。用行舍藏。與聖合契。名爲四友之冠。實盡䟽附之益。爾乃安陋巷。挹清流。甘簞瓢以充飢。雖屢空而不憂。于時河不出圖。周祚未訖。仲尼無舜禹之功。先生包元凱之烈。其辭曰。

亞聖德。蹈高蹤。遊洙泗。肅禮容。備懿體。心彌沖。秀不實。振芳風。配聖饋。圖辟雍。紀德行。昭罔窮。

吳九真太守谷朗碑

府君諱朗字義先桂陽耒陽人豫章府君之曾孫公
府君之孫郎中君之子也其先世自顓頊益爲舜虞
賜姓嬴氏至于扉子封於秦谷因而氏焉君承洪原
之清流稟弈世之高素履道思順德行純備三歲喪
母十一亡父獨與弟居承奉繼親和顏悅色孝友溫
恭曾閔之操君其蹈焉弱冠仕郡歷右職守陽安長
淑問宣深遂升王府除郎中尚書令史郡中正遷長
沙劉陽令播渥惠以育物垂仁恩以布化莅政未期
徵拜立忠都尉尚書郎靖密樞機名冠衆僚此二字今釋
遷部廣州督軍校尉正身率下不畏彊禦深清蕩濁
萬里肅威此字今釋功成辭退拜五官郎中遷大中正平

衡清格。蘇倫攸敘。于昔此字今釋交州。竊邑判國。戎車婁

起此二字今釋于戈未戢。帝思俾乂。訓咨羣司。僉以君往

部南州。威恩素著此二字今釋。遷九真太守。君稟明德。所

歷垂勲。宜延遐紀。光讚此字今釋皇家。如何不永。春秋五

十有四。鳳皇元年四月乙未。寢疾而卒。嗚呼哀哉。凡

百君子。莫不嗟痛。乃立碑作頌。以顯行績。其詞曰。

於鑠府君。稟性元通。積行閨闕。九族睦雍。羽儀上京。

德與雲騰。入蹈丹墀。夙夜靖恭。出撫梨民。風移俗興。

名叅豹產。勲齊往縱。當永黃耆。翼佐帝庸。昊天不弔。

哲人其終。濟濟縉紳。靡瞻靡宗。勒茲元石。永光無窮。

案歐趙著錄皆有此碑。至翁氏兩漢金石記始載全文。今以拓本釋其所缺。并改訛錯。

故使持節侍中太傅鉅平成侯羊公碑

晉李興

公諱祐字叔子泰山南城人也其先晉羊舌大夫之
胄當漢中興始自南陽家于岱野纓冕相繼九世于
茲矣顯祖南陽太守考上黨太守咸有能名公承俊
烈之高風應明哲之盛代德擅規模仁成慈惠其器
量宏深容度廣大浩浩乎固不可測已其志節言行
卓爾不羣遊神元默散志青雲宏之以道籍博之以
藝文于是仁聲遠耀芳風遐流年十有七上計吏察
孝廉州辟不肯就羣公休之四府並命盤桓累載及
公車徵拜中書侍郎祕書監于時當晉之盛明揚英

俊乃引公爲相國從事中郎遷中領軍遇革命之期
任受禪之會秉文經武以集大晉之祚皇采增輝帝
威遠邁偉絕代之風宏唐虞之緒帝嘉厥庸疇以大
國公乃逡巡固讓裁居小邦天子俞咨仍復公中軍
將軍散騎常侍內釐王度外綏區域嚴恭寅畏帝命
允飭運國威于句陳握皇樞于紫極于時之盛未有
上公者也拜衛將軍尚書僕射以揆天機崇成大業
帝道緝熙泰階永肅以江寇未夷乃命公都督荊州
諸軍侍中車騎將軍開府辟命乃養民募財開斥國
界創築五城以防寇衛境然後闡敷皇風懷遠以德
知大同之業思王道之則齊其土人均其利澤軍無

虞警。民不疲勞。農功盈疇。百姓布野。羣黎被德。殊俗望風。吳人感服。襁負而至者四萬餘口。進位征南大將軍。公雖享有茅土。歷登台階。吐飧下士。貳於姬公。方將殪彼戎吳。經國弔民。然後偃甲戢兵。辭功退身。以優遊乎初好。此公之素志也。會遘篤疾。春秋五十有八。咸寧四年十有一月庚寅。薨于京邑。天子痛悼。遣使持節。追贈侍中。太傅。南城侯。印綬。賻弔。加于常也。及其葬。上親臨。過車騎。謚曰成侯。天子以公德高。勳大。而屢辭封爵。故復建南城之國。特以封公。公哲讓終始。上未之許。及其薨也。夫人夏侯氏。追公克讓之志。遂不以斂。公自出身。以至于終。忠言不輟于口。

嘉謀不廢于心。成其業。不處其功。勤其勲。不榮其祿。儀型言行動。爲世範。暨六年春。平吳策。詔曰。故太傅鉅平侯羊祜。造建平吳之規。潛謀遠畧。與衆殊慮。勲業不遂。然蕩滅之計。悉如祜策。固能夷曠世之寇。拯黎民之患。勲烈宏著。而寵不逮身。其遣使以克定之功。策告祜廟。昔漢氏封蕭何夫人爲侯。以崇顯元功。亦古之令典。封祜夫人爲萬歲鄉君。食邑五千戶。賜絹萬疋。于是故吏高文奚廉等。僉以公德高而志卑。位優而行恭。徽猷被于江漢。懿德及於羣生。涉其風者。貪夫廉懦夫立。雖夷惠之操。奮乎百世。曷以尚之。竒謀潛畧。清功遺緒。靡所寘心。乃共揭石。刊勒盛軌。

永表風烈焉其辭曰天臨有晉乃降皇輔猗歟惟公
應期協矩聰哲神睿乃文乃武曰唐曰虞淵淵其度
翼翼其明孝思以形乃耀高風辭爵讓榮為而不有
志凌太清如何不弔中年殞

末刊是表是旗案李興所撰羊公碑

久漫滅再書于梁大同重立于唐大中三鐫于宋景祐而元人周伯溫又摹而樹之今之存者則憲治十
四年重立者也府志以碑為李與初撰蓋由誤讀者舊記又訛興為與耳

太公呂望表

晉盧无忌

齊太公呂望者此縣人也遭秦燔書史失其籍至大
晉受命吳會既平四海一統太康二年縣之西偏有
盜發冢而得竹策之書書臧之年當秦坑儒之前八

十六歲。其周志曰：文王夢天帝，服元襪以立於令狐之津。帝曰：昌，賜汝望。文王再拜稽首。大公於後亦再拜稽首。文王夢之之夜，太公夢之亦然。其後文王見太公而計之曰：而名爲望乎？荅曰：唯爲望。文王曰：吾如有所於見汝。太公言其年月與其日，且盡道其言。臣此以得見也。文王曰：有之有之，遂與之歸，以爲卿士。其紀年曰：康王六年，齊太公望卒。參考年數，蓋壽百一十餘歲。先秦滅學，而臧於上墓，天下平秦而發其潛書，書之所出，正在斯邑。豈皇天所以章明先哲，著其名號，光于百代，垂示無窮者乎？於是太公之裔孫范陽盧无忌，自太子洗馬來爲汲令，般谿之下，舊

有壇場而今墮廢荒而不治乃諮之碩儒訪諸朝吏
僉以爲太公功施於民以勞定國國之典祀所宜不
替且其山也能興雲雨財用所出遂脩復舊祀言名
計偕鑄石勒表以彰顯烈俾萬載之後有所稱述其
辭曰

於爍我祖時惟大公當殷之末
德元通上帝有命
以錫周邦公及文王二夢惟同上帝旣命若時登庸
遂作心膂寅亮天工肆伐大商克咸厥功建國胙土
俾侯于東奮乎百世聲烈弥洪般谿之山明靈所託
升雲降雨爲膏爲澤水旱厲疫是禳是崇來方禋祀
莫敢不敬報以介福惠我百姓天地和舒四氣通正

灾害不作。民無天命。嘉生蕃殖。遠迸迄用。康年稼穡茂盛。凡我邦域。永世受慶。春秋匪解。無隕茲令。大康十年三月丙寅朔十九日甲申造。

侍中嵇侯碑

晉裴希聲

夫君親之重。非名教之謂也。愛敬出於自然。而忠孝之道畢矣。樸散真離。背生殉利。禮法之興於斯。爲薄悲夫。晉弋陽子嵇紹字延祖。資乾剛之純粹。體中和之淑靈。少有清劭之風。長懷宏仁之度。加以通朗掩濟。靡才不經。學爲儒宗。庶績光被。弱冠登朝。則敷文秘閣。晚節強仕。則納言樞極。太安之初。權臣擅命。皇輿親征。次於蕩陰。六軍奔散。兵交御輦。紹儼然端冕。

正色以扞鋒刃。遂殞命於御側。忠誠感人。神義聲震四海。銘曰。

二儀肇建。君臣攸序。峩峩侍中。應期作輔。外播仁風。內舉心膂。孰慈弗勇。靡仁不武。見危授命。背生殉主。確乎其操。邈乎其崇。矯矯王臣。憲茲遺風。在親成孝。於敬成忠。

右光祿大夫西平靖侯顏府君碑

晉李闡

君諱含。字宏都。琅邪臨沂人。春秋以降。戰國以前。賢智比肩。備於載策。昭穆次序。上至顏燭。漢末喪亂。舊譜淪亡。自青州使君以上。不復詳具。祖欽。給事貞侯。

父默汝陰太守學素相承有聲邦黨君幼稟貞粹長而好古睦親之譽發於羈貫每讀書見孝友通靈之事輒悽然改容以爲人神相與何遠之有但患人心澆僞自絕於神耳苟能無以僞雜真神其捨諸修己立誠盡歡就養訓行閨門義達州里久要心許之信夷險不爽正冠納履之嫌終始不蹈兄畿患亡更生君棄絕人事蓬首屏氣以就哈養者十有三年次闕繁欽孫老而失明合藥須髯虵膽有青衣童子持裹授君出戶化成青鳥飛去本州辟不就鎮東琅邪王參軍事過江累遷東閣祭酒朝議謂君正性端素學行通深有命太子中庶子轉黃門侍郎本州大中正

封回車縣侯轉侍中吳郡太守事停還除侍中國子祭酒加散騎常侍光祿勳以年遜位就加右光祿大夫門施行馬特賜牀帳被褥四時致膳固辭不受馮懷欲爲王導降禮君不從曰王公雖重故是吾家阿龍君是王親丈人故呼王小字王處明君之外弟爲子允之求君女婚桓溫君夫人從甥也求君小女婚君並不許曰吾與茂倫於江上相得言及知舊技淚敘情茂倫曰唯當結一婚姻耳吾豈忘此言溫負氣好名若其大成傾危之道若其闕敗也罪及姻黨爾家書生爲門世無富貴終不爲汝樹禍自今仕宦不可過二千石闕婚嫁不須貪世位家時議者以君審

裁將以應軍司之選。君遽告蔡謨曰：此非輕弱所宜。尸忝羯逆，方熾當保國養民，以俟事會。想愛人以禮，宜寢此言。主相聞之，卒不授督統之任。謨秉君此言，終不唱討賊之計。在朝正立，不昵權豪，及致仕退居。長子髦解職視膳，中子謙躬率田桑，中外莫不取給。闔門靜軌廿餘年。九十三薨，遺命素棺薄斂。吉凶官飾一無施列。天子嗟悼，詔賜墓田，諡曰靖侯。禮也。停柩在殯，鄰家失火，三子抱柩號惶，分同灰燼。焱爛垂及，歛然頓滅。論曰：君平生素行，既感達幽靈，終殯在堂，又獲福異，豈神祇保佑，以顯淳德乎。闡託姻顏氏，頗識舊聞，與君二子髦約採集言行，而著此傳。銘曰：

嶠夷導日。岱方禋春。星離望合。水別浸鄰。少陽畜德。
蒼祇效神。孕僊字聖。誕智息仁。洙上道奧。稷下儒淵。
乃昔宗林。傾席曜筵。升門取雋。接室稱賢。闔則遯哀。
燭亦抗宣。曠彼琅邪。實惟海宇。憬屬之罟。邪臨潮撫。
載濟越師。大淹秦旅。誰其來遷。時聞遠祖。青州隱秀。
爰始貞居。內辟鼎府。外康邦閭。建節中平。分竹黃初。
刑清齊右。政偃營區。葛嶧明懿。平陽聰理。或薦公庭。
或登宰士。列美霸朝。雙風千里。華萼之茂。於昭不已。
博士淵退。再逡儒聘。案聘舊誤
躬今改正貞子七穆。比世稱盛。
無忝汝陰。有偉安定。舍人攷敏。亦允儲命。靖侯潛德。
信豈在明。言則測幽。歎實聳靈。仁親之寶。大孝之榮。

官必凝績學乃敦經隨難蕃霸特安闡掖扶元陟帝
翼成復辟忌滿裁婚鑒冲貶石望年靜駕樂恬延歷
三祖連光衆門稟教於時列孝克端殊操潔景衡陰
湮心理奧任不窮秩是謂高蹈山曾木闕胄積芟深
永惟世闕思樹辭林碑表有毀策素匪任誦靈墳阿
長寄風音

晉江夏李闡字宏模傳曾孫宋金紫光祿大夫贈特
進延之字延年銘大歷七年歲次壬子夏四月甲寅
十四代孫唐金紫光祿大夫前行撫州刺史上柱國
魯郡開國公真卿書重建於舊龜趺上建康志顏含墓右光祿大
夫西平靖侯顏府君葬靖安道旁考證云晉顏含乃
唐時真卿十四世祖也得古碑於靖安道旁乃李闡

及顏延之文
墓不知所在

丞相桓溫碑銘

晉表 宏

文武開業。尚父定王。佐之契宗。周不競。桓公宏九伐
之勲。脫屣於必濟之功。忘懷於屈伸之會。高氏字誤未詳
出乎生民。公亮坦於萬物。遂復改謀。迴慮策馬武關。
揔轡丹析之塗。揚鞭終南之嶺。兵交則戰。無全敵。勸
義則襁負雲集。徒以懸軍輕進。困蓄靡儲。而豺狼懼
殫。保固窟穴。乃方軌迴轅。反師凱入。雖竒功大勲。未
捷於一朝。而宏謨神畧。義高於天下。惟公秀傑英特。
竒姿表於弱冠。俊神朗鑒。明統備於成德。巾褐衡門。
風流推其高致。忘己應務。天下謝其勲業。輔相兩儀。

而通運之功必周。虛中容長。而方圓之才咸得。道濟而不有。處泰而逾約。可謂固天時。縱生民之傑者也。銘曰

美盡黃裳。道暢伊呂。哲人應運。命世作輔。卓卓英風。畧畧宏宇。亮心高列。俊神閒舉。忘己濟物。撫化翼世。河洛澄流。華梁卷翳。俾我仁公。宏道作鏡。如何不弔。雲巒落映。

續古文苑卷第十五